

Va sen sinaale-so lawiing-ato

Yesu nêêl nambe navu biing Vavi Vaambuung naam

¹ + o 1:1 Luk 1:1-4*O Tiopilas, vakasin sen sa kaavu neep munggin-ato * Luk 1:1-4* ond gale gangge naambe Luk kaavu banye nivasaa-ju la vu Tiopilas, om yik Luk-anju sen kaavu sinaale-sote kaapiyaa-jo having. ond sa kaavu lak va pin sen Yesu wiing osin tatekin tanasin vu hil-ato, ² + o 1:2 Mak 16:19; Luk 24:49-51*vu munggin-ambe hato busin sen Anutu hako yi laah baandonii-to. Ond naahen nando voon-ande vu kul vu yite sinaale-so sen bôôy holin sil-ato, ond vu kul lak Vavi Vaambuung-ate niwêêk. ³ + o 1:3 Luk 24:36-49; Sin 10:41*Bôôy hako nivaane be yimb, de kandi lak atombe nando voon lohvu busin doo-yuuh, be navu taato yi vu yite sinaale-so in nambe lanjak ni naambe nando metumin, tombe nêêl vakasin sen Anutu nanggin yite hil-ato vu sil. ⁴ + o 1:4 Luk 24:49; Jon 14:16-17; Sin 2:33*De yoo naahen nando having sil-ato ond nêêlin sil nambe, “Ham-ame gavuuuh Yelusalem e, ham oo mando ganggin va sen saanêêl vu ham bôôy nambe Aamangg nêêl nambe le bu naam-ato. ⁵ + o 1:5 Mat 3:11*De Jon lipis hil-ato ond lipis sil lak bel, de ngaaho lak in Anutu navu biing Vavi Vaambuung naas mando gaving ham.”

* **1:1:** Gangge

⁶ + o 1:6 Luk 24:21*Tombe sinaale-so lasupin dando lavuh ti le mem lalingin yi nambe, “Omaaho Bop, mak peey e onavu gambiing-ambe yiyi Islel oo ganggin yiyi naah a?”

⁷ + o 1:7 Mak 13:32*Le nêel vu sil nambe, “Ham-ame hamate va in nambe ham anjak ta osin busin sen Mangg oo hatung-ato ni le, yik Mangg timu yoo nanggin vaa-jo. ⁸ + o 1:8 Mat 28:19; Luk 24:48; Sin 2:32; 3:15; 5:32; Ep 3:16*Lemu Vavi Vaambuung e jakana ham-ambe bu niwêek vu ham, tombe mem ham e naanêel sa haalengg vu Yelusalem de vu Yudia pin osin vu Samaalia be na nohvu taaku nanyendangga pin.”

Yesu lakalaah baandoni
(Maak 16:19-20; Luk 24:50-53)

⁹ + o 1:9 Jon 6:62*Yesu nêel vakasin-anjo lung la, tonde layi de valu-nala baandoni, tombe bayiimb ti hako yi be la, tonde me-layi yi yesin laah e. ¹⁰ + o 1:10 Luk 24:4*Naahen nalak-ande sil oo mondalaah mend ak in, tombe omaaho yuuh lato daale having sil pavis, ond yuuh lalop lolop anivalôôy, ¹¹ + o 1:11 Mat 26:64; Luk 21:27; Taato 1:7*tonde yuuh lanêel nambe, “Ham Galili, nambe vaati sen ham naale mem nangget baandoni? Yesuu-ju sen Anutu vu vêel in ham-ande hako be la baandoni, ond yik le nom naambe sen ham ahe la baandoni gêên-anju.”

Laholin Matias lukalaah Yudas ahembaan

¹² + o 1:12 Luk 24:50-53*Sil vu kandu Oliv-ambe lalaah Yelusalem. Kanduu-ju ngaaho daka vu Yelusalem lohvu 1 kilomita mu. ¹³ + o 1:13 Mat 10:2-4*Lala lato Yelusalem-ambe lalakala bayêên alopayo baandoni ti sen sil oo dando hôok-ato.

Hil-anju ond Pita yuuh Jon, de Jems ayuuh Endru, de Pilip ayuuh Tomas, de Batolomai yuuh Matai, de Jems sen Alpias noow-ato yuuh Simon sen naanjiihin hil Yuda in nambe gatiy hil Lom lanaa-to, de Yudas sen Jems noow-ato. ¹⁴ + o 1:14 Jon 7:5*Hil-anju pin laving vêêh heey, de Malia sen Yesu tangganaan-ato osin Yesu halindin, ond sil alondpayo lavuh ti de mondalohak dando.

¹⁵ De busin ti tombe hil 120 dando lavuh ti, tombe Pita kandi naale hôôk sil amend-ambe nêêl nambe, ¹⁶ + o 1:16 Saam 41:9*“Halingg-ase, bôôy ond Vavi Vaambuung wiing-ambe Devit nêêl vakasin munggin lak Yudas sen gêên taato mopaatôôv vu hil-ambe lalôôh Yesuu-to, ond vakasin-anjo nôôn ak lung la. ¹⁷ Yudas-anju ond hey ti sen hey ahondoos naawiing kul timuu-to, ¹⁸ + o 1:18 Mat 27:3-10*tombe mone sen hako lak yite nipayaa-to lala laanggo ngaanggis ti lak, ond Yudas-anju lupake be ninaavi vapuuh-ande ahe kaasêêh. ¹⁹ Tombe hil pin vu Yelusalem langoyin-ambe lanêêl taaku tii-ju hôôk sil lavand nambe Akeldama, dangga nambe ngaanggis ngaamong nihees-ate. ²⁰ + o 1:20 Saam 69:25; 109:8*Vakasin-anjo neep hôôk kaapiya Saam nambe, ‘Yite bayêên e mando malis, de omaaho ti me-le mando jak e.’

De Saam ango nêêl nambe,
‘Omaaho ango le biing yite kul.’

²¹ Om hil sen hey ahondoos having Omaaho Bop Yesu hey ala de aalom, de sil dando having hey lôôt, ²² + o 1:22 Jon 15:27*vu busin sen Jon lipis hil-ambe tok laam busin sen Anutu hako

Yesu laah in yiyi-ato, ond hil-anja ti kandi jak gaving hey

in naanêel Yesu-te vakasin sen kandi lak-ato langaah gaving e.”

²³ Pita nêel nambêênju tombe sil lanêel omaaho yuuh haalend, ango Yusep sen danêel nambe Basabas, de haale ango nambe Jastas, ond yuuh Matias. ²⁴ + o 1:24 Jon 2:25* Tonde lalohak nambe, “Omaaho Bop, goo galak hil pin alondpayo ni, om otaato naambe gaholin omaaho yuuh-anjo ango tana ²⁵ in nambe gako kul sinaale sen Yudas havuuh neep-ande la valok-atêêto.” ²⁶ Lalohak lung la tonde sil kaavu yuuh haalend ak tatuuh-ande sil kalo, tombe Matias-ate tatuuh kalov hato sil amend, om lawiing Matias la having sinaale-so nomaayuuh-ambe laam tii-to.

2

Vavi Vaambuung lukalaam voon

¹ + o 2:1 Lev 23:15-21; Diu 16:9-11* Hôôk busin Pentikos tombe sil pin lavuh ti be dando, ² de pavis atombe daandun ti laam vu baandoni nambe sen vavi jambaa-to be lohvu bayêên alo sen dando hôôk-ato. ³ + o 2:3 Mat 3:11* Tonde layi vati nambe kin dalaan-ato laam-ambe nando lak sil ti ti pin, ⁴ + o 2:4 Sin 4:31; 10:44-46; Sin 19:6; Mak 16:17* tonde Vavi Vaambuung lukala sil alondpayo lôôt, be lakaas bayêên bu ti ti lavand lohvu Vavi Vaambuung oo wiing-ambe sil lakaas-ato.

⁵ De hil Yuda vu taaku pin sen kand navu sapa Anutu be lala dando Yelusalem-ato, ⁶ ond lango daandun-anju tombe sil pin lasupin lalaam-ambe

daale dango de sinaale-so dakaas sil sen daalêê-jôoto lavand ti ti, om lavindis lôôt. ⁷ + o 2:7 Sin 1:11*Sil pin lavindis-ande kand yu-yuuh lôôt-ambe lanêêl nambe, “Ham gango. Hil pin sen dakaas-anjo sil vu Galili me malis? ⁸ Nambe vaati om yiy nango de dakaas yiy lavangg sen ataak-aso lako yiy-ambe yiy nakaas-ato? ⁹ + o 2:9 2Ti 1:15*Yiy vu taaku Patia, de Midia de Ilam, osin yiy vu Mesopotemia de vu Yudia, de vu Kapadosia yuuh Pontas de Esia, ¹⁰ de vu Plisia, Pampilia, osin Ijip, de vu Libia vahaan sen ngaaho vu Sailinii-to, de yiy vu Lom sen yalaam nandôo-jo. ¹¹ Yiy Yuda de hil vaalu sen lako Yuda-te gambum-ato, de yiy vu Klit osin Alebia, yiy pin hango de danêêl va bopaata sen Anutu wiing-ato langaah hôok yiy lavangg ti ti.” ¹² Om sil pin lavindis lôôt-ambe kand yu-yuuh, tombe yoo lanêêl vu sil nambe, “Vaa-jo dangga nambe vaati?” ¹³ Lemu vaalu danêêl sil pale nambe, “Ma-o, lanum wain moos ngeeyaata lôôt.”

Pita nêel vakasin

¹⁴ De Pita naale having sil nomaayuuh-ambe laam tii-to tombe nêel bopaata vu hil pin nambe, “Ham Yelusalem de ham Yuda pin, sa tatekin vaa-jo vu ham-ambe ham gango le. ¹⁵ Hamambe hil-anjo lanum wain ngeeyaata? Malis lôôt. Manyinjo naahen samiinaanôn-anjo, ¹⁶ lemu Joel-ate vakasin bôôy-ato nôôn ak nambe,

¹⁷ + o 2:17-21 Joel 2:28-32*“Anutu nêel nambe, “Vu busin taamusin e mem sale aambiing-ambe sate Vavi Vaambuung jakana hil pin, be noom-aso nomaavêêh-aso le daanêel

vakasin langaah, de hamate himbop-aso le lanji mavin, tonde hamate maanggêem-aso le lanji taahu taahu. ¹⁸ Keen, hôök busin-anju sale aambiing sate Vavi Vaambuung jakana sate hil moow osin vêêh in daanêel vakasin langaah. ¹⁹ Tonde sale aambiing taahu taahu bopaata vu yendak osin saambiing taahu taahu niwêêk vu voon. Nihees de kin osin ahelu, ²⁰ de taaku mekaalus e mekanu dôôk, tonde kwaav e nihees dôôk vêêl e mem Omaaho Bop-ate busin bopaataa-to naatok naam. ²¹ + o 2:21 Lom 10:13*Tombe hil pin sen lavand nahôök Omaaho Bop haalêê-to ond le dôôvu sil.’ ”

²² + o 2:22 Jon 3:2*“Ham Islel, ham gango sate vakasin-anjo le, naambe Yesu Nasaalet ond ham alak ni nambe Anutu taato yi vu ham lak taahu taahu bopaata osin niwêêk vaha vaha, de kaandu yi be wiing vu ham ambaam-ato. ²³ + o 2:23 Sin 4:28; 1Pi 1:20*Vu bôôy ond Anutu yoo ka vu be samu vakasin lung la le mem vu Yesuu-jo lukala ham namam, tombe sim ham avu yi lukala hil sen me-lawii-having tanasin-ato namand-ambe layiis ak haah pako be yimb. ²⁴ + o 2:24 Sin 3:15*Le sim Anutu vu vêêl yi in nivaane yimbin-ate de wiing-ambe kandi lak laah, de yimbin-ame lohvu nambe naapuvu yi lôôt e, ²⁵ + o 2:25-28 Saam 16:8-11*in Devit nêel vakasin lak yi nambe,

‘Saahe Omaaho Bop naale sa mengg osin sa namangg vasa lak busin pin in nambe vati me-le biing-ambe saandupake le. ²⁶ Om nambêênja sa longgpayo nivasa de sa

dalaangg naapêêlis vu Anutu, de sa ningg naavi mando mongganggin va nivasa, ²⁷ + o 2:27 Sin 13:35*in game le gavuuu sa ka-nungg na mando hil yimbin-ate taaku lôôt e, de game le gambiing-ambe gate Omaaho Vaambuung naavi panyek e. ²⁸ Otaato mopaatôôv sen sa mando metumin-ate lung la vu sa, de gale mando gaving sa om sale naapêêlis lôôt.'

²⁹ + o 2:29 1King 2:10; Sin 13:36*“Halingg-aso, sa naanêêl langaah vu ham naambe yate himbop Devit yimb bôôy-ambe lahaav, de yite bandumb neep hôôk yiyi lavuun-ambe gêên-anjo. ³⁰ + o 2:30 2Sml 7:12; Saam 89:3-4; 132:11*Devit-anjo yi omaaho sen nanêêl Anutu-te vakasin langaah-ato be yoo lak ni nambe Anutu nêêl vu keen baandoni nambe, ‘Sa navu aambiing-ambe gate hil vu taamusin-ato ti le gako haale lulemak dukanaah gahembaan.’ ³¹ + o 2:31 Saam 16:10*Ond Devit oo lak ni munggin ondeey nêêl vakasin lak omaaho sen Anutu yoo holin yi vulôôt in nambe dôôvu yiyi-ato nambe le kandi jak naah, om nêêl nambe, ‘Anutu me-havuuu yi la nando hil yimbin-ate taaku lôôt osin ninaavi me-panyek e.’ ³² + o 2:32 Sin 1:8*Ond Yesuu-ja, Anutu wiing-ambe kandi lak-ambe hey pin aahe yi lung la ondeey hey naanêêl langaah-anjo. ³³ + o 2:33 Mak 16:19; Sin 1:4; 7:55-56; 1Pi 3:22*Om gêên Anutu hako lakalaah baandoni be la nando nama vasa lung la, de wiing Vavi Vaambuung sen Mangganaan nêêl vu yii-to lom-ambe Vavi Vaambuung yoo wiing va sen ham nahe osin ham nangôô-to. ³⁴ +

o 2:34-35 Saam 110:1*Devit-ame la baandoni le, lemu Devit nêêl nambe,

‘Omaaho Bop nêêl vu sate Omaaho Bop nambe,
 “Omando sa namangg vasa, ³⁵ de sale
 aambiing-ambe hil sen dayi hong payaa-to
 le langgulis hong vaalu kambi.” ’

³⁶ + o 2:36 Sin 5:30-31*“Om ham Islel pin ond
 yanjak ni vanuh naambe Yesuu-jo sen ham ayiis
 ak haah pakôô-to, ond Anutu wiing-ambe tu
 Omaaho Bop osin omaaho sen Anutu yoo holin
 yi vulôôt in nambe dôôvu yiyi-ato.”

Hil ngeeyaata lahilin londpayo de lalipis bel

³⁷ + o 2:37 Luk 3:10,12; Sin 16:30*Hil lango
 vakasin-anjo be la hanggwang sil alondpayo,
 tombe lanêêl vu Pita having sinaale-so nambe,
 “Halingg-aso, hey aambiing vaati peey?” ³⁸ + o
 2:38 Luk 24:47; Sin 3:19*Le Pita nêêl vu sil nambe,
 “Ham anggilin ham alompayo de ham pin anjipis
 bel jak Yesu Kalisi haale in kawiiy hamate nipaya
 na, le mem Anutu le biing Vavi Vaambuung naas
 vu ham. ³⁹ + o 2:39 Ais 57:19*Yik Anutu yoo nêêl
 nambe bu vu ham o noom-aso osin omaahonôôn
 pin vu taaku diin. Keen, yate Omaaho Bop Anutu
 nêêl lung la nambe le bu vu hil pin sen teey
 sil-ato.”

⁴⁰ + o 2:40 Diu 32:5; Pil 2:15*De Pita nêêl tanasin
 ngeeyaata lôôt vu sil, osin vu kôôvu sil nambe,
 “Ham ganggin ham in hil anipayaa-ja.” ⁴¹ +
 o 2:41 Sin 2:47; 4:4; 5:14*Tombe hil sen lawii-
 having Pita-te vakasin-ambe lalipis bel-ato ond sil
 ngeeyaata lôôt lohvu 3 taosen lalukalaam having
 Omaaho Bop-ate hil hôôk busin tii-ju.

Kalisi-te hil

⁴² + o 2:42 Sin 20:7*Hil-anju yoo dangoyin sinaale-sote tanasin, de sil alondpayo lavuh ti be daya vanôôn hôôk ti osin dalohak navuh ti. ⁴³ + o 2:43 Sin 5:11-12; 6:8*Tombe yik hil pin layêênin lôôt in sinaale-so lawiing taahu taahu ngeeyaata lak Anutu-te niwêêk. ⁴⁴ + o 2:44-45 Sin 4:32-35*Tonde hil pin sen lawii-having Yesuu-to dando lavuh ti, de va sen silate vaa-to ond sil pin-ate va. ⁴⁵ Tonde lavu silate ngaanggis ayuuh kupak-ambe hil laanggo de lako mone be lala latiiy vu hil sen dativak in va yuuh amêê-to. ⁴⁶ + o 2:46 Luk 24:53*De sil lavuh ti be dala Anutu-te dumb bop alo lak busin pin, tonde daya vanôôn hôôk sil ambaand ond daya osin ahend anivasa be dapêêlis, ⁴⁷ + o 2:47 Sin 2:41; 6:7; 11:21,24*de sil lavand nahôôk Anutu tombe hil pin dayi sil anivasa, de Omaaho Bop oo nahilin hil vaalu londpayo nalak busin pin-ambe dalukalaam having sil.

3*Omaaho vaha paaya ti nivasa lak*

¹ + o 3:1 Sin 10:3,9,30*Busin ti Pita yuuh Jon lala Anutu-te dumb bop hôôk soosin lohvu taaku me yaal in nambe lanohak, nohvu sen hil pin oo dalohak-ato. ² + o 3:2 Jon 9:1; Sin 14:8*Tombe omaaho ti tangganaan hako yi vaha nipaya be nando, ond lohvu busin pin daaku be lala datung nando ngaaho vu dumb avi sen danêêl haale nambe Mengalii-to, in nambe kataangg va vu hil sen dalukala dumb alôô-to. ³ Ond omaahôô-ju yi de Pita yuuh Jon lalup in nambe landukana dumb alo, tombe kataangg yuuh in nambe yuuh

lambu vati vu yi. ⁴ + o 3:4 Sin 14:9*Le Pita yuuh Jon amend la vu yi, tombe Pita nêêl vu nambe, “Gangge haay e.” ⁵ Tombe omaahôô-ju ka vu nambe yuuh davu lambu vati vu yi om nayi yuuh, ⁶ + o 3:6 Sin 3:16; 4:10; 16:18*le ma de Pita nêêl vu nambe, “Sak mone ma, lemu va sen nando vu saa-to ond sa navu aambu vu hog. Lak Yesu Kalisi Nasalet haale sa naanêêl vu hong naambe okandi jak-ambe gana.” ⁷ Tombe Pita laandiiy hôôk nama vasa be kandi naale, tombe sim omaahôô-juuto vaha tambaat osin vaha dambi niwêêk ak pavis, ⁸ + o 3:8 Sin 14:10; Jon 5:14*tonde mem pasong-ambe la naale be la, tombe lukala dumb alo having yuuh-ambe kalov baando baando osin hako Anutu haale lak-ambe la. ⁹ Hil pin layi nambe nako Anutu haale lak-ambe nala, ¹⁰ tombe lalak ni nambe omaaho sen nando mokataangg va hôôk dumb avi sen danêêl nambe Mengalii-to, ond yik yii-ju, om layi de nivasa hôôk atombe lavindis-ambe kanund la lôôt.

Pita nêêl tanasin hôôk Anutu-te dumb bop alo

¹¹ Omaahôô-ju puvu Pita yuuh Jon tatin, tombe hil pin latup-ambe lasupin lala vu yaal vu dumb alo ti sen danêêl haale nambe Solomon-atêêto, tombe sil lavindis in lôôt. ¹² Pita yi hil-anju tombe nêêl vu sil nambe, “Ham Islel, ham avindis in? De ham amem laam vu haay lôôt in? Hamambe haay oote niwêêk osin nivasa wiing-ambe laajo? ¹³ + o 3:13 Eks 3:6,15; Mat 22:32; Sin 2:23; 7:32; Luk 23:13-25*Anutu sen tu Abalaam ayuuh Isak-ande Yaakop osin yate himbop-aso bôôy pin silate Anutuu-to, ond hako yite kul vaha Yesu

haale lak. Yesuu-ja sen ham avu lukala Pilata nama be wiingin nambe kavaayin vu ham, le ma de ham haluuh damim vu yi hôök Pilata me, ¹⁴ + o 3:14 Mak 15:6-15*lemu ham haluuh damim vu omaaho vaambuung osin nivalok, de ham kataangg Pilata nambe kavaayin omaaho sen nayiis hil-ato vu ham. ¹⁵ + o 3:15 Sin 1:8; 2:32; 4:10; 5:30*De sim omaaho metumin danggakook ond ham ayiis-ambe yimb, lemu Anutu wiing-ambe kandi lak laah vu hil yimbin-ate, tombe haay aaxe ondeey haay naanêel tatekin-anjo. ¹⁶ De omaaho sen ham aaxe osin ham alak nii-to, ond yik wii-having Yesu haale, ondeey haalêê-ju wiing-ambe vaha nivasa lak. Yik Yesu yoo kaandu yi be wii-having, ondeey wiing-ambe naale nala nivasa hôök ham amem-anjo.

¹⁷ + o 3:17 Luk 23:34; 1Ti 1:13*“Halingg-aso, sa lak ni nambe ham doosin ondeey ham ayiis Yesu be yimb, de hamate yêêv bop-aso doosin having nambêênja. ¹⁸ + o 3:18 Luk 24:27,44,46*Lemu Anutu wiing-ambe hil sen danêel yite vakasin langaah bôôy-ato ond sil pin lanêel nambe yite omaaho sen yoo holin yi vulôôt in nambe dôôvu yiyi-ato ond le gako nivaane. Om gêên Anutu wiing-ambe silate vakasin-anju nôôn ak, lak va sen ham awiing vu Yesuu-to. ¹⁹ + o 3:19 Sin 2:38*Om nambêênja ham anggilin ham alompayo naah vu Anutu in nambe kawiiy hamate nipaya na valok-ate, ²⁰ de Omaaho Bop-ate samu samu naam naakuuh vu ham, de biing Kalisi sen yoo holin yi vu ham lung la bôôy-ato be naas vu ham, ond yik Yesuu-ju. ²¹ Lemu yoo le mando baandoni vêel e in ganggin busin sen Anutu wiing-ambe

yite hil vaambuung-aso lanêêl langaah bôôy-ato nambe Anutu le samu va pin naatu nivasa naah. ²² + o 3:22 Diu 18:15,18-19; Sin 7:37*De Mose nêêl nambe, ‘Omaaho Bop Anutu yoo le golin ham o halim-aso ti naatu hamate omaaho ti in naanêêl Anutu-te vakasin langaah naambe sen holin saa-to, de vakasin pin sen naanêêl vu ham-ato ond ham gambe nanyem in. ²³ Tombe hil pin sen me-gambe nanyend in omaahôô-ju yite vakasin-ato, ond Anutu le kawiiy sil, de sil-ame le mando gaving Islel naah e.’ ²⁴ De hil pin sen danêêl Anutu-te vakasin langaah bôôy-ato, ond Samuel having hil vaalu vu taamusin-ato, ond sil pin lanêêl vakasin lak busin gêên-anjo. ²⁵ + o 3:25 Jen 22:18; Gal 3:8*Vakasin sen Anutu nêêl lung la lak yate himbop-aso bôôy, de lak hil sen danêêl Anutu-te vakasin langaah-ato ond silate hil vu taamusin ham-ato, ond vakasin-anja nêêl vu Abalaam nambe, ‘Saambiing gate hil vu taamusin ti yite samu samu na dôôvu omaahonôôn nohvu taaku pin.’ ²⁶ + o 3:26 Sin 13:46*Om Anutu holin yite kul vaha be wiing laam nyendoos vu ham in nambe samu ham-ande biing-ambe ham anggilin ham alompayo ti ti be ham gavuuh hamate nipaya vaha vaha na.”

4

Pita yuuh Jon daale kaansol-aso mend

¹ + o 4:1 Luk 22:4,52*Ngaaho lak in taaku naambus na tombe Pita yuuh Jon daahen mon-danêêl vakasin vu hil, tonde kul vaha sen datang salivangin-ato laving yêêv sen nanggin Anutu-te

dumb bop-ato osin hil Sadusi lala lalup vu yuuh. ² + o 4:2 Sin 23:8*Hil-anju ahend kalin vu yuuh in nambe yuuh davu taahu hil osin yuuh danêel vakasin sen Yesu kandi lak laah om hil yimbin pin e kandi jak naah-ato, ³ + o 4:3 Sin 5:18*tombe lalôôh yuuh-ambe lala laayiy vinavi in yuuh in nambe yuuh mando be samiinaanôn e mem. ⁴ + o 4:4 Sin 2:41; 5:14*Lemu hil sen lango Pitate vakasin-ambe lawii-having-ato, ond hil-anju moow ngeeyaata lôôt lohvu 5 taosen.

⁵ Samiinaanôn atombe silate yêêv bop-aso lav-ing himbop-aso de tanasin dangga-so be lasupin vu Yelusalem, ⁶ ond sil lasupin having kul vaha sen datung salivangin-ato silate yêêv bop Anas, de Kaiapas ayuuh Jon, de Aleksanda, tonde yêêv bop Anas-ate hil pin. ⁷ + o 4:7 Mat 21:23*Tombe lalaah sinaale yuuh-anjuuto daale sil amend, le mem lalingin yuuh nambe, “Muuh nawiing vajo lak lati-te niwêêk osin haale?” ⁸ + o 4:8 Mat 10:19-20; Sin 7:55*Tombe Vavi Vaambuung hôôvu Pita, om nêel vu sil nambe, “Ham sen ham atu hil-ate yêêv bop-ato osin himbop-aso pin, ⁹ gêên-anjo haay samu vakasin vu ham in samu samu sen haay aawiing vaha paaya ti nivasa hôôk-ato, de haay tatekin danggakook vu ham. ¹⁰ + o 4:10 Sin 3:6,13-16*Om nambêenja ham pin-ande Islel pin, ond ham oo anjak ni naambe omaahô-jô nivasa lak-ambe gêên naale hôôk ham amem lak Yesu Kalisi Nasalet haale, sen ham ayiis ak haah pako, lemu Anutu wiing-ambe kandi lak laah vu hil yimbin-atêêto. ¹¹ + o 4:11 Saam 118:22; Mat 21:42; 1Pi 2:4,7*Ond Yesuu-ju ‘tatuuh sen ham hil kul-

aso yoo nimbaya lôôt nambe ham-ame andaav bayêên ak-ato, lemu gêên tu bayêên ahelasu-te kook aniwêék.’ ¹² + o 4:12 Mat 1:21; Sin 5:34-35*Omaaho ti me-lukalaah nambe dôôvu yiyi e, de vu taaku pin ond Anutu me-taato omaaho ti haale vu yiyi nambêênja in nambe dôôvu

yiyi e, yik Yesu timu.”

¹³ Tombe kaansol-aso lavindis lôôt in Pita yuuh Jon danêel tanasin osin niwêék de yuuh-ame dayêênin e, tombe lalak ni nambe yuuh-ame vu hil tanasin-ate le, yuuh vu hil malis-ate, lemu lalak ni having nambe

bôôy yuuh dando having Yesu. ¹⁴ Tombe layi de omaaho vaha paayaa-to nivasa lak lung la be naale having yuuh, om silanêënd vakasin sen daanêel naah vu yuuh-ato ma. ¹⁵ Yik lanêel vu yuuh amu nambe yuuh gavuu kaansol-aso de lana voon, om yuuh lala de sil oo mondakaas in nambe, ¹⁶ + o 4:16 Jon 11:47*“Yale aambiing naambe vaati vu omaaho yuuh-anju? In hil Yelusalem pin layi nambe yuuh lawiing taahu taahu bopaata osin niwêék tii-ju, om yame aalohvu nambe yanjak alungg in e. ¹⁷ + o 4:17-19 Sin 5:28-29,40*Lemu vakasin-anjo le na nohvu hil pin, om yaambu kôôvu yuuh naambe yuuh-ame daanêel vakasin vu omaaho ti jak Yesu haale jesin

naah e.” ¹⁸ Tombe lateey yuuh lalom-ambe lavu kôôvu yuuh nambe yuuh-ame daanêel Yesu haale osin yuuh-ame taahu hil jak Yesu haale jesin naah e. ¹⁹ Le Pita yuuh Jon lanêel laah vu sil nambe, “Ham akam oo bu vêel e, naambe haay gangoyin ham lavam ond haay nanyengg doos vu

Anutu, tombe naambêênjo Anutu me-le ji nivasa le. ²⁰ Va sen haay aahe osin haay hango ond me-lohvu nambe haay anjak alungg in e, haay oo aawiingin nambe naanêel vakasin-anjo lôôt.”

²¹ Tombe kaansol-aso salo mopaatôôv in nambe lambu nivaane vu yuuh, lemu layi de hil pin lako Anutu haale lak in va sen yuuh lawiing-ato, om lavu kôôvu yuuh yesin laah, de lanêel-ambe yuuh lala. ²² De omaaho sen yuuh lawiing-ambe nivasa lak-ato ond yite ta doo-yuuh lung la.

Kalisi-te hil lalohak in nambe daanêel Anutu-te vakasin niwêêk

²³ Pita yuuh Jon lalaah lato vu yuuhate hil, tombe yuuh lanêel vakasin pin sen kul vaha sen datung salivangin-ato silate yêêv-aso osin himbop-aso lanêel vu yuuh-ato vu sil. ²⁴ + o 4:24 Eks 20:11; Nie 9:6; Saam 146:6*Tombe sil lango lung la, tonde sil pin alondpayo lavuh ti be lalohak vu Anutu nambe, “O Omaaho Bop, hong sen ohatung yendak osin ngaanggis, de lôôy osin va pin sen nando lohvu taaku pin-ato, ²⁵ + o 4:25-26 Saam 2:1-2*de gate Vavi Vaambuung wiing vakasin ti la vu heyate himbop bôôy Devit sen tu gate kul vahaa-to, ond Vavi Vaambuung nêel nambe,

‘Nambe vaati om hil vaalu sen sil-ame Yudaa-to ond ahend kalin-ambe davu daandun bopaata, de yate hil Islel ond kand navu vakasin malis amu? ²⁶ De hil lulemak-aso vu taaku pin osin yêêv bop-aso pin lasupin lalaam in nambe lanyis ngaamong ak Omaaho Bop gaving yite omaaho sen

yoo holin yi vulôôt in nambe dôôvu yiy-ato.'

²⁷ + o 4:27 Mat 27:1-2; Luk 23:7-11; Sin 3:13*“Keen lôôt, Helot ayuuh Pontias Pilata lav-ing hil vaalu osin hil Islel ond hil-anjo lasupin lalaam taakuu-jo in nambe lanyis ngaamong vu gate kul vaha omaaho vaambuung Yesu sen goo gaholin yii-to, ²⁸ + o 4:28 Sin 2:23*ond sil lasupin in nambe lanyis Yesu nohvu goo gakam vu niwêêk-ambe osamu lung la nambe nôôn jak-ato.

²⁹ + o 4:29 Ep 6:19*“O Omaaho Bop, gêên-anjo gakam bu vakasin sen lavu kôôvu hey-ato, be gandôôvu gate hil hey in hey naanêêl gate vakasin niwêêk lôôt, de hey-ame aanjêênin e. ³⁰ Otalo namam in biing-ambe hil anilakin nind vasa jak, de gandôôvu hey in hey aambiing taahu taahu osin niwêêk jak gate kul vaha omaaho vaambuung Yesu haale.”

³¹ + o 4:31 Sin 2:4*Lalohak lung la tonde bayêên sen lasupin-ambe dando hôôk-ato yêêy, tombe Vavi Vaambuung hôôvu sil pin, om sil lanêêl Anutu-te tanasin niwêêk lôôt de me-layêênin e.

Kalisi-te hil pin alondpayo lavuh ti

³² + o 4:32 Sin 2:44*Hil ngeeyaata sen lawii-having osin ahend having sil-ato ond londpayo lavuh ti pin, de va sen sil ti ti yoote vaa-to ond ti me-nêêlin yite vati nambe yoo yite va nivalok e, malis, va sen silate vaa-to ond yik sil pin-ate va. ³³ + o 4:33 Sin 2:47*Anutu vu niwêêk bopaata vu sinaale-so be sil tatekin va sen Omaaho Bop Yesu kandi lak laah-ato langaah lôôt, tombe hil pin layi

nambe Anutu-te samu samu bopaata nando having sil. ³⁴ + o 4:34 Sin 2:45*Tombe silate omaaho ti me-nativak in vati le, in dangga nambe lavu ngaanggis osin bayêên-ambe hil laanggo, de lako mone be ³⁵ lala lavu vu sinaale-so, tombe latiiy monêê-jo vu omaahonôôn vaalu sen silanêênd va yuuh ame ma de dativak-ato.

³⁶ + o 4:36 Sin 11:22-26; 13:2-3*De Liwi-te hil vu taamusin-ato ti baan Saiplas, haale nambe Yusep, de sinaale-so lanêêl haale ango nambe Banabas, haalêê-jo dangga nambe omaaho sen navu niwêêk, ³⁷ ond vu yite kul ti vu omaaho ti vaanggo de hako mone pin-ambe la vu vu sinaale-so.

5

Ananaias ayuuh Saapila-te vakasin

¹ De omaaho ti haale nambe Ananaias, de vane haale nambe Saapila, ond yuuh lavu yuuhate ngaanggis boow ti be hil laanggo, ² + o 5:2 Sin 4:34-35*tombe sim Ananaias vun mone sen yuuh lako lak ngaanggis-ato vaalu be vane yi, de hako vaalu be la vu vu sinaale-so. ³ + o 5:3 Jon 13:2*Tombe Pita nêêl vu nambe, “Ananaias, nambe vaati sen Saalang lukala galompayo be gavun mone vaalu? Gawiingin nambe tatuhin Vavi Vaambu-ung a? ⁴ Om naambe bôôy-ato gate ngaanggis oo nanjip, le ma de gavu be hil laanggo lung la, om naambe gate mone yoo mando. Le sim nambe vaati sen gakam oo vu vakasin nambêênja hôôk galompayo? Gambe otatuhin omaahonôôn a? Malis, manyinja otatuhin Anutu.” ⁵ + o 5:5 Sin 2:43*Ananaias hangoyin vakasin-anju tombe

lupake be yimb meta, tombe sim hil pin sen lango banyêê-to layêênin lôôt, ⁶ tombe maanggêêm-aso kandi be layum hôök tôomb, de laaku be lala lahaav.

⁷ De taaku mekaalus yaal lung la le mem Ananias vane valup, le doosin va sen tovu layaa-jôôto, ⁸ tombe yik Pita lingin nambe, “Onaanêêl vu sa le, naambe mone sen muuh hako lak ngaanggis-ato ond yik lung laa-jo?” Tombe Saapila liinggis nambe, “Êê-e, yik lung laa-ja.” ⁹ + o 5:9 1Ko 10:9*Om Pita nêêl vu nambe, “Nambe vaati sen malompayo lavuh tii-jo? Mawiingin nambe sahi Omaaho Bop-ate Vavi Vaambuung a? Om gangge le, hil sen lahaav layam-ato ond lalu-daale vinavii-ja in davu baaku hong-ambe lana.” ¹⁰ Om pavis atombe vêêh-anjôôto lupake be la yimb meta neep hôök Pita vaha, tombe hil sen lahaav layaa-to layi nambe yimb, om lalukala laaku be lala lahaav having laya. ¹¹ De hil bel-ate pin osin hil vaalu sen lango vakasin-anjo banyêê-to ond layêênin lôôt.

Sinaale-so dawiing taahu taahu ngeeyaata osin niwêêk bopaata

¹² + o 5:12 Sin 2:43; 14:3*Sinaale-so yoo mon-dawiing taahu taahu ngeeyaata osin niwêêk hôök hil lavuun, de hil pin sen lawii-having-ato ond londpayo lavuh ti be dasupin dala Anutu-te dumb bop alo ti sen danêêl haale nambe Solomon-atêeto. ¹³ Tombe hil vaalu dayêênin-ande medasupin having sil e, lemu hil dako sil haalend ak, ¹⁴ + o 5:14 Sin 2:41; 21:20*tombe moow ayuuh

vêêh ngeeyaata lôôt dawii-having Omaaho Bop-ambe dalukala having yite hil. ¹⁵ Om hil daaku hil anilakin-ambe lala dambe sil deep ak kaanye yuuh ame hôök mopaatôôv nanyendangga, in nambe Pita balu-na de taaku naambiiy jak yi be kanu mu jêês sil e mem nind vasa jak. ¹⁶ + o 5:16 Mak 6:56; Sin 19:11-12*De hil ngeeyaata vu taaku bo-bop sen neep ngaaho vu Yelusalem-ato, ond lako hil anilakin osin hil sen mamu nipaya nahôôvu sil-ato be lasupin lalaam timu vu sinaale-so be dawiiing-ambe sil anind vasa nahôök pin.

Angela vu vêêl sinaale-so in bayêên kalaambus

¹⁷ + o 5:17-18 Sin 4:1-3,6*Tombe sim kul vaha sen datung salivangin-ato silate yêêv bop osin hil pin sen dando having yii-to ond sil vu hil tanasin vaha ti sen danêêl sil nambe Sadusii-to, ond ahend anipaya vu sinaale-so lôôt, ¹⁸ om lalôôh sil-ambe latung sil lalukala kalaambus-ate bayêên bop. ¹⁹ + o 5:19 Sin 12:7-10*Lemu busin atombe Omaaho Bop-ate angela ti hatu hataahin vinavi de giyy sil-ambe lala voon, de nêêl nambe, ²⁰ “Ham ana baale Anutu-te dumb bop alo be ham naanêêl tanasin sen ham mando metumin-atêeto langaah pin vu hil.”

²¹ Sinaale-so lango vakasin-anju tombe sami-inaanôn lalukala dumb alo pavis-ambe lanêêl tanasin vu hil. Tombe yêêv bop salivangin-ate having yite hil, ond lateey Islel-ate kaansol-aso osin himbop-aso be lasupin lavuh ti pin, le mem lanêêl-ambe hil lala in nambe gako sinaale-so vu bayêên kalaambus naam. ²² Om ahevaavu-so

lala bayêên kalaambus-ambe layi sinaale-so, le ma de taaku malis. Tombe lalaah-ambe lanêêl nambe, ²³ “Hey ala hato bayêên kalaambus e laayiyi vinavi be niwêêk lôôt, de ahevaavu-so yoo daale danggin vinavi ti ti, tombe hey hataahin vinavi le omaaho ti me-nando hôôk bayêên alo le.” ²⁴ Tombe yêêv sen nanggin Anutu-te dumb bop-ato having yêêv salivangin-ate lango vakasin-anju be kand yu-yuuh lôôt nambe vaa-jo le naambe vaati. ²⁵ Le omaaho ti valup-ambe nêêl vu sil nambe, “Ham angge, hil sen ham hatung sil hôôk kalaambus-ato ond lala daale danêêl tanasin vu hil hôôk dumb alo ni.” ²⁶ + o 5:26 Mat 14:5*Tombe yêêv sen nanggin Anutu-te dumb bop-ato osin ahevaavu-so lala lako sinaale-so, lemu me-layiis sil e, malis, in yêêv-aso layêênin hil nambe le lanyiis sil lak tatuuh.

Sinaale-so me-layêênin kaansol-aso le, lanêêl vakasin langaah

²⁷ Lako sinaale-so lalaam-ambe lalaah sil daale kaansol-aso mend, de yêêv bop salivangin-ate nêêl vu sil nambe, ²⁸ + o 5:28 Sin 4:18; Mat 27:25*“Hey aavu kôôvu ham bôôy nambe hamame taahu hil jak omaahôô-ju haale le, le ma de hamate tanasin lohvu taaku Yelusalem pin, de ham awiingin tatuhin vakasin jak hey naambe hey oo aayiis omaahôô-ju.” ²⁹ + o 5:29 Sin 4:19*Lemu Pita having sinaale-so lanêêl laah vu sil nambe, “Yik hey oo gango Anutu lava mu kaluuh omaahonôôn lavand. ³⁰ + o 5:30 Sin 3:15*Yesu sen ham ayiis ak haah-ambe yimb-ato, ond yate himbop-aso bôôy silate Anutu wiing-ambe kandi lak. ³¹ + o 5:31 Sin 2:33-34; Ep 1:20;

Hiblu 2:10; 12:2*Tombe Anutu hako yi lak-ambe la nando nama vasa, be tu yate yêêv bop in nambe dôôvu yiyi osin biing-ambe yiyi Islel yaanggilin yalonggpayo na vu yi be mem kawiiy yate va nipaya na. ³² + o 5:32 Sin 1:8*Vakasin-anjo hey aahe osin hey hango, de Vavi Vaambuung sen Anutu navu vu hil sen nanyend vuun-ato hôôvu hey having, ondeey hey oo monaanêel tatekin.”

Gamaaliel vu kôôvu kaansol-aso

³³ + o 5:33 Sin 7:54*Kaansol-aso lango vakasin sen Pita nêel-anjo tombe kund sil alondpaya in nambe lanyis sinaale-so be lanjimb pavis. ³⁴ + o 5:34 Sin 22:3*Lemu kaansol-asôônjôôto ti haale nambe Gamaaliel, yi Palisai ti ond tu kaputung tanasin dangga ti sen omaahonôn pin dako yijju haale lak, ond kandi naale de nêel-ambe hil lako sinaale-so be lato lala voon vêel e ³⁵ mem nêel vu kaansol-aso nambe, “Ham Islel, ham awiingin nambe ambiing vati vu hil-anja, ond halingg-aso, ham akam bu nivasa le mem. ³⁶ + o 5:36 Sin 21:38*In bôôy ond Tiudas hatee yi lak in nambe naatu omaaho osin haale bop, tombe moow ngeeyaata lohvu 400 lawii-having yi, lemu gaaman layiis-ambe yimb, de hil pin sen lawii-having yii-to lavuuh taale, de silanêend kul nôôn ma. ³⁷ + o 5:37 Luk 2:1-2*De vu taamusin hôôk busin sen yêêv-aso navu kaavu hil haalend-ato, ond Yudas vu Galili hatee yi lak, om hako hil vaalu be lala in nambe lambiing ngaamong vu gaaman, le ma de layiis-ambe yimb having, de yite hil pin sen lawii-having yii-to lavuuh taale. ³⁸ Om gêên-anjo sa naanêel vu ham naambe ham

gavuuh hil-anja be lana, in naambe silate kul-anjo vu omaahonôôn akand ond le na paya, ³⁹ le naambe kul-anjo danggakook vu Anutu ond ham-ame alohvu nambe kawiiy e, in ham e naambe hil sen dayiis ngaamong vu Anutuu-to.”

Sinaale-so lapêêlis in lako nivaane lak Yesu haale

⁴⁰ + o 5:40 Sin 4:18*Tombe kaansol-asôônju lawii-having Gamaaliel-ate vakasin om lateey sinaale-so lalom-ambe laveek sil, de lavu kôôvu sil niwêék lôôt nambe me-daanêel tanasin jak Yesu haale jesin naah e, tonde lanêêl-ambe lato lala voon. ⁴¹ + o 5:41 Mat 5:10-12; 1Pi 4:13*Tombe sinaale-so lavuuh kaansol-aso de lala osin kand vasa lôôt, in Anutu yi nambe sil lalohvu om liinggis-ambe hil lawiing nindanjeen vu sil lak Yesu haale. ⁴² + o 5:42 Sin 9:22; 17:3*Tombe lak busin pin vu Anutu-te dumb bop alo de vu sil ambaand ond sil oo motaahu hil osin sil oo mondanêel Yesu Kalisi-te banye nivasa langaah.

6

Laholin hil namaavaalu be vindak yuuh in landôôvu sinaale-so

¹ + o 6:1 Sin 4:35*Yesu-te hil latu ngeeyaata lak, tombe vaalu sen dakaas lavand Glik-ato dayi vaalu sen dakaas lavand Hibluu-to paya lak busin pin sen datiiy va yuuh amêê-to nambe, “Ham akam nalingin heyânêéngg vahaahôôv-aso.” ² Om sinaale-so nomaayuuu-ambe laam yuuh-ato lateey Yesu-te hil pin lalaam, le mem lanêêl vu sil nambe, “Me-lohvu nambe hey oo monggatiy vanôôn-ande hey gavuuuh Anutu-te

vakasin e. ³ + o 6:3 1Ti 3:7*Om halingg-aso, ham anggolin hamate hil sen hil pin dayi sil anivasaa-to namaavaalu be vindak yuuh, ond hil sen Vavi Vaambuung hôôvu sil osin sil alundkook anivasa, be yiy gatung sil oo ganggin kul sil gatiy va yuuh ame nivalok, ⁴ de hey-anjo yoo monaanohak osin hey monanéel Anutu-te vakasin.” ⁵ + o 6:5 Sin 8:5*Tombe hil pin sen lasupin-anjôto lango vakasin-anjo be nivasa, om laholin Stiven in yoo wii-having niwêêk-ambe Vavi Vaambuung hôôvu yi, de laholin Pilip ayuuh Plokolas, de Naikena yuuh Timon, de Pamenas ayuuh Nikolas. Nikolas-anjo yi vu Antiok ond bôôy hilin lopayo be lukalaam having Yuda-so. ⁶ + o 6:6 Sin 13:3; 14:23*Tombe lalaah hil-anjo lala daale sinaale-so mend-ambe sinaale-so lalohak lung la, tonde lambe namand ak sil. ⁷ + o 6:7 Sin 2:41; 16:5*Ke, om Anutu-te tanasin tu ahepataas ak, tombe hil Yelusalem ngeeyaata latu Yesu-te hil, tonde yik kul vaha sen datang salivangin-ato ngeeyaata lawii-having.

Yuda lalôôh Stiven

⁸ + o 6:8 Sin 2:43*Stiven-anjo omaaho niwêêk bopaata osin samu samu danggakook, de nawing taahu taahu bopaata osin niwêêk-ambe hil dayi, ⁹ tombe hil vaalu kandi be sil o Stiven-aso lanéel sil in tanasin. Sil vaalu vu Sailini osin Aleksandlia, de sil danéel silate dumb nambe hil sen lavu vêel sil vêel in omaaho ango namand lung laa-to silate dumb. De sil vaalu vu Silisia osin Esia having. ¹⁰ + o 6:10 Luk 21:15*Om sil o Stiven-aso lanéel sil, le ma de Vavi Vaambuung

vu kakook anivasa vu Stiven om hil-ame lalohvu yite vakasin e. ¹¹ + o 6:11 Mat 26:59-61*Tombe lala lanêêl hôok hil vaalu ahend nambe daanêêl vakasin tatuhin jak yi naambe, “Hey hango de nêêl Mose yuuh Anutu pale.” ¹² Mondanêêl atombe vakasin-anju kund hil pin alondpayo, om himbop-aso tanasin dangga-so lala lalôoh Stiven, de sil laandiiy-ambe lala vu kaansol-aso, ¹³ + o 6:13 Jer 26:11*tombe lanêêl vu tatuhin ambu-so vaalu om lalaam-ambe lanêêl nambe, “Omaahôô-jo yoo monanêêl vakasin anipaya lak taaku vaambuung-anjo osin Mose-te tanasin, ¹⁴ de hey hangoyin nêêl nambe Yesu Nasalet e kawiiy dumb-anjo de gilin tanasin sen Mose vu vu yiiy-ato.” ¹⁵ Tombe kaansol-aso hil pin sen dandôô-juuto ond sil amend la vu Stiven niwêêk lôôt e layi de mekaalus lohvu angela me.

7

Stiven nêêl yite vakasin vu kaansol-aso

¹ Kul vaha sen datang salivangin-ato silate yêêv bop lingin Stiven nambe, “Vakasin-anju keen a?” ² + o 7:2-5 Jen 11:31–12:7*Tombe Stiven nêêl vu sil nambe, “Halingg-aso mangg-aso, ham gango sate vakasin e. Vu bôôy yate himbop Abalaam naahen nando Mesopotemia de me-la nando Halan e, tombe melangaah danggakook Anutu taato yi vu, ³ be nêêl vu yi nambe, ‘Onggavuuh gate taaku nanjip osin gate hil mando, de gana taaku ti soo le taato vu hong.’ ⁴ Tombe Abalaam havuuh hil Kaldia-te taaku de la nando Halan, tonde mangganaan yimb lung la le mem Anutu hakoseey

yi vuu-ju be lom nando taaku sen gêên ham nandô-jo. ⁵ + o 7:5 Jen 15:18; 17:8*De Anutu me-vu ngaanggis daka vu Abalaam in nambe yoo yinëên nivalok e, malis lôôt, lemu Anutu nêêl nambe taamusin e mem, le bu ngaanggis-anjo vu yi osin yite hil vu taamusin in naatu silate ngaanggis. Busin-anju Abalaam noow ma, de Anutu nêêl vakasin-anjo, ⁶ + o 7:6 Jen 15:13-14; Eks 12:40*ond nêêl nambe, 'Gate hil vu taamusin le lana mando hil bamaan-ate taaku, be daatu silate hil kul vaha malis amu, de lambiing nindanjeen vu sil lôôt nohvu

ta 400.' ⁷ + o 7:7 Eks 3:12*De Anutu nêêl having nambe, 'Hil sen lambiing nindanjeen vu sil-ato, ond sale aambu nyevahaan naatovu sil jung na le mem gate hil e lanom-anjo be lanohak vu sa vu taaku-jo.' ⁸ + o 7:8 Jen 17:9-14; 21:4*Tonde Anutu nêêl vu Abalaam nambe galaah unoopasiv anind naavi in taato naambe latu Anutu-te hil, om vu taamusin sen Abalaam hako noow Isak, tombe busin namaavaalu be vindak yaal lung la le mem halaah ninaavi. Isak-anju noow Yaakop, de Yaakop noow-aso ond yate danggakook-aso nomaayuuhambe laam yuuh, ⁹ + o 7:9 Jen 37:11,28; 39:1-3,21-23*tombe yate danggakook-asôonju londpayo nipaya vu Yusep om lala lavu be hil laanggo de lako be lala Ijip. Lemu Anutu nando having yi ¹⁰ + o 7:10 Jen 41:37-44; Saam 105:21*om vu vêêl yi in va nimeen pin, de samu yi tombe Ijip-ate omaaho lulemak Pelo yi nambe omaaho osin lukook anivasa, om holin yi be tu Ijip-ate yêêv bop osin hanggin Pelo-te bayêên ayuuh va pin.

¹¹ + o 7:11 Jen 41:54*“Tonde meep bopaata tovu Ijip osin taaku Kanaan pin, tombe yate himbop-asôônju dando meep-ande vanôôn ma, om latovu nimeen bopaata. ¹² + o 7:12 Jen 42:1-5*Lemu Yaakop hango banye nambe vanôôn nando Ijip, om nêêl-ambe yate himbop-asôônju lala nyendoos. ¹³ + o 7:13 Jen 45:1-4,16*“Tonde lalaah balon ango yesin atombe Yusep nêêl yi langaah vu halindin, tombe mem Pelo lak Yusep-ate halindin anind. ¹⁴ + o 7:14 Jen 45:9-11; 46:27*De Yusep nêêl vakasin la vu mangganaan Yaakop nambe gaving yite hil pin-ambe lanaam vu yi, ond hil-anju pin lohvu 75. ¹⁵ + o 7:15 Jen 46:1-7; 49:33*Yaakop la hato nando Ijip vêêl e mem yimb, de yate himbop-asôônju layimb having, ¹⁶ + o 7:16 Jen 23:2-20; 33:19; Jos 24:32*tombe laaku sil anind naavi be lalaah lambe neep hôôk lavandangga vu Sekem sen bôôy Abalaam vaanggo lak mone vu Hemo noondin-aso vu Sekem-ato.

¹⁷ + o 7:17-18 Eks 1:7-8*“Tonde busin sen Anutu navu biing vakasin sen nêêl vu Abalaam bôôy-ato nôôn jak nambe, ‘Gate hil vu taamusin le lanom-anjo be lanohak vu sa vu taaku-jo’ ond ngaaho lak, de hil Islel datu ngeeyaata nalak vu taaku Ijip-ambe ¹⁸ tok laam busin sen lulemak ti yoo nindoos lukalaah-ambe hanggin taaku Ijip-ato. Lulemak tii-ju doosin Yusep-ate dangga, ¹⁹ + o 7:19 Eks 1:10-22*om tatuhin yate hil-ande nawiing nindanjeen vu sil nambe sil gaate noondin kaangêëndak na taavêêt alo be lanjimb. ²⁰ + o 7:20 Hiblu 11:23; Eks 2:2*De Mose tangganaan hako yi, tombe yi nambe yoo nivasa lôôt, om yoo mondanggin hôôk bayêên alo lohvu kwaav

yaal, ²¹ + o 7:21 Eks 2:3-10*tonde mem lala lambe neep hôök bel nanyendangga, tombe sim Pelo nowaavêêh hako yi be la vaat tu noow-ambe bop ak. ²² Tombe sil taahu Mose hôök hil Ijip-ate kakook anivasa pin, be tu omaaho nanêêl vakasin osin nawiing kul aniwêêk.

²³ “Mose-te ta doo-yuuh lung la, tombe ka vu nambe na ji yite halindin-aso Islel. ²⁴ + o 7:24-29 Eks 2:11-15,21-22*Tombe sim yi de Ijip ti nawiing nindanjeen vu Islel ti, om hôôvu Islel-ambe vu nyevahaan vu Ijip tii-ju de yiis-ambe yimb. ²⁵ Tombe ka vu nambe yite hil lalak ni nambe Anutu holin yi lung la in dôôvu sil, le ma de sil doosin. ²⁶ Tonde samiinaanôôn atombe Mose laah valup e yi de omaaho yuuh mondayiis yuuh, tombe wiingin nambe bu mamaal vu yuuh om nêel vu yuuh nambe, ‘Maayuuh, muuh halim dangga timu, le nambe tana mawiingin ambiing muuh paya?’ ²⁷ Lemu omaaho sen yoo wiing ngaamong munggin vu halii-to, ond vakôôh Mose la de nêel vu nambe, ‘Lati hatung hong in nambe onaatu yêêv-ambe ongganggin hey?’ ²⁸ Mak gawingin nambe ganyiis sa naambe vasêên gayiis Ijip tii-to?’ ²⁹ + o 7:29 Eks 18:3-4*Nêel nambêênju tombe Mose pak-ambe la tu bamaan nando hil Midian-ate taaku, tombe hako vêêh-ambe hako noow moow yuuh vuu-ju.

³⁰ + o 7:30-35 Eks 3:1-10*“Nando ta doo-yuuh vu Midian lung la, tombe sim busin ti la taaku lumbalaamb ngaaho vu kandu Sinai, tombe angela ti la hato vu hôök kin mala, ond kin-anju natum hôök haah aniyin ti. ³¹ Mose yi kin-

anju tombe vindis lôôt, om la ngaaho in nambe ji nivasa, le sim Omaaho Bop lava laam vu yi nambe, ³² ‘Gate himbop-aso bôôy silate Anutu sa. Abalaam ayuuh Isak-ande Yaakop yaalate Anutu sa.’ Tombe Mose hees-ande yêênin lôôt nambe me-ji le, ³³ le Omaaho Bop nêêl vu nambe, ‘Okavaayin suul na in taaku sen onaalêê-ja ond taaku vaambuung. ³⁴ Saahe davu nivaane lôôt vu sate hil sen dando Ijip-ato, de sa hango silate susin lung la, om saalukalaam in saambu vêêl sil in nimeen-anju, om saambe gana Ijip.’

³⁵ “Mosêê-jo ond bôôy sil mahôôh yi nambe, ‘Lati hatung hong in nambe onaatu yêêv-ambe ongganggin hey?’ Ond omaahôô-ju Anutu wiing angela la hatu vu yi hôôk haah aniyin alôô-to, tombe angela wiing-ambe la lohvu yêêv bop osin omaaho sen dôôvu hil-ato. ³⁶ + o 7:36 Eks 7:3; 14:21; Nam 14:33*Mose giyy sil-ambe lala de wiing taahu taahu bopaata osin niwêêk vaha vaha vu Ijip de vu Lôôy Hees, tonde vu taaku lumbalaamb lohvu ta doo-yuuh. ³⁷ + o 7:37 Sin 3:22*Mosêê-ju ond yik nêêl vu hil Islel nambe, ‘Anutu yoo le golin ham o halim-aso ti naatu hamate omaaho ti in naanêêl Anutu-te vakasin langaah naambe sen holin saa-to.’

³⁸ + o 7:38 Eks 19:3; Diu 5:5; 9:10; Sin 7:53*Mosêê-ju ond yik nando having hil Islel vu taaku lumbalaamb. Nando having yate himbop-aso bôôy de angela sen nêêl vakasin vu yi vu kandu Sinaii-to, ond hako Anutu-te vakasin metumin-ate be vu vu yiyy. ³⁹ + o 7:39 Nam 14:3*Lemu yate himbop-aso bôôy nind baya nambe sil-ame gango lava le, malis. Sil kalêêh

lava de lahilin londpayo laah vu Ijip, ⁴⁰ + o 7:40-41 Eks 32:1-6,23*de lanêêl vu Aalon nambe, ‘Osamu heyate anutu heey in daanggiy hey, in Mose sen giyy hey vu Ijip-ambe hey alaam-anjôoto, ond hey doosin mak vaati wiing.’ ⁴¹ Om lanêêl atombe sil samu kao noow ti kanu, be latung salivangin osin lapêêlis vu silate anutu tatuhin vaha sen sil oo samu lak namand-anjuuto. ⁴² + o 7:42 Jer 19:13; Emo 5:25-27*Tombe Anutu haluuh dami vu sil, de hilin sil alondpayo la vu taaku mekaalus ayuuh kwaav-ande matam-ambe mondalohak vu, lohvu Anutu-te vakasin sen hil lanêêl langaah bôôy-ambe neep hôok kaapiya nambe,

‘Ham Islel, vu bôôy ham nando taaku lumbalaamb lohvu ta doo-yuuh, de ham ayiis kao osin bik sipsip-ambe ham hatung salivangin. Mak ham awiing vaa-ju vu sa? Malis. ⁴³ De anutu tatuhin vaha sen haale nambe Molok-ato ond ham vaaku yite dumb sel having anutu tatuhin vaha Lepad-ate matam kanu be va kanuu-ju ham samu be ham alohak vu, om sale gakoseey ham ana mando dinaandiin na Babilon vaalu.’

⁴⁴ + o 7:44 Eks 25:40*“De Anutu-te dumb sel sen nando hôok yate himbop-aso lavuun bôôy vu taaku lumbalaamb-ato, ond taato nambe Anutu nando having sil. Dumb-anjo Anutu nêel vu Mose, tombe yik sil samu lohvu sen Mose yi kanuu-to. ⁴⁵ + o 7:45 Jos 3:14-17; 18:1; 23:9*Dumb sel-anju yate himbop-aso vu taamusin lako lak-ambe lala having Yosua be lala lako hil bamaan-ate taaku, de Anutu hatiiy hil bamaan-anju lala vêel in sil, de latung dumb sel-anju nando be tok

laam Devit-ate busin having. ⁴⁶ + o 7:46 2Sml 7:1-16; Saam 132:1-5*Tombe Anutu yi Devit anivasa, om Devit kataangg Anutu in nambe jiinggis e mem le daav bayêên ti vu Yaakop-ate Anutuu-ju, ⁴⁷ + o 7:47 1King 6:1,14*le ma de Solomon haav.

⁴⁸ “Lemu Anutu baandoni me-nando hôôk bayêên sen omaahonôn dahaav ak namand-ato le, lohvu omaaho ti nêel Anutu-te vakasin langaah nambe,

⁴⁹ + o 7:49-50 Ais 66:1-2*“Omaaho Bop nêel nambe, “Baandoni ond sate sia, de ngaanggis ond sa vahangg-ate in jambaale. Ham awiingin nambe andaav bayêên nambe vaati vu sa? De sa baangg sen sa sawaah-ato nando tana? ⁵⁰ Mak sa namangg-ame yoo samu va pin-anja le?” ’

⁵¹ + o 7:51 Eks 32:9; Jer 9:26; Ais 63:10*“Ham alumkook aniwêêk, de ham alompayo mekanu osin ham nanyem doos. Ham oo monatiiy Vavi Vaambuung nalak busin pin, om ham alohvu hamate himbop-aso bôôy. ⁵² + o 7:52 2Kro 36:16; Mat 23:31*Hil sen danêel Anutu-te vakasin langaah-ato ond ti tana nando bôôy-ambe hamate himbop-aso me-lawiing nindanjeen vu le? Malis. Hil sen danêel vakasin langaah nambe Omaaho Nivalok e naam-ato ond hamate himbop-aso bôôy layiis sil-ambe layimb, om

gêên ham oo anêel yi langaah vu hil-ambe layiis-ambe yimb. ⁵³ + o 7:53 Sin 7:38; Gal 3:19; Hîblu 2:2*De ham-anjo ham hako tanasin vu angela-so, le ma de ham-ame samu le.”

Layiis Stiven ak tatuuh-ambe yimb

⁵⁴ + o 7:54 Sin 5:33*Lango vakasin-anju be kund sil alondpayo, tombe sil langa navund vu Stiven. ⁵⁵ + o 7:55 Mat 22:44; Sin 2:33-34; 5:31*Le Vavi Vaambuung hôovu Stiven om valaah me lak baandoni, tombe yi Anutu-te nikaapulis osin yi Yesu naale Anutu nama vasa. ⁵⁶ + o 7:56 Kol 3:1*Tombe Stiven nêel nambe, “Ham hile, saahe baandoni hataahin-ande Omaahonôn Noow naale Anutu nama vasa.” ⁵⁷ Tombe lawiing lavand bopaata lôôt osin sil lavu jeen sil nanyend, de sil pavis-ambe lambuuh Stiven tatup, ⁵⁸ + o 7:58 Sin 22:20*de lakôôh-ambe la taaku nanyendangga in nambe lanyiis ak tatuuh-ambe jimb. De hil sen tatuhin vakasin lak yii-to, ond lakaah silate lolop-ambe lala latung hôôk maanggêem ti haale nambe Saul vaha. ⁵⁹ + o 7:59 Saam 31:5; Luk 23:46*Tonde sil tanga Stiven lak tatuuh lôôt, de Stiven kataangg nambe, “Omaaho Bop Yesu, onggako sa kanungg naas.” ⁶⁰ + o 7:60 Luk 23:34*Tonde hatung kaatu be nêel bopaata lôôt nambe, “Omaaho Bop, game gambu hôôk silate nipaya nyevahaan e.” Nêel nambêenju tonde yimb la.

8

Saul nawiiing nindanjeen vu hil bel-ate

¹ + o 8:1 Sin 7:58; 8:4; 11:19*Saul yi nivasa in layiis Stiven-ambe yimb. Tombe hôôk busin-anju hil mondawiing nindanjeen vu hil bel-ate sen dando Yelusalem-ato, om hil bel pin lapak-ambe lavuuh taale lohvu Yudia osin Samaalia-te taaku pin, de sinaale-so yoo daahen dando Yelusalem.

² Hil anivasa vaalu sen kand navu sapa Anutuuto ond lahaav Stiven-ande lasu bopaata lak yi, ³ + o 8:3 Sin 9:1,13; 22:4; 26:9-11*tonde Saul mon-awiing nindanjeen vu hil bel-ate pin. Nalukala bayêên alo pin-ambe naandiiy moow ayuuh vêêh danjeen-ambe la natung sil hôök kalaambus.

Lanêêl banye nivasa vu Samaalia

⁴ Hil pin sen lapak-ambe lavuuh taalêê-to ond latup hôök-ambe lanêêl banye nivasa langaah. ⁵ + o 8:5 Sin 6:5*Tombe Pilip la hato Samaalia-te taaku ti be nêêl Kalisi haale langaah vu sil. ⁶ Tombe hil ngeeyaata lôôt lango Pilip-ate vakasin, de layi taahu taahu niwêêk vaha vaha sen wiing-ato, be lawii-having yite vakasin osin londpayo timu. ⁷ + o 8:7 Mat 10:1; Mak 16:17*Tonde hil ngeeyaata sen mamu nipaya nahôôvu sil-ato, ond mamuu-ju dawiing lavand bopaata be lato dala, de hil ngeeyaata sen kook navu tasiis osin vahand anipayaa-to sil anind vasa nahôök laah, ⁸ tombe hil sen dando taakuujuuto londpayo nivasa lôôt.

⁹ De omaaho lôômb ti nando taaku Samaalia haale nambe Simon, ond yoo nako yi lak nambe yi omaaho bopaata. Tombe hil pin lavindis in yite kul, ¹⁰ hil malis osin hil yêêv pin lawii-having Simon-ate vakasin-ambe lanêêl nambe, “Omaahôô-jo Anutu-te niwêêk, danêêl nambe niwêêk bopaata.” ¹¹ Ond lavindis in yite kul mamu lôômb sen yoo nawiing boyambôôy-ato ondeey lawii-having lava. ¹² Lemu Pilip nêêl va sen Anutu nanggin yite hil-ato osin Yesu Kalisi banye

langaah vu sil, tombe moow ayuuh vêêh lawii-having-ambe lalipis bel. ¹³ Tonde yik Simon wii-having-ambe lipis bel lung la le mem taamuyin Pilip. Om Simon yi de Pilip wiing taahu taahu vaha vaha osin niwêêk bopaata, tombe vindis lôôt. ¹⁴ De sinaale-so vu Yelusalem ond lango banye nambe hil Samaalia lako Anutu-te tanasin ak, om lawiing Pita yuuh Jon lala vu sil.

¹⁵ Yuuh latok lala be yuuh lalohak in hil-anju nambe Vavi Vaambuung jakana sil, ¹⁶ in Vavi Vaambuung-ame lakala sil e, de lalipis bel lak Omaaho Bop Yesu haale mu. ¹⁷ + o 8:17 Sin 19:6*Om sinaale yuuh lambe namand ak sil atombe mem Vavi Vaambuung lakala sil. ¹⁸ Tombe Simon yi de sinaale yuuh lambe namand ak sil-ambe Vavi Vaambuung lakala sil, om hako mone be la vu yuuh ¹⁹ be nêêl nambe, “Mambu va niwêêk-anja vu sa gaving in naambe sa gambe namangg jak hil ond Vavi Vaambuung jakana sil.” ²⁰ Le Pita nêêl vu nambe, “Gambe ombaanggo Anutu-te samu samuu-jo jak mone, om gana menama osin gate mone. ²¹ + o 8:21 Saam 78:37*Vaa-jo game gate va le, malis lôôt. Anutu yi nambe galompayo me-nivalok e, ²² om ganggilin galompayo de onggaluuh damim vu gate va nipaya, de okataangg vu Omaaho Bop in kawiiy va sen galompayo yoo wiingin-ato na. ²³ + o 8:23 Hiblu 12:15*Saahe de galompayo nikalin lôôt de gate va nipaya duuh hong tatin.” ²⁴ Tombe Simon nêêl laah nambe, “Manohak na vu Omaaho Bop naambe va sen manêêl-anjaato me-naatovu sa le.”

²⁵ Sinaale yuuh lanêêl Omaaho Bop-ate vakasin

langaah lung la, tonde yuuh lala in nambe lanaah Yelusalem, tombe sim yuuh lanêel banye ni-vasa langaah vu Samaalia-te taaku ngeeyaata vu mopaatôôv.

Pilip nêel tanasin vu yêêv Itiopia ti

²⁶ Omaaho Bop-ate angela ti nêel vu Pilip nambe, “Okandi lak-ambe gana gato mop lavuun sen vu Yelusalem-ambe la hato Gasaa-to.” Mopaatôôv-anju ond taaku lumbalaamb. ²⁷ + o 8:27 Ais 56:3-7*Om Pilip kandi lak-ambe la, tombe yi de Itiopia ti hato, ond hil Itiopia-te kwin Kandesi yite yêêv bop sen nanggin yite kupak pin-ato, ond la lohak vu Yelusalem lung la, ²⁸ tonde hato laah in na, tombe monasevin omaaho sen nanêel Anutu-te vakasin langaah-ato Yesaia-te vakasin lakando pêêt sen hôôs

naandiiy-ato. ²⁹ Om Vavi Vaambuung nêel vu Pilip nambe, “Gana ngaaho vu omaahôô-ju be mana.” ³⁰ Tombe Pilip hatup-ambe la ngaaho vu, le hango de nasevin Yesaia-te vakasin, om lingin nambe, “Vakasin sen onasevin-anja, ond galak danggakook ani me malis?” ³¹ + o 8:31 Jon 16:13*Le omaahôô-ju nêel laah vu nambe, “Sa jak ni in lati naanêel vu sa? Omaaho ti naanêel tatekin vu sa ond mem.” Om nêel nambe Pilip jakana mando gaving yi.

³² + o 8:32 Ais 53:7-8*Ke, omaahôô-ju nasevin Anutu-te vakasin boow ti neep hôôk kaapiya nambe,

“Langgiyy yi be lala lohvu bik sipsip sen davu lanyiiis-ambe jimb-ato, de lohvu bik sipsip

noow sen daving nivalus-ande me-nasuu-to, ond omaahôô-ju me-vakaas e. ³³ Tombe laanggôôl yi lôôt de me-lanêêl vakasin anivasa ti lak yi le. De yite hil moos dando tana in nambe yiy naanêêl sil langaah? Malis, in havuuh ngaanggis voon-anjo de la.”

³⁴ Tombe yêêv tii-jôôto lingin Pilip nambe, “Otakekin vu sa le, naambe Yesaia nêêl vakasin-anjo ond yoo nêêl lak yi me nêêl lak omaaho ango?” ³⁵ Om Pilip nêêl vakasin-anjo be tatekin Yesu-te banye nivasa langaah vu yi, ³⁶ + o 8:36 Sin 10:47*de yuuh mondala be lala lato bel ti, tombe yêêv tii-jôôto nêêl nambe, “Angge, bel neep-anjo. Lohvu nambe ganjipis sa pavis me malis?” ³⁷ [Tombe Pilip nêêl vu nambe, “Galompayo wii-having keen lôôt ond hoow-o.” Le nêêl laah vu nambe, “Saawii-having nambe Yesu Kalisi yi Anutu Noow.”] ³⁸ Tonde nêêl vu yite omaaho sen nando having yii-to be puvu hees tatin-ande hôôs naale, tonde yuuh Pilip laluu-sambe lalukala daale hôôk bel, tombe mem Pilip lipis yi. ³⁹ + o 8:39 1King 18:12*Tonde yuuh vu belalu be lalakalaah atombe Omaaho Bop-ate Vavi Vaambuung vu vêêl Pilip la pavis, de yêêv-anjôôto me-yi Pilip yesin laah e, om la osin lopayo nivasa lôôt. ⁴⁰ + o 8:40 Sin 21:8*Tonde Pilip yi nambe la hatu Asdot, tombe nêêl banye nivasa langaah lohvu taaku pin-ambe tok la Sisalia.

9

*Yesu hilin Saul alopayo
(Sinaale 22:4-16; 26:9-18)*

¹ + o 9:1 Sin 8:3*Saul nêêl niwêêk lôôt nambe biing nindanjeen vu Omaaho Bop-ate hil de nyiis sil-ambe lanjimb, om la vu kul vaha sen datung salivangin-ato silate yêêv bop, ² be nêêl vu nambe kaavu kaapiya na nohvu hil Yuda-te dumb ti ti vu Damaskas naambe, “Saul naatovu moow ayuuh vêêh sen lawii-having Yesu-te tanasin-ato, ond talu sil-ambe gako na Yelusalem.” ³ Om Saul mon-ala be la valup ngaaho vu Damaskas, tombe sim pavis atombe kin ti tum vu baandoni be têtêlang ak yi, ⁴ tombe Saul lupake be la neep voon, tonde hango lava ti laam vu yi nambe, “Saul, nambe vaati sen goo monawiing nindanjeen vu saa-jo?” ⁵ + o 9:5 Sin 5:39; 1Ko 15:8*Tombe Saul lingin nambe, “Omaaho Bop, olati?” Le nêêl nambe, “Sa Yesu sen goo monawiing nindanjeen vu saa-jo. ⁶ Om okandi be gana bayêên e mem le daanêêl va sen gambiing-ato langaah vu hong.” ⁷ Hil sen laving Saul-ato, ond lango lavaa-ju lemu me-layi omaaho ti le, om lavand ma de yoo daale. ⁸ Tombe Saul kandi naale le ma de mekanu hôôk lôôt, om sil laliv namand hôôk-ambe lala Damaskas, ⁹ tombe nandôô-ju lohvu busin yaal osin mekanu, de me-ya vanôôn ayuuh me-num bel e.

¹⁰ Tonde Yesu-te omaaho ti nando Damaskas haale nambe Ananias, ond nando le yi taahu taahu ti, de Omaaho Bop nêêl vu nambe, “Ananias.” Tombe liinggis nambe, “Omaaho Bop, saa-jo.” ¹¹ + o 9:11 Sin 21:39*Tombe Omaaho Bop nêêl vu nambe, “Okandi jak-ambe gana mopaatôôv sen danêêl nambe Nivalok-ato, tombe onaatovu hil Taasas ti haale nambe Saul, ond monalohak nando hôôk Yudas-ate bayêên, ¹² de yi taahu

taahu ti de omaaho ti haale nambe Ananias lukalaam umakalo be hambe nama lak yi in nambe me naatum naah.” ¹³ + o 9:13 Sin 8:3*Le Ananias nêêl nambe, “Omaaho Bop, sa hango de hil ngeeyaata danêêl nambe omaahôô-ju nawiling nindanjeen lôôt vu gate hil vu Yelusalem, ¹⁴ + o 9:14 Sin 9:1-2,21; 1Ko 1:2*tonde yêêv-aso salivangin-ate lanêêl lung la nambe yoo talu hil pin sen lavand nahôok ohaalem vuu-jôôto.” ¹⁵ + o 9:15 Sin 25:13,23; 27:24; Lom 1:5*Lemu Omaaho Bop nêêl vu nambe, “Gana. Saaholin yi be tu sate hil kul vaha lung la in gako sa haalengg na vu omaahonôn pin, de vu lulemak-aso osin hil Islel gaving. ¹⁶ + o 9:16 2Ko 11:23-28*De nimeen pin sen naatovu yi jak sa haalengg-ato ond soo le naanêêl taato vu yi.” ¹⁷ Om Ananias kandi be la hato lukala bayêên alo, tombe hambe nama lak Saul de nêêl vu nambe, “Hali Saul-e, Omaaho Bop Yesu sen taato yi langaah vu hong vu mop lavuunato, ond nêêl-ambe sa laam in nambe gamem naatum naah, de Vavi Vaambuung e naam dôôvu hong.” ¹⁸ Om pavis atombe va sen nando hôok Saul amêê-to lumbin nambe paahuung anikapisato, tonde

Saul ame tum laah, tombe kandi lak-ambe lipis bel lak Yesu haale, ¹⁹ de ya vanôn-ambe sake lukalaah.

Saul nêêl banye nivasa langaah vu Damaskas

Saul nando having Yesu-te hil vu Damaskas-anju busin heey, ²⁰ ond pavis-ambe nêêl Yesu-te banye nivasa langaah hatup hôok hil Yuda-te dumb ti ti nambe, “Yesuu-ju ond Anutu Noow yi.” ²¹ + o 9:21 Sin 8:3; 26:10*Tombe hil vaalu sen

lango yite vakasin-anjuuto sil pin lavindis lôôt, de lanêêl nambe, “Ayêê, omaahôô-ja nayiis hil sen lavand nahôôk Yesu haale vu Yelusalem-ato, ond laam in naanduuh hil vuu-jo de gako sil lana vu yêêv-aso salivangin-ate, le mak nambe vaatii-jo?”
²² + o 9:22 Sin 17:3; 18:5,28* Lemu Saul-ate niwêêk tu bopaata lak, om nêêl taato vu sil nambe Yesuu-ju yi omaaho sen Anutu yoo holin yi vulôôt-ato keen, tombe hil Yuda sen dando Damaskas-ato lango yite vakasin-anju, tombe silanêênd vakasin sen daanêêl naah vuu-to ma.

Hil Yuda ahend kalin vu Saul om pak

²³ + o 9:23 Sin 23:12* Tombe busin ngeeyaata la lung la, le mem hil Yuda lasupin-ambe lanjôôy vakasin nambe lanyiis Saul-ambe jimb. ²⁴ Saul hango silate vakasin-anju banye nambe hil Yuda dambuuh mop avi lohvu taaku pin hôôk busin-ande langaah in nambe lanyiis-ambe jimb, ²⁵ + o 9:25 2Ko 11:32-33* om Saul-ate hil sen dando having yii-to lako yi hôôk busin-ambe lalakala kaatum alu baandoni, tombe latung lukala nando hôôk jaambang bopaata ti, le mem sil taaluuhin yi la voon-ambe la.

Saul la nando Yelusalem

²⁶ + o 9:26 Gal 1:17-19* Saul la hato Yelusalem-ambe wiingin nambe na mando gaving Yesu-te hil, le sil pin layêênin Saul lôôt in me-lawii-having nambe Yesu-te omaaho yi le. ²⁷ + o 9:27 Sin 9:4,20; 1Ko 9:1; 15:8* Lemu Banabas giyy-ambe yuuh lala vu sinaale-so, de hatulin vakasin sen Saul yi Omaaho Bop vu mop lavuun-ambe Omaaho Bop vakaas vu yii-to, osin nêêl vakasin sen Saul

nêêl Yesu haale langaah vu hil vu Damaskas-
 ande me-yêênin-ato le. ²⁸ Saul nando having sil
 vu Yelusalem, ond yoo nêêl tanasin lak Omaaho
 Bop haale niwêêk lôôt de me-yêênin e. ²⁹ Tonde
 having Yuda vaalu sen dakaas Glik lavand-ato,
 ond sil papenggin sil in tanasin, tombe sim hil-
 anju lawiingin nambe lanyiis Saul-ambe jimb.
³⁰ + o 9:30 Sin 11:25; Gal 1:21*Le sim Omaaho Bop-
 ate hil langoyin banye tombe langgiy Saul-ambe
 lala Sisalia, le mem lawiing yi vuu-ju be la Taasas.
³¹ Tombe mem hil bel-ate vu Yudia yuuh Galili, de
 taaku Samaalia pin, dando nivasa de ngaamong
 ayuuh ame ma. Layêênin sil vu Omaaho Bop de
 Vavi Vaambuung vu niwêêk vu sil, tombe mem hil
 bel-ate latu ngeeyaata lak lôôt.

Pita wiing-ambe Inias anivasa lak

³² Pita monatup hôôk lohvu taaku pin-ambe la
 hatu vu Omaaho Bop-ate hil sen dando Lidaa-
 to, ³³ tombe sim tovu omaaho ti haale nambe
 Inias vuu-ju, ond kook tasiis-ande yoo neep hôôk
 bayêên alo lohvu ta namaavaalu be vindak yaal
 lung la. ³⁴ Tombe Pita nêêl vu nambe, “Inias,
 gêên Yesu Kalisi wiing-ambe ganim vasa lak,
 om okandi jak-ambe goo gatongin gate kaanye.”
 Tombe kandi lak pavi-vasa. ³⁵ Tombe hil Lida osin
 hil vu Salon pin layi be lahilin londpayo la vu
 Omaaho Bop.

Pita wiing-ambe Tabita kandi lak laah

³⁶ Vêêh ti wii-having Yesu nando Jopa haale
 nambe Tabita, Glik lavand nambe Dokas, ond
 lak busin pin yoo navu samu hil, de nahôôvu
 hil sen dativak in va yuuh amêê-to. ³⁷ Tombe

sim busin ti tombe nilak-ambe yimb, om lalipis ninaavi de lambe lakala neep ak bayêên alo ango baandonii-to. ³⁸ Tonde Yesu-te hil langoyin nambe Pita nando Lida sen neep ngaaho vu taaku Jopaa-to, om lawiing omaaho yuuh lala vu be yuuh kataangg yi nambe, “Ganaam pavis vu hey e.” ³⁹ Om Pita kandi lak-ambe la having yuuh. La hato tombe lako yi be lalakala bayêên alo baandoni, tombe vahaahôôv-aso pin lako lolop ayuuh ame sen Dokas nando having sil bôôy-ambe duuh-ato, ond sil taato vu Pita de lasu lak yi. ⁴⁰ + o 9:40 Mak 5:40-41*Tombe Pita hatiiy hil pin lala voon, de hatung kaatu be lohak, tonde hilin laah vu omaahonôôn yimbin-ato be nêêl nambe, “Tabita, okandi.” Tombe vêêh-anjuuto me tum-ambe yi Pita de kandi nando, ⁴¹ tombe Pita laandiiy hôôk nama be kandi naale, de teey vahaahôôv-aso osin Omaaho Bop-ate hil pin lalaam-ambe taato vu sil nambe Dokas ame tum laah. ⁴² Tombe hil Jopa pin lango vakasin-anjôôto banye, om hil ngeeyaata lawii-having Omaaho Bop. ⁴³ + o 9:43 Sin 10:6*Tombe Pita nando Jopa busin ngeeyaata having omaaho ti haale nambe Simon sen nawiing kul bik naavii-to.

10

Angela nêêl vakasin vu Konilias

¹ + o 10:1 Mat 8:5; Sin 27:1,3*Hil Lom ti nando Sisalia haale nambe Konilias, ond tu hil ngaamong vaha doo-nomaayuuh-ate yêêv sen danêêl sil nambe Itaalii-to. ² Ond omaahôô-ju having yite hil-ambe dayêênin Anutu, tonde yoo ka navu

Anutu be nalohak lak busin pin, de nahôôvu hil Yuda sen dativak in va yuuh amêê-to. ³ + o 10:3 Sin 3:1*Tombe busin ti hôôk taaku me yaal, ond omaahôô-ju nando le yi taahu taahu ti, de Anutu-te angela ti lukalaam-ambe taato yi langaah, be nêel vu nambe, “Konilias.” ⁴ Tombe Konilias yi be yêenin lôôt tombe nêel nambe, “Omaaho Bop, nambe vaati?” Tombe angela nêel nambe, “Gate lohakin osin samu samu sen onahôôvu hil sen dativak in va yuuh amêê-to, ond vaa-ju banye tok laam-ambe Anutu ka navu nando. ⁵ Om peey gambiing-ambe hil lana gako omaaho ti haale nambe Simon, de haale ango nambe Pita, vu Jopa be naam. ⁶ + o 10:6 Sin 9:43*Omaahôô-ju la nando having lengo Simon sen nawiing kul bik naavii-to, ond yite bayêên nando ngaaho vu lôôy nanyendangga.” ⁷ Angela nêel vakasin vu Konilias lung la de la, le mem Konilias teey yite kul vaha yuuh laving hil ngaamong vaha ti sen yoo ka navu Anutu be nando having Konilias lak busin pin-ato, ⁸ tombe Konilias nêel vakasin-anju tatekin vu yaal lung la le mem wiing yaal lala Jopa.

Pita yi taahu taahu ti

⁹ Tombe omaaho yaal-anjuuto mondala be lala deep mop lavuun, de langaah ak e mem yaal lala be latok lala bayêên Jopa. De taaku me laam naale lavuun, tombe Pita lakala bayêên alu baandoni in nohak. ¹⁰ Tombe yimb ahe be wiingin nambe ja vanôôn, le daahen dayêêh yite vanôôn, tonde sim Pita yi taahu taahu ti, ¹¹ + o

10:11 Sin 11:5-17*ond yi de baandoni hataahin-ande vati nambe sen tôomb bopaata ti luus-ambe nalaam, ond landuuh hôök nanyendanga yumbeyuuh de sil taaluuhin-ambe nalaam von, ¹² tombe vahivak vaha vaha sen naale nala de nahaavak osin manak pin nando hôök tôomb-anju lopayo. ¹³ Tombe lava ti laam nambe, “Pita, okandi be ganyiis vahivak-anja be gangga.” ¹⁴ + o 10:14 Lev 11:1-47; Esi 4:14*Lemu Pita nêel laah nambe, “Omaaho Bop, malis lôôt. Va nipaya osin va bamaan nambêênja ond same naha bôôy e.” ¹⁵ + o 10:15 Mak 7:15,19*Tombe lava ango lo-hato balon ango having nambe, “Va sen Anutu samu be nivasa lak-ato, ond game ganjêênin naambe nipaya le.” ¹⁶ Omaaho Bop nêel vakasin nambêênju balon yuuh having tu balon yaal, le mem tôomb-anjuuto lak-ambe laah baandoni pavis, ¹⁷ tombe Pita nando ka monavu va sen yii-to nambe, “Mak peey e vaa-ju danggakook nambe va?”

Ka monavu nambêênju tonde Konilias-ate omaaho yaal sen wiing yaal lalaam-ato, ond lato be lalingin hil, de mondalaam-ambe lato daale Simon-ate bayêên vinavi, ¹⁸ tombe lateey-ambe lalingin nambe, “Simon sen haale ango nambe Pitaa-to ond laas nandôô-ja me malis?” ¹⁹ + o 10:19 Sin 11:12; 13:2*Tombe Pita yoo nando ka monavu taahu taahu-ju, le Vavi Vaambuung nêel vu nambe, “Onggango omaaho yaal lato davu salo hong ani, ²⁰ om okandi jak-ambe ganduus-ambe gana gaving yaal, de game gakam yu-yuuh e, in soo aawiing yaal lalaam.” ²¹ Om Pita luus-ambe laah hato vu yaal-ambe nêel nambe, “Omaaho sen ham navu salo yii-to ond yik saa-jo.

De ham alaam in vakasin va?” ²² + o 10:22 Sin 10:1-2*Le yaal lanêêl laah vu nambe, “Konilias sen hil Lom ngaamong vaha doo-nomaayuuah-ate yêêv-ato, ond wiing waay alaam. Omaahôô-ju omaaho nivalok yoo nayêênin Anutu, de hil Yuda pin layi yi nivasa, ond angela vaambuung ti nêêl taato vu nambe biing hil lanaam in gako hong-ambe gana baan, in gango vakasin vu hong.” ²³ + o 10:23 Sin 10:45; 11:12*Om Pita nêêl-ambe yaal lalukala deep having yi, de samiinaanôôn atombe sil pin kandi be lalaah, tombe Omaaho Bop-ate hil vaalu vu Jopa lala having.

Pita la Konilias ambaan

²⁴ Sil mondala be lala deep busin ti vu mop lavuun, le mem sil latok lala Sisalia. Tonde Konilias teey yite hil sen sil dangga timuu-to osin yite nipaapu vaalu sen ahe naving sil-ato, be sil lasupin-ambe dando mondanggin Pita. ²⁵ Tonde Pita lukala umakalo tombe Konilias laam-ambe hato pataav baambu neep voon hôôk Pita vaha in nambe gako haale jak, ²⁶ + o 10:26 Sin 14:13-15; Taato 19:10*le ma de Pita laandiiy hôôk nama de nêêl vu nambe, “Okandi jak, yik sa omaahonôôn nambe hong-anja.” ²⁷ Pita monakaas vu be yuuh lalukala umakalo, tombe sim yi de hil ngeeyaata lasupin-ambe dando. ²⁸ Tombe Pita nêêl vu sil nambe, “Ham oo alak ni nambe hil Yuda danêêlin nambe sil-ame mando gaving hil vaalu osin me-lana vu sil e, malis lôôt. Lemu sak Anutu nêêl taato vu sa nambe same naanêêl omaaho ti naambe nipaya me nindanjeen e, malis lôôt. ²⁹ Om gêên ham ateeey sa be sa laam-anjo ond same aayêênin e, om saanjingin ham naambe

ham atee sa laam in vakasin vaati?” ³⁰ + o 10:30 Sin 1:10; 3:1*Tombe Konilias nêel nambe, “Gêên busin yumbeyuuh lung la, ond busin ti nyendoos-ato hôôk taaku me yaal nambe sen gêên-anjo, tombe sa monaalohak hôôk sate bayêên alo, le sim saahe omaaho ti osin yite tôômb ayuuh ame nivalôôy lôôt, ond hato naale hôôk sa mengg, ³¹ be nêel nambe, ‘Konilias, Anutu hango gate lohakin, de ka navu gate samu samu sen onahôôvu hil in dativak in vaa-to, ³² om gambiing hil lana Jopa in gako Simon sen haale ango nambe Pitaa-to, ond la nando having lengo Simon sen nawiiing kul bik naavii-to, ond yite bayêên nando ngaaho vu lôôy nanyendangga.’ ³³ Om saanêel pavis-ambe hil lalaas in hong, le gawiiing nivasa be galaam, om gêên hey pin sen hey alaam nandôô-jo lak Anutu haale, hey aawiiing nambe gango vakasin pin sen Omaaho Bop nêel vu hong nambe onaanêel-ato.”

Pita wiing tanasin hôôk Konilias ambaan

³⁴ + o 10:34 1Sml 16:7; Lom 2:11; Gal 2:6*Tombe Pita nêel nambe, “Gêên-anjo sa lak ni keen lôôt nambe Anutu me-yoo ka navu hil dangga timu le, ma. ³⁵ + o 10:35 Jon 9:31*Yik omaahonôôn pin, ti nambe jêênin Anutu de biing va na nivalok, ond le ji yi nivasa. ³⁶ + o 10:36 Saam 107:20; Ais 52:7; Taato 17:14*De Anutu wiing-ambe Yesu Kalisi sen tu yiii pin-ate Omaaho Bop-ato, ond nêel banye nivasa osin vakasin melaas langaah vu hey Islel. ³⁷ + o 10:37 Mat 4:12-17*De ham oo alak ni nambe Jon nêel tanasin lak belipisin vêel e, mem Yesu Kalisi-te vakasin-anju hil lanêel vu Galili be la

lohvu taaku Yudia pin. ³⁸ + o 10:38 Mat 3:16; Luk 4:17-20*In Yesu Nasaalet ond Anutu yoo holin yi be vu Vavi Vaambuung osin niwêêk vu yi, tombe la lohvu taaku pin-ambe nahôôvu hil, de navu samu hil sen Saalang navu nimeen vu sil-ato be nind vasa nalak laah, in Anutu nando having yi. ³⁹ De va pin sen wiing vu hey Yuda-te taaku de vu Yelusalem, osin layiis yi lakala haah-ambe yimb-ato, ond hey aahe, ondeey hey naanêêl tatekin-anjo. ⁴⁰ + o 10:40 1Ko 15:4-7*Lemu busin yaal lung la le mem Anutu wiing-ambe kandi lak laah-ambe taato yi langaah, ⁴¹ + o 10:41 Jon 14:19,22-24; 15:27; Sin 1:8; Luk 24:42-43*ond me-taato yi vu hil Yuda pin e, malis, yoo taato yi vu hey sen bôôy Anutu holin hey nambe hey naanêêl yite vakasin-ato. De sen kandi lak laah vu hil yimbin-atêeto ond hey aha vanôôn osin hey aanum having yi. ⁴² + o 10:42 Sin 17:31; 2Ti 4:1; 1Pi 4:5*De nêêl vu hey nambe hey naanêêl tatekin osin hey naanêêl langaah vu hil naambe Anutu holin yi lung la in gangoyin hil yimbin osin metumin-ate vakasin, be golin nivasa osin nipaya. ⁴³ + o 10:43 Ais 33:24; 53:5-6; Jer 31:34; Dan 9:24*Ond hil lanêêl Anutu-te vakasin langaah lak omaahôô-ju nambe hil pin sen londpayo la timu vu yii-to, ond haalêê-ju le kawiiy silate nipaya na.”

Vavi Vaambuung lakala hil vaalu sen sil-ame Yudaa-to

⁴⁴ + o 10:44 Sin 11:15; 15:8*Pita naahen monanêêl vakasin atonde Vavi Vaambuung lakala hil pin sen dando mondango vakasin-anjuuto.

⁴⁵ Tombe hil Yuda sen lawii-having Yesu be sil

ahondoos Pita-so lalaam-ato, ond lavindis lôôt in Anutu vu Vavi Vaambuung lakala hil vaalu sen sil-ame Yudaa-to having. ⁴⁶ + o 10:46 Sin 2:4; 19:6*Tombe lango de hil-anjuuto lakaas bayêen bu ti ti lavand-ambe dako Anutu haale lak, om Pita nêel nambe, ⁴⁷ + o 10:47 Sin 8:36*“Lati le naanêelin hil-anjo naambe me-lanjipis bel e, in lako Vavi Vaambuung lung la, yik nambe sen yiyi hakô-to.” ⁴⁸ + o 10:48 Sin 2:38*Om nêel-ambe lalipis bel lak Yesu Kalisi haale, tombe sil kataangg Pita be nando busin heey having sil vêel e mem laah.

11

Pita hatulin vakasin vu hil bel-ate vu Yelusalem

¹ Sinaale-so osin Omaaho Bop-ate hil vaalu sen dando Yudiaa-to lango banye nambe hil vaalu sen sil-ame Yudaa-to lako Anutu-te tanasin lak, ² om Pita laah valup Yelusalem atombe Yuda pin lanêel yi. ³ + o 11:3 Sin 10:28; Gal 2:12*Lanêel nambe, “Gala vu hil sen sil-ame Yudaa-to be gaha vanôn having sil.” ⁴ Lemu Pita hatulin va pin sen hango de yii-to vu sil nambe, ⁵ + o 11:5-15 Sin 10:9-48*“Sa nando monaalohak vu taaku Jopa, tonde saahe taahu taahu ti, ond saahe de vati nambe tôômb bopaata ti luus-ambe laam, ond landuuh hôök nanyendangga yumbeyuuh, de sil taaluuhin vu baandoni be laam voon vu sa. ⁶ Tombe saawiin-gin nambe anjak vaa-ju ni om saangget lôôt, le vahivak vaha vaha sen naale nala de nahaavak osin manak pin nando hôök lopayo. ⁷ Tombe sa hango lava ti laam vu sa nambe, ‘Pita, okandi ganyiis vahivak-anja be gangga.’ ⁸ Lemu saanêel

nambe, ‘Omaaho Bop, malis lôôt. Va nipaya osin va bamaan nambêênja ond same naha bôôy e.’ ⁹ Tonde lava ango lom vu baandoni tu balon yuuh vu sa nambe, ‘Va sen Anutu samu be nivasa lak-ato, ond game ganjêênin naambe nipaya le.’ ¹⁰ Omaaho Bop nêêl vakasin nambêênju balon yuuh having tu balon yaal, le mem va pin-anju lak-ambe laah baandoni. ¹¹ Tonde pavis atombe saahe omaaho yaal lato daale bayêên sen hey nando hôôk-ato vinavi, ond omaaho ti nando Sisalia nêêl-ambe yaal lalaam in sa. ¹² Tombe Vavi Vaambuung nêêl vu sa nambe, ‘Gana gaving yaal de game gakam yu-yuuh e.’ Tombe halinggaso namaavaalu vindak ti nganjo laving sa be hey ala hato omaaho sen wiing omaaho yaal lalaam in saa-to baan, ¹³ le mem hatulin vu hey nambe yi de angela ti hato naale yite bayêên alo be nêêl vu nambe, ‘Gambiing hil lana gako Simon sen haale ango nambe Pitaa-to vu Jopa be lanom ¹⁴ + o 11:14 Sin 16:31*in naanêêl vakasin ti vu hong, ond vakasin e dôôvu hong gaving gate hil pin.’ ¹⁵ + o 11:15 Sin 2:4*Tombe sa naahen naanêêl vakasin lakala, tonde Vavi Vaambuung lakala sil, yik nambe sen lakala yiyi bôôy-ato, ¹⁶ + o 11:16 Sin 1:5*tombe sa kangg vu Omaaho Bop-ate vakasin sen nêêl-ato nambe, ‘Jon lipis hil-ato ond lipis sil lak bel, lemu Anutu navu biing Vavi Vaambuung naas mando gaving ham.’ ¹⁷ Om sen Anutu vu Vavi Vaambuung vu sil-anju, ond yik timu sen vu vu yiyi bôôy sen yaawii-having Omaaho Bop Yesu Kalisii-to, om sa vaati sen saanggilin Anutu-te mop jeen in sil?” ¹⁸ + o 11:18 Sin 13:48; 14:27*Om hil pin sen dandô-

juuto lango Pita-te vakasin-anju be lavand ma, de lako Anutu haale lak nambe, “Om Anutu hilin hil sen sil-ame Yudaa-to londpayo in nambe sil mando metumin gaving.”

Hil bel-ate vu Antiok

¹⁹ + o 11:19 Sin 8:1-4*Hil sen lavuuh taale hôôk busin sen layiis Stiven-ande lawiing nindanjeen vu sil vaaluu-to, ond hil sen lavuuh taalêê-juuto vaalu lala taaku dinaandiin heey, taaku Pinisia yuuh Saiplas, de Antiok, tombe lanêêl tanasin vu hil Yuda malis, de me-lanêêl vu hil vaalu le. ²⁰ Lemu hil vaalu vu Saiplas de vu Sailini ond sil latok lala Antiok, be lanêêl Omaaho Bop Yesu-te banye nivasa vu hil Glik having, ²¹ + o 11:21 Sin 2:41*tombe Omaaho Bop-ate niwêêk nando having sil, om hil ngeeyaata lahilin londpayo be lawii-having Omaaho Bop.

²² + o 11:22 Sin 4:36*Lawii-having atombe hil bel-ate vu Yelusalem lango banye, tombe lawiing Banabas la Antiok. ²³ + o 11:23 Sin 13:43; 14:22*La hato le yi nambe Anutu samu sil nivasa, tombe pêêlis de kaandu sil pin lak tanasin nambe yoo londpayo niwêêk, de sil oo mosapa Omaaho Bop timu jak busin pin. ²⁴ + o 11:24 Sin 2:41; 6:5*Banabas-anju omaaho nivasa, wii-having niwêêk lôôt, de Vavi Vaambuung hôôvu yi, tombe hil ngeeyaata latu Omaaho Bop-ate hil. ²⁵ + o 11:25 Sin 9:30*Tombe sim Banabas la Taasas in nambe salo Saul, ²⁶ + o 11:26 1Pi 4:16*tombe tovu yi om giyy-ambe yuuh lalaah Antiok, be yuuh dando having hil bel-ate vu Antiok ta ti lôôt,

in yuuh davu taahu hil ngeeyaata hôök Anutu-te tanasin. Tombe lanêêl Yesu-te hil vu Antiok nyendoos nambe hil Kalisten.

²⁷ + o 11:27 Sin 13:1; 15:32*Tombe hil sen danêêl Anutu-te vakasin langaah-ato heey vu Yelusalem-ambe lala lato Antiok, ²⁸ + o 11:28 Sin 21:10*ond sil ti haale nambe Agabas, ond Vavi Vaambuung vêêl lu lak om kandi be nêêl vakasin langaah nambe, “Meep bopaata navu naam nohvu taaku pin.” Tombe vakasin-anjo nôôn ak hôök busin sen Klodias tu Lom-ate omaaho lulemak-ato. ²⁹ Om Yesu-te hil lanjôôy vakasin munggin nambe sil pin daasupin mone yuuh ame sen nando vu sil-ato nohvu sil namand pin, be lambu na in dôôvu Omaaho Bop-ate hil vu Yudia hôök busin sen meep naam-ato. ³⁰ + o 11:30 Sin 12:25*Tombe lasupin lung la, le mem lawiing Banabas ayuuh Saul lako be lala vu himbop-aso vu Yudia.

12

Layiis Jems-ambe yimb de lalôôh Pita

¹ Busin-anju omaaho lulemak Helot nawiing nindanjeen vu hil bel-ate vaalu, ² de nêêl-ambe layiis Jems sen Jon halii-to lak yipak-ambe yimb. ³ + o 12:3 Sin 4:3*Tonde Helot yi de hil Yuda layi nivasa om nêêl-ambe hil lalôôh Pita having. Vaa-ju lawiing hôök busin bop busin haluusin sen hil akand navu sen Anutu haluuh hil Islel hôök vu Ijip bôôy-ato. ⁴ Lako Pita be lala latung lukala kalaambus, de lavu lukala hil ngaamong vaha-sote ahevaavu nomaayuuu-ambe laam namaavaalu vindak tii-to namand in sil ganggin, ond sil yumbeyu-beyuuh danggin-ambe davu

taveyin. Helot aka vu nambe busin bop busin haluusin jung na le mem gako Pita naam baale hil Yuda mend in biing vakasin. ⁵ + o 12:5 Jem 5:16*Om ahevaavu-so yoo mondanggin Pita hôôk kalaambus, lemu hil bel-ate lalohak niwêêk lôôt vu Anutu in yi.

Angela lôôh Pita vêêl hôôk kalaambus

⁶ + o 12:6 Sin 5:23*Tombe busin ti sen Helot hatung in nambe samiinaanôôn Pita na baale hil amend-ato, ond landuuh Pita lak hees aniwêêk yuuh-ambe neep hôôk ahevaavu yuuh lavuun hôôk busin, de ahevaavu vaalu daale mondanggin vinavi. ⁷ Tonde sim Omaaho Bop-ate angela ti hato naale tombe bayêên alo melangaah lôôt. Angela patap Pita baanggesak-ande yêêvu nambe, “Okandi pavis.” Tombe hees yuuh-anjôôto yêêhin hôôk Pita nama be tok la, ⁸ tombe angela nêêl vu nambe, “Onggavêêh let osin onggatung gate suul naah.” Om Pita havêêh let-ande hatung suul laah, tonde angela nêêl vu laah nambe, “Ganjop gate lolop-ambe mem otaamuyin sa.” ⁹ Tombe Pita kandi lak-ambe taamuyin angela be yuuh lala, lemu me-lak va sen angela wiing-anjôôto ni le, de ka vu nambe yoo yi taahu taahu. ¹⁰ + o 12:10 Sin 5:19*Yuuh lala lato kaluuh ahevaavu ti sen nanggin vinavi nyendoos-ato, de yuuh lala lato kaluuh vinavi ango having, tonde mem yuuh lala lato vinavi bop voon sen daayiy ak aen-ato, tombe vinavi tii-ju yoo hataahin malis amu in yuuh, de yuuh lato voon-ambe yuuh laloh mop pasiv ti be latok lala bayêên bop, tonde angela la mema pavis. ¹¹ Tombe Pita kanu lukalaah-ambe

nêêl nambe, “Gêên salak ni keen nambe Omaaho Bop wiing yite angela hato vu vêêl sa vu Helot nama, osin vu va pin sen hil Yuda kand navu in nambe lambiing ak

saa-to.”

¹² + o 12:12 Sin 12:25; 15:37*Lak ni lung la le mem la Jon sen haale ango nambe Maak-ato tang-ganaan Malia baan. Bayêên-anju hil ngeeyaata lasupin-ambe dando mondalohak. ¹³ Pita valup-ambe monayiis ak vinavi vu voon, tombe vêêh kul ti haale nambe Loda laam in nambe gataahin vinavi, ¹⁴ le hango Pita lava be lak ni tombe lopayo nivasa lôôt, om me-hataahin vinavi le, de hatup-ambe laah umakalo be nêêl vu sil nambe, “Pita valu-naale vinavi.” ¹⁵ + o 12:15 Sin 26:24; Mat 18:10*Le lanêêl vu nambe, “Galumkook wiing paya.” Le ma de nêêl niwêêk lôôt nambe, “Malis, Pita keen lôôt.” Tombe lanêêl nambe, “Ôôye, manyinju yite angelaaju.” ¹⁶ Tonde Pita monayiis ak vinavi lôôt, om lataahin vinavi le

layi Pita tombe sim sil lavindis lôôt. ¹⁷ + o 12:17 Sin 13:16; 19:33; 21:40*Tombe Pita valaah nama vu sil in nambe lavand nama, tonde mem hatulin va sen Omaaho Bop giyy yi vu bayêên kalaambus alo be hato laam voon-ato, tonde nêêl having nambe, “Ham naanêêl vaa-jo banye vu Jems, de vu halingg-aso pin.” Tonde Pita hato la voon-ambe la taaku ango.

¹⁸ + o 12:18 Sin 5:22-24*Tonde sim sami-inaanôn e ahevaavu-so kandi layi le ma, om sil nahand nalak lôôt-ambe danêêl nambe,

“Peey e Pita la tana?” ¹⁹ Tombe Helot nêêl-ambe hil lala salo Pita le me-latovu le, om lingin

ahevaavu-so sen danggin vinavii-to lôôt e ma, om nêêl atombe layiis sil-ambe layimb. Tonde Helot vu Yudia be la hato Sisalia be nando.

Helot yimb

²⁰ + o 12:20 1King 5:11; Esi 27:17*Helot ahekalin bopaata vu hil Taia yuuh Saidon, om sil pin lavuh ti be lasupin lala vu, tombe sil samu vakasin vu Helot-ate yêêv bop Blastas sen nanggin yite bayêên-ato vêêl e, mem sil kataangg nambe omaaho lulemak Helot nyiis silanêênd vakasin jimb, in sil oo daanggo vanôôn vu omaaho lulemak-ate hil. ²¹ Om Helot hatung busin ti in nambe naanêêl vakasin vu hil, tombe busin-anju vunak ak lolop lulemak-ate be lakala nando lak sia lulemak-ate, tonde mem monanêêl vakasin vu sil pin, ²² tombe hil pin lateey bopaata nambe, “Ham hil-e, manyinju anutu ti nakaas, de omaahonôôn o ma.” ²³ + o 12:23 Dan 5:20*Lemu Helot-ame hako Anutu haale lak e, om Omaaho Bop-ate angela ti yiis pavis lukalaah nyevahaan, de wiingambe male ya omaaho lulemak Helot-ambe yimb. ²⁴ + o 12:24 Ais 55:11; Sin 6:7; Sin 19:20*Tonde Omaaho Bop-ate tanasin tu ahepataas-ambe la lohvu taaku pin.

²⁵ + o 12:25 Sin 11:29-30; 12:12; 15:37*Banabas ayuuh Saul lako mone yuuh ame la Yelusalem lung la, tonde yuuh lako Jon sen haale ango nambe Maak-ato having-ambe yaal lalaah.

13

Saul ayuuh Banabas lala kul sinaale nyendoos

¹ + o 13:1 Sin 11:27*Hil sen danêêl Anutu-te vakasin langaah-ato osin kaputung-aso dando having hil bel vu Antiok ond sil haalend-anjo, Banabas ayuuh Simon sen danêêl nambe Valiis-ato, de Lusias vu Sailini, de Manayen sen yuuh yêêv bop Helot unoopasiv-ande yuuh oo dando hôok ti bôôy-ato, de Saul. ² + o 13:2 Sin 9:15; Gal 1:15-16*Ond busin ti me-laya vanôôn e de mondalohak vu Omaaho Bop, tombe Vavi Vaambuung nêêl nambe, “Ham anggolin Banabas ayuuh Saul lana kul sen saateey yuuh bôôy in nambe yuuh lambiing-ato.” ³ + o 13:3 Sin 6:6*Om lalakin sil in vanôôn-ande me-laya le, de lalohak yesin laah, le mem lambe namand ak yuuh atonde lawiing yuuh lala.

Banabas ayuuh Pol lanêêl tanasin vu hil Saiplas

⁴ + o 13:4 Sin 15:39*Tombe Vavi Vaambuung nêêl-ambe yuuh lala. Yuuh lala lato Selusia le mem yuuh lalak sip vuu-ju be

yuuh lala nalu lavuun Saiplas. ⁵ + o 13:5 Sin 12:12; 13:13*Tombe mem yuuh latok lala Saiplas-ate bayêên ti haale nambe Salamis, tombe yuuh lanêêl Anutu-te tanasin-ambe yuuh latup hôok hil Yuda-te dumb pin de Jon nahôôvu yuuh.

⁶ Yaal latup hôok-ambe lalohvu nalu lavuun Saiplas-anju pin, be yaal latok lala bayêên Pepos. Tombe vu manyinju yaal latokak Yuda-te omaaho tatuhin vaha ti haale nambe Baayesu, ond omaahôô-ju lôômb osin yaavak dangga yi, ⁷ yoo nando having yêêv Lom ti Sesias Polas. Yêêv-anju lukook anivasa be wiingin nambe gango Anutu-te tanasin, om teey Banabas ayuuh Saul lala vu,

⁸ + o 13:8 2Ti 3:8*le omaaho palaas Baayeesuu-ju danêêl haale hôôk Glik lavand nambe Elimas, ond navu mahôôh Banabas ayuuh Saul in nawiingin nambe gilin yêêv alo be me-biing gaving tanasin e. ⁹ Lemu Saul sen danêêl haale ango nambe Polato, ond Vavi Vaambuung hôôvu yi be me la vu Elimas lôôt, ¹⁰ tombe nêêl nambe, “Hong Saalang noow. Vakasin tatuhin osin va nindanje-danjeen pup hôôk galompayo, om onawiing nindanjeen vu va nivasa pin. Naangelis e onggavuuh gate vakasin sen onavu tatuhin ak Omaaho Bop-ato na? ¹¹ + o 13:11 Sin 9:8*Om onggango le, gêên-anjo Omaaho Bop nama navu nyiis hong-ambe gamem kanu dôôk, om peey-anjo game le gangge taaku le, de omando busin heey vêêl e mem.” Pol nêêl nambêênju tonde Elimas amekanu hôôk pavis-ambe navu kaatuuh hôôk, de navu salo hil in nambe sil daandiy yi. ¹² Yêêv yi vaa-ju tombe vindis lôôt in Omaaho Bop-ate tanasin be wiihaving.

Pol ayuuh Banabas lala Antiok Pisidia

¹³ + o 13:13 Sin 12:12; 13:5; 15:38*Pol ayaal lalak sip vu Pepos-ambe lalakala taaku Pega sen neep Pampilia-te taaku-to, tombe Jon havuuh yuuh-ande laah Yelusalem. ¹⁴ De yuuh vu Pega be lala lalup Antiok sen neep Pisidia-te taaku-to, tonde busin sawaasin atombe lahuli-lala dando hôôk dumb alo be dando. ¹⁵ + o 13:15 Sin 15:21*Tombe lango de lasevin Mose-te tanasin osin Anutu-te vakasin sen yite hil vaalu kaavuu-to lung la, le mem yêêv-aso sen danggin dumb tii-ju lanêêl vakasin la vu Pol ayuuh nambe, “Halingg ayuuh,

mawiingin nambe kaandu hil jak tanasin heey ond muuh-o.”

16 + o 13:16 Sin 12:17*Tombe Pol kandi naale be valaah nama de nêêl nambe, “Ham Islel osin ham vaalu sen ham nayêênin Anutuu-to, ham gango le. 17 + o 13:17 Eks 1:7; 6:6; 12:51*Yiyy Islel-anjo, yate Anutu holin yate himbop-aso bôôy, be sil lala dando bamaan vu Ijip-ato ond wiing-ambe sil latu ngeeyaata, lemu vu taamusin ond yite nama niwêêk giyy sil vuu-ju be lalaah. 18 + o 13:18 Eks 16:35; Nam 14:34; Diu 1:31*Lala latup hôôk taaku lumbalaamb lohvu ta doo-yuuh atombe Anutu lopayo nimeen in davu kalêêh lava lak busin pin, le ma de me-haluuh dami vu sil e. 19 + o 13:19 Diu 7:1; Jos 14:1*Nganjo yiis Kanaan-ate hil lulemak namaavaalu be vindak yuuh osin silate hil pin, de vu silate ngaanggis vu hil Islel-aso be tu silate va, tombe dando ta ngeeyaata lohvu 450 vêêl e mem. 20 + o 13:20 Yêêv 2:16; 1Sml 3:20*Anutu holin Islel-ate yêêv atombe langgin sil-ambe tok laam Samuel-ate busin, 21 + o 13:21 1Sml 8:5,19; 1Sml 10:20-24*tonde mem sil kataangg nambe Anutu golin silate omaaho lulemak ti, om Anutu holin Kis sen pumak Benyaamin-ato ond noow Saul, be tu omaaho lulemak-ambe hanggin hil lohvu ta doo-yuuh, 22 + o 13:22 1Sml 13:14; 16:13; Saam 89:20*le sim Anutu lôôh yi vêêl-ande wiing-ambe Devit tu silate omaaho lulemak. Omaahôô-ja ond Anutu nêêl vakasin lak yi nambe, ‘Saahe de Jesi noow Devit lopayo having sa om le biing sate vakasin pin nôôn jak.’ 23 + o 13:23 2Sml 7:12-16; Ais 11:1*Tombe Anutu yoo wiing lohvu sen nêêl bôôy-ato, om vu Devit-ate hil vu taamusin-

ato ti Yesu laam in nambe dôôvu yiyi Islel pin.
²⁴ + o 13:24 Mat 3:1-2*De bôôy Yesu me-laam-
 ato, ond Jon nêêl vakasin vu hil Islel pin nambe
 langgilin londpayo be lanjipis bel. ²⁵ + o 13:25
 Jon 1:20,27*Tonde ngaaho lak in Jon-ate kul jung
 na om nêêl nambe, ‘Ham akam navu nambe sa
 lati? Same omaaho sen ham nanggin yii-to le, ma.
 Omaaho sen navu taamuyin saa-to, ond mem.
 Same sa ningg vasa in nambe sa kavaayin suul
 na vêêl in omaahôô-ju vaha le, osin saambiing kul
 vaalu naambe hil kul-aso dawiiing vu silate yêêv-
 asôôto le.’

²⁶ “Om halingg-aso sen Abalaam-ate hil vu taa-
 musin ham-ato, de ham vaalu sen ham nayêênin
 Anutu having-ato, ham gango le. Vakasin sen
 Anutu nêêl nambe dôôvu yiyi-ato, ond wiing laam
 lung la vu yiyi, ²⁷ + o 13:27 Jon 16:3; Sin 3:17*lemu
 hil sen dando Yelusalem osin silate yêêv bop-
 aso me-lalak Yesuu-ju dangga ni vanuh e, de yoo
 dasevin Anutu-te vakasin sen hil lanêêl langaah
 bôôy-ato nalak busin sawaasin pin, le ma de me-
 kand vu le. De lawiing vakasin ak yii-to, ond
 lawiing Anutu-te vakasin sen hil lanêêl langaah
 bôôy-ato nôôn ak, ²⁸ + o 13:28 Mat 27:22-23*de
 me-latokak yite vakasin keen ti in nambe lanyiis-
 ambe jimb e, malis, lemu yoo lanêêl niwêêk lôôt
 atombe Pilata yiiis-ambe yimb malis amu. ²⁹ + o
 13:29 Mat 27:59-60*Om lawiing Anutu-te vakasin
 pin sen hil lanêêl langaah bôôy-ato nôôn ak lung
 la, le mem lalôôh ninaavi vêêl vu haah pako be
 lala lambe neep hôôk lavandangga, ³⁰ + o 13:30
 Sin 2:24*lemu Anutu wiing-ambe kandi lak laah
 vu hil yimbin-ate. ³¹ + o 13:31 Sin 1:3,8*Kandi lak

lung la, le mem hil vaalu layi mend ak yi lohvu busin ngeeyaata, ond hil-anju sen sil laving yi vu Galili be sil ahondoosin lala lalup Yelusalem munggin-ato, ond hil-anju sen gêên danêêl yite banye nalohvu hil Yuda. ³² De hey naanêêl banye nivasa vu ham naambe vakasin sen Anutu nêêl vu yate himbop-aso bôôy-ato, ³³ + o 13:33 Saam 2:7*ond gêên wiing nôôn ak vu silate hil vu taamusin-ato yiyi, om wiing Yesu laam vu yiyi lohvu vakasin neep hôôk kaapiya Saam Lukook 2 nambe,

‘Sa noongg hong in gêên soo hako hong.’

³⁴ + o 13:34 Ais 55:3*Tonde Anutu wiing-ambe kandi lak vu hil yimbin-ate lung la, de me-le ninaavi panyek naah e, ond Anutu nêêl langaah hôôk vakasin-anjo nambe,

‘Vakasin keen sen saanêêl vu Devit-ato ond sale aambiing nôôn jak vu ham.’

³⁵ + o 13:35 Saam 16:10; Sin 2:27*Tonde vakasin boow ango neep hôôk Saam ango having nambe, ‘Game le gavuuuh gate omaaho vaambuung-ambe ninaavi nanjip panyek hôôk lavandangga le.’

³⁶ + o 13:36 Sin 2:29*De Devit ond wiing va lohvu Anutu nêêl vu yi hôôk yite busin sen yi osin yite hil dando memoos vu voon-ato, tonde yimb atombe lambe neep having maandin-ande bundin-ambe ninaavi panyek, ³⁷ lemu omaaho sen Anutu wiing-ambe kandi lak-ato, ond ninaavi me-panyek e.

³⁸ + o 13:38 Sin 10:43*“Om halingg-aso, ham anjak ni naambe tanasin sen hey naanêêl langaah vu ham nambe Anutu le kawiiy hamate nipaya

naa-to, ond tanasin-anjo danggakook Yesu. ³⁹ + o 13:39 Lom 10:4*Om hamate nipaya pin sen Mose-te tanasin-ame lohvu nambe kawiiy naa-to, ond ti nambe lopayo na timu vu Yesuu-ju, ond Anutu le kawiiy yite nipaya pin na de ji yi nivasa. ⁴⁰ Om ham ganggin ham in Anutu-te vakasin sen hil lanêel langaah bôôy-ato me-naatovu ham e. Nambe,

⁴¹ + o 13:41 Hab 1:5*‘Ham kalêês inambu-so, ham angge be ham ambindis, lemu ham e ana mem nama. In kul ti sa naawiing hôôk busin sen ham nando voon-ato, naambe sil tatekin vu ham ond ham-ame le ambiing gaving e.’ ”

⁴² Pol nêel vakasin lung la tonde yuuh Banabas lawiingin nambe gato lana voon, tombe hil lalaam-ambe kataangg yuuh nambe, “Yik muuh naanêel vakasin-anjo jesin naah dôôk busin sawaasin ango taamusin vu hey.” ⁴³ + o 13:43 Sin 11:23; 14:22*Tonde hil pin lato lala voon, tombe hil Yuda osin hil vaalu sen dayêênin Anutu de lako Yuda-te gambum-ato, ond sil ngeeyaata sapa Pol ayuuh Banabas, tombe yuuh lanêel tanasin osin yuuh kaandu sil niwêêk nambe yoo daapuvu Anutu-te samu samu lôôt.

⁴⁴ Tonde busin sawaasin ango tombe hil taakuu-ju pin lasupin lalaam timu lôôt in gango Anutu-te tanasin. ⁴⁵ + o 13:45 Sin 14:2*Lemu hil Yuda layi hil ngeeyaata lasupin lôôt atombe ahend anipaya vu yuuh, de sil mahôôh Pol-ambe lanêel yi pale. ⁴⁶ + o 13:46 Sin 3:26; 18:6; Luk 7:30*Le Pol ayuuh Banabas-ame layêênin

e, de yuuh lanêêl nambe, “Haay aanêêl Anutu-te tanasin vu ham Yuda munggin, le ma de ham haluuh damim vu, om manyinja ham anêêl nambe ham-ame alohvu nambe mando metumin danggata le, om ham angge, gêên haay haluuh damingg vu ham-ande haay nala vu hil vaalu.⁴⁷ + o 13:47 Ais 49:6*In Omaaho Bop nêêl vu haay nambe,

‘Saambiing-ambe gana naatu hil vaalu sen sil-ame Yudaa-to silate kin tumin in otaato mop metumin-ate vu hil-ambe na nohvu taaku pin.’

⁴⁸ + o 13:48 Sin 11:18*Om hil vaalu sen sil-ame Yudaa-to lango vakasin-anju tombe londpayo nivasa lôôt, de lavand hôôk Anutu-te tanasin, tonde sil vaalu sen Anutu holin sil lung la in nambe sil mando metumin danggataa-to, ond lawii-having.⁴⁹ Tombe lanêêl Omaaho Bop-ate tanasin la lohvu taakuu-ju pin. ⁵⁰ + o 13:50 Sin 17:4,12*Lemu hil Yuda laanjiihin vêêh-aso sen haalend bop-ambe dayêênin Anutuu-to, osin yêêv bop-aso vu taakuu-jôoto, be lawiing nindanjeen vu Pol ayuuh Banabas, de latiiy yuuh in silate taaku be yuuh lala. ⁵¹ + o 13:51 Mat 10:14; Sin 18:6*Tombe yuuh tatehin kambus sen nando lak yuuh vahand-ato in taato naambe nipaya neep vu sil, tonde mem yuuh lala Ikoniam, ⁵² de Yesu-te hil vu Antiok ond yoo dando osin londpayo nivasa lôôt de Vavi Vaambuung nando having sil.

14

Pol ayuuh Banabas dawiing kul vu Ikoniam

¹ Tombe yik vu Ikoniam ond Pol ayuuh Banabas lalukala Yuda-te dumb alo be yuuh lawiing tanasin osin niwêêk, tombe Yuda yuuh Glik ngeeyaata lôôt lawii-having. ² + o 14:2 Sin 13:45*Lemu Yuda vaalu sen me-lawiihaving-ato ond laanjiihin hil vaalu sen sil-ame Yudaa-to, be sil ahend kalin lôôt vu Omaaho Bop-ate hil, ³ + o 14:3 Mak 16:20; Sin 19:11; Hiblu 2:4*lemu Pol ayuuh Banabas dandôô-ju lôôt, be yuuh oo mondanêêl Omaaho Bop-ate tanasin de yuuh-ame layêênin e. Tonde

Omaaho Bop hôôvu yuuh-ambe yuuh lawiing taahu taahu vaha vaha osin niwêêk, in nambe hil lanjak ni nambe Omaaho Bop kaandu yuuhate vakasin sen yuuh tatekin yite samu samuu-to. ⁴ Tombe hil vu taakuu-ju me-londpayo lavuh ti le, om vaalu lawii-having Yuda de vaalu lawiihaving sinaale yuuh. ⁵ + o 14:5 Sin 14:19; 2Ti 3:11*Tombe hil vaalu sen sil-ame Yudaa-to osin hil Yuda laving silate yêêv-aso be lawiingin nambe lambiing nindanjeen vu Pol ayuuh Banabas, de lanyiis yuuh ak tatuuh-ambe yuuh lanjimb. ⁶ + o 14:6 Mat 10:23*Le yuuh lango banye om yuuh lapak-ambe lala taaku Listla yuuh Debi sen neep hôôk Likonia-te taakuu-to, de taaku vaalu sen neep ngaahôô-to having, ⁷ tombe yuuh lala mondanêêl banye nivasa langaah vu taakuu-ju pin.

Yuuh lawiing kul vu taaku Listla yuuh Debi

⁸ + o 14:8 Jon 9:1; Sin 3:2*Omaaho ti nando Listla ond tangganaan hako osin vaha nipaya, tombe vaha me-niwêêk e, de me-nala mop daka

le, ⁹ + o 14:9 Sin 3:4; Mat 9:28*ond yoo monambe nanye in vakasin sen Pol nanêêl-ato. Tombe Pol nayi lôôt e mem lak ni nambe wii-having lohvu le nivasa dôôk, ¹⁰ om Pol nêêl la osin lava bopaata nambe, “Ombalaah ovaham-ande okandi baale nivasa.” Tombe sim kandi naale pavis-ambe la.

¹¹ + o 14:11 Sin 28:6*Hil ngeeyaata layi va sen Pol wiing-anjo tombe lateey hôôk hil Likonia lavand nambe, “Anutu heey latu omaahonôôn ak-ambe lalukalaam vu yiy.” ¹² Tombe lanêêl silate anutu voon-ate yuuh lak Banabas ayuuh Pol, ango haale nambe Sus lak Banabas, de ango haale nambe Hemis lak Pol in nambe yoo nakaas lôôt. ¹³ Tombe kul vaha sen natung salivangin vu Sus hôôk yite dumb sen naale taakuuju nanyendanggaa-to, ond hako kao moow heey osin ngaoola be hato vinavi in nambe na gaving hil-ambe lana gatung salivangin vu yuuh.

¹⁴ Sinaale Banabas ayuuh Pol langoyin atombe yuuh lakweek yuuhate lolop in yuuh alondpayo nimeen lôôt, de yuuh latup-ambe lala daale dateey bopaata hôôk hil lavuunaatôôv nambe, ¹⁵ + o 14:15 Sin 10:26; Saam 146:6*“Ham hil-e, ham navu ambiing vaatii-ja? Yik haay omaahonôôn nambe ham-anja. Lemu haay naanêêl banye nivasa vu ham in nambe ham gavuuuh va malis nambêênja na, de ham anggilin ham nom vu Anutu metumin-ate sen hatung baandoni osin ngaanggis de lôôy having va pin sen nando hôôk-ato. ¹⁶ + o 14:16 Sin 17:30*Keen, vu bôôy ond hil pin oo mondawiing va lohvu sil akand de Anutu me-nêêlin e, ¹⁷ + o 14:17 Saam 147:8; Jer 5:24*lemu Anutu-te samu samu taato yi nambe nando keen,

in navu luk vu baandoni natolak-ambe vanôn pin nalup nivasa, osin navu vanôn-ambe nalo-hvu ham pin, de nawiing-ambe ham nando osin ham alompayo nivasa.”

¹⁸ Yuuh lanêêl vakasin-anju lemu hil aniwêêk lôôt nambe gatung salivangin vu yuuh, le ma de yuuh lanêêl lôôt atombe hil-ame latung salivangin e.

Layiis Pol ak tatuuh

¹⁹ + o 14:19 Sin 17:13; 2Ko 11:25; 2Ti 3:11*Lung laa tonde hil Yuda vaalu vu Antiok osin Ikoniam lalup-ambe laanjiihin hil atombe layiis Pol ak tatuuh, tombe laandiiy la taaku nanyendanga in kand vu nambe yimb lung la. ²⁰ Le sim Yesu-te hil lalaam-ambe lambuuh yi tatup atombe kandi vasa hôôk-ambe laah bayêên, de samiinaanôn atombe yuuh Banabas lala Debi. ²¹ + o 14:21 Mat 28:19*Yuuh lanêêl banye nivasa langaah vu taaku-ju, tombe hil ngeeyaata latu Yesu-te hil vuu-ju vêêl e, mem yuuh lahilin vahand-ambe lalaah Listla yuuh Ikoniam-ande Antiok. ²² + o 14:22 Sin 11:23; 15:32; 18:23; Mat 7:14; 1Tes 3:3*Tombe yuuh kaandu Yesu-te hil niwêêk lôôt nambe, “Ham awii-having om ham oo baale niwêêk, in yaawiingin nambe yana Anutu-te taaku ond yiy baaku nimeen pin naamunggin e mem.” ²³ + o 14:23 Sin 13:3*Tonde yuuh laholin yêêv lohvu taaku pin in ganggin hil bel-ate, de yuuh lalakin yuuh in vanôn-ande me-laya le de yuuh lalohak in sil, be yuuh lavu yêêv-asônju lukala Omaaho Bop nama in londpayo la timu vu yi.

Yuuh lalaah taaku Antiok Silia yesin

²⁴ Yuuh lato Pisidia lavuunaatôôv-ambe latok lala Pampilia, ²⁵ tombe yuuh lanêêl tanasin vu Pampilia-te taaku bop Pega vêêl e mem yuuh lala lato Atelia. ²⁶ + o 14:26 Sin 13:1-2; 15:40*Tombe yuuh lalak sip vu Atelia be yuuh lalaah Antiok, taakuu-ju sen bôôy sil lavu yuuh lukala Anutu nama be sil kataangg Anutu in nambe dôôvu yuuh-ambe yuuh lambiing kul-ato. Om gêên yuuh lala lawiing kul lung la de yuuh latok lalaah taakuu-ju yesin laah. ²⁷ + o 14:27 Sin 11:18; 15:4,12*Tombe yuuh lasupin hil bel-ate pin, le mem yuuh latulin va pin sen Anutu hôôvu yuuh-ambe yuuh lawiing-ato vu sil, de yuuh lanêêl having nambe, “Gêên Anutu wiing-ambe hil vaalu sen sil-ame Yudaa-to lango yite tanasin-ambe lawii-having.” ²⁸ Tonde Pol ayuuh Banabas dando having sil vuu-ju lôôt.

15

Supin bop vu Yelusalem

¹ + o 15:1 Gal 5:2*Omaaheey vu Yudia lato be lanêêl tanasin vu Omaaho Bop-ate hil vu Antiok nambe, “Ham anjiinggis-ambe sil galaah ham anim naavi nohvu Mose-te gumbum, le naambe nama, ond Anutu me-le gako ham jak e.” ² + o 15:2 Sin 11:30; Gal 2:1*Lanêêl nambêênju tombe Pol ayuuh Banabas ahend kalin vu sil om sil lanêêl sil lôôt. Tombe hil bel-ate lawiing Pol ayuuh Banabas, osin sil oote hil vaalu laving-ambe lala in samu vakasin sen lanêêl sil in-anjôôto gaving sinaale-so osin himbop-aso vu Yelusalem.

³ Hil bel-ate lawiing sil lala, be laloh taaku Pinisia yuuh Samaalia lavuun in danêêl banye vu sil nambe hil vaalu sen sil-ame Yuda-a-to lahilin sil alondpayo, om Omaaho Bop-ate hil lango tombe londpayo nivasas lôôt. ⁴ + o 15:4 Sin 14:27*Tonde latok lala Yelusalem atombe hil bel-ate vuu-ju laving sinaale-so de himbop-aso lako sil lak, tonde mem Pol ayuuh Banabas latulin va pin sen Anutu hôôvu yuuh-ambe yuuh lawiing-ato vu sil. ⁵ Lemu Palisai vaalu sen lawii-having Yesu-te tanasin-ato kandi be lanêêl nambe, “Sil galaah nind naavi de ham naanêêl vu sil naambe sil oo sapa Mose-te tanasin, ond mem Anutu gako sil jak.”

⁶ Sinaale-so laving himbop-aso lasupin in nambe sil bakaas in vakasin-anju. ⁷ + o 15:7 Sin 10:1-43*Om sil lakaas ngeeyaata lôôt in vakasin-anjo, tombe Pita kandi naale be nêêl vu sil nambe, “Halingg-aso-e, bôôy ond ham alak ni nambe Anutu holin sa hôôk ham lavuun in nambe sa naanêêl banye nivasaa-to langaah vu hil vaalu sen sil-ame Yuda-a-to, in sil gango be lambiing gaving. ⁸ + o 15:8 Sin 10:44; 11:15*De Anutu yoo lak omaahonôn pin alondpayo ni, om vu Vavi Vaambuung vu sil, yik nambe sen vu vu yiyi-ato in taato naambe yi sil anivasa, ⁹ + o 15:9 Sin 10:34-35*de me-samu yiyi-ande wiing nipaya vu sil e, malis. Yik sil alondpayo la timu vu Anutu tombe kawiiy silate nipaya la, de wiing-ambe sil alondpayo nikaapulis ak. ¹⁰ + o 15:10 Mat 11:30; Gal 3:10; 5:1*Le nambe tana sen gêên ham awiingin sahi Anutu? Mose-te tanasin nimeen bopaata sen yiyi o yate himbop-aso bôôy-ato yame aalohvu nambe baakuu-to, ond nambe

tana sen ham awiingin danjingin ak Yesu-te hil?
¹¹ + o 15:11 Gal 2:16; Ep 2:5-8*Yaawii-having lak Omaaho Bop Yesu-te samu samu nambe Anutu le gako yiy ana mando metumin, de hil-anju ond yik va timu.”

¹² + o 15:12 Sin 14:27; Gal 2:9*Pita nêel nam-bêênju tombe hil pin sen lasupin-anjôoto lavand ma lôôt, de mondambe nanyend in Banabas ayuuh Pol-ate vakasin, de yuuh datulin sen Anutu hôôvu yuuh-ambe yuuh lawiing taahu taahu osin niwêêk vaha vaha vu hil vaalu sen sil-ame Yudaa-to.

¹³ Yuuh lanêel lung la tonde Jems nêel nambe, “Halingg-aso, ham gango sate vakasin e. ¹⁴ + o 15:14 Sin 15:7-9*Simon nêel vu ham lung la nambe hil vaalu sen sil-ame Yudaa-to, ond Anutu yoo ka vu munggin-ambe holin sil vaalu in daatu yite hil. ¹⁵ Tonde Anutu-te vakasin sen sil lanêel langaah bôôy-ato ond yik dangga timu nambe,

¹⁶ + o 15:16-18 Emo 9:11-12*“Omaaho Bop nêel nambe, “Vu taamusin sale aanom in saambu dôok Devit-ate bayêên sen matelak-ambe la neep-ato, om sa daav va sen wiing payaa-to dukanaah, de sa samu be nivasa jak naah, ¹⁷ in nambe omaahonôn vaalu dando ond hil vaalu sen sil-ame Yudaa-to, lemu soo haalengg lak sil lung la, om sil e mosalo Omaaho Bop.” ¹⁸ Omaaho Bop sen yoo ka vu nyendoos-ambe nêel langaah-ato ond nêel nambêênja.’

¹⁹ “Ke, om sa kangg vu nambe hil vaalu sen sil-ame Yudaa-to langgilin londpayo na vu Anutu

ond yame aambu nimeen vu sil e. ²⁰ + o 15:20 Eks 34:15-17; Jen 9:4; Lev 17:10-16*Nganjok yiyi kaavu kaapiya na vu sil naambe sil gavuuu va sen hil datung vu anutu tatuhin vaha-sôônju na, osin vêêh ayuuu moow-ame gako sil danjeen e, de melanja vahivak sen danggingg ka be nayimb-ato le, osin melanja va pin anihees e. Va yumbeyuuhanjo sil gavuuu na in nambe Yuda lanji sil nivasa, ²¹ + o 15:21 Sin 13:15*in Mose-te tanasin ond hil dasevin vu dumb alo hôôk busin sawaasin pin, de yoo danêêl lohvu taaku pin vu bôôy-ambe tok laam gêên-anjo.”

Sinaale-so lawiing kaapiya la vu Kalisi-te hil vu taaku vaalu

²² Jems nêêl vakasin-anju lung la, tonde sinaale-so de himbop-aso osin hil bel-ate pin layi nivasa, om laholin silate yêêv Yudas de haale ango nambe Basabas yuuu Silas in nambe lambiing yuuu lana Antiok gaving Pol ayuuu Banabas. ²³ De sil kaavu kaapiya ti be lavu hôôk Yudas ayuuu Silas namand, tombe kaapiyaa-ju nêêl nambe, “O halingg-aso, hey sinaale-so osin himbop-aso ond hey kaavu kaapiyaa-ja laas vu ham vaalu sen ham-ame Yudaa-to, ham vu Antiok de vu Silia pin de vu Silisia. ²⁴ + o 15:24 Sin 15:1*Ond hey hango banye nambe heyate hil vaalu lalaas-ambe lanêêl silate vakasin heey, tombe wiing-ambe ham akam yu-yuuu de ham alompayo nimeen ak, lemu hey-ame aanêêl-ambe sil lalaas e. ²⁵ Om sen hey hango banye ond hey pin aanjôôy vakasin lung la, le mem hey aaholin omaaho yuuu-ambe hey aawiing yuuu

lalaas having Banabas ayuuh Pol sen hey ahengg having yuuh lôôt-ato, ²⁶ ond yuuh-ame kand navu yuuh daka le, yuuh oo kand navu Omaaho Bop Yesu Kalisi. ²⁷ De hey aawiing Yudas ayuuh Silas lalaas-anja ond vakasin sen hey kaavu laas-anjaato yuuh oo le daanêel gaving vu ham, ²⁸ + o 15:28 Mat 23:4*in Vavi Vaambuung vêel hey alungg ak-ambe hey aanêel lung laa-ja, de hey-ame aambu nimeen vu ham lôôt e. Yik vakasin lung laa-ja, de va sen-anjo ond yik ham samu nivasa ²⁹ + o 15:29 Sin 15:20*naambe, ham-ame angga va sen datung salivangin vu anutu tatuhin vaha-sôoto le, osin ham-ame angga va pin anihees e, de ham-ame angga vahivak sen danggingg ka be nayimb-ato le, de vêêh ayuuh moow-ame gako sil danjeen e. Ham galuuh damim vu vaa-ja ond mem nivasa. Yik heyanêengg vakasin lung laa-ja. Ham mando nivasa.”

³⁰ Sil kaavu kaapiya lung la le mem lawiing-ambe sil lako be lala Antiok. Latok lala be lasupin hil bel-ate le mem lavu kaapiya vu sil, ³¹ tombe lasevin kaapiyaa-ju be mem lapêêlis in vakasin anivasa sen lukaneep kaapiyaa-to. ³² + o 15:32 Sin 11:27; 13:1; 14:22*De Yudas ayuuh Silas-anju ond yuuh danêel Anutu-te vakasin ngeeyaata lôôt langaah-ambe kaandu Omaaho Bop-ate hil, ³³ tonde yuuh dando Antiok busin ngeeyaata having sil vêel e mem londpayo nivasa de lawiing yuuh lalaah vu hil Yelusalem sen lawiing yuuh lalaam-ato. ³⁴ [Lemu Silas oo ka vu nambe mando Antiok om nando.] ³⁵ De Pol ayuuh Banabas dando Antiok, tombe yuuh laving hil vaalu be sil davu taahu hil osin danêel Omaaho Bop-ate

banye nivasa langaah.

Pol ayuuh Banabas lavuuh yuuh

³⁶ Busin heey la vêêl e mem Pol nêêl vu Banabas nambe, “Wanaah gatup hôôk taaku pin sen wala aanêêl Omaaho Bop-ate tanasin vu sil bôôy-ato, be waangge naambe hil sen lawii-having-ato dando nivasa me malis.” ³⁷ + o 15:37 Sin 12:12,25*Tombe Banabas wiingin nambe Jon sen haale ango nambe Maak-ato na gaving yuuh, ³⁸ + o 15:38 Sin 13:13; Kol 4:10*le Pol nêêl nambe, “Me-lohvu le, in omaahôô-ja ond bôôy havuuh hoow vu Pampilia de me-la wiing kul having hoow e, om wame gako yi le.” ³⁹ + o 15:39 Sin 4:36; 13:4*Tombe yuuh kalêêh yuuh lôôt om ango yoo la de ango yoo la, tombe Banabas hako Maak-ambe yuuh lalak sip-ambe lala Saiplas, ⁴⁰ + o 15:40 Sin 14:26*de Pol hako Silas-ambe yuuh lala, tombe Yesu-te hil lanêêl nambe, “Omaaho Bop-ate samu samu na gaving muuh.” ⁴¹ Tombe yuuh datup hôôk taaku Silisia yuuh Silia be davu kaandu hil bel-ate lak tanasin.

16

Pol hatup hôôk kul tu balon yuuh

¹ + o 16:1 Sin 14:6; 2Ti 1:5*Pol ayuuh Silas latok lala Debi osin Listla, tombe sim yuuh latokak Yesu-te omaaho ti vuu-ju haale nambe Timoti, ond tangganaan vêêh Yuda ti wii-having Yesu de manganaan vu Glik. ² + o 16:2 Pil 2:19-22*Tombe Omaaho Bop-ate hil vu Listla osin Ikoniam lanêêl vu Pol nambe, “Timotii-ju omaaho nivasa.” ³ + o 16:3 Gal 2:3-5*Tombe Pol wiingin nambe Timoti

na gaving yi, om hako be la halaah ninaavi in nambe hil Yuda sen dandôô-juuto lanji Timoti naambe Yuda keen ti, in sil pin lalak ni nambe mangganaaname Yuda ti le. ⁴ + o 16:4 Sin 15:23-29* Tonde mem yaal latup hôök bayêên ti ti be yaal lanêêl tanasin sen sinaale-so himbop-aso lanjôôy lung la vu Yelusalem-ato vu Yesu-te hil pin nambe, “Yik ham oo taamuyin-anja.” ⁵ + o 16:5 Sin 2:47* Tombe mem hil bel-ate lawii-having niwêêk lôôt-ambe datu ngeeyaata nalak busin pin.

Pol yi omaaho ti vu Makedonia

⁶ + o 16:6 Sin 18:23* Vavi Vaambuung nêêlin yaal nambe yaal-ame daanêêl tanasin vu hil Esia le, om yaal lala taaku Plisia yuuh Galata. ⁷ Yaal lato ngaaho vu Misia be yaal lawiingin nambe lana Bitinia, le sim Yesu-te Vavi Vaambuung nêêlin yaal, ⁸ om yaal laloh mop Misia be latok lala Toloas. ⁹ Tonde busin atombe Pol yi taahu taahu ti, ond yi de omaaho ti vu Makedonia naale be kataangg yi nambe, “Ganjakanaam lôôy vaalu in gandôôvu hey vu Makedonia.” ¹⁰ Pol yi taahu taahu-ju lung la, tonde sa having yaal-ambe hey salo mop in nambe hey ana Makedonia pavis, in hey alak ni nambe Anutu teey hey in nambe hey ana naanêêl banye nivasa vu sil.

Lidia hilin lopayo

¹¹ Om sip hako hey vu Toloas-ambe la ni-valok vu Samotles, tombe hey naahop-anju be heendiyy e mem hey aatok ala Niapolis, ¹² tombe sim hey hatup voon vuu-ju be hey aatok ala

hil Lom-ate taaku Pilipai sen tu Makedonia-te taaku bopaataa-to, be hey nando busin heey vuu-ju. ¹³ De busin sawaasin atombe hey aaloh taaku nanyendanga be hey ala hato bel ti, in heyaambe mak taaku sen Yuda dasupin osin dalohak hôök-ato neep-anju, tombe sim hey aatokak vêêh heey lasupin-ambe dando, om hey hato nando having sil-ambe hey vakaas vu sil. ¹⁴ Tombe vêêh ti vu taaku bop Taiataila haale nambe Lidia, de yite kul nambe navu tôômb amembu be hil daanggo vu yi, ond vêêh-anju nalohak vu Anutu lak busin pin, om Omaaho Bop wiing-ambe lopayo ahelavis ak, de yoo wii-having vakasin sen Pol nanêêl-ato. ¹⁵ + o 16:15 Sin 16:33; 18:8*Om lipis bel having yite hil, tonde kataangg hey-ambe nêêl niwêêk nambe, “Ham sahi nambe saawii-having Omaaho Bop keen ond ham andukanaam mando dôök sate bayêên.” Om hey ala nando having yi.

Latung Pol ayuuh Silas hôök kalaambus vu Pilipai

¹⁶ + o 16:16 Sin 19:24*Busin ti hey ala in nambe ana taaku sen dalohak nandôô-to, tombe vêêh kul vaha malis ti tovu hey vu mop. Vêêh-anju mamu nando having yi, om nanêêl vakasin sen nôôn jak vu taamusin-ato langaah, tombe hil daanggo yi om yite yêêv-aso daluh mone bopaata. ¹⁷ + o 16:17 Mak 1:24,34*Ond vêêh-anju laam-ambe navu taamuyin hey o Pol-aso, tombe nateey lôôt nambe, “Hil-anja latu Anutu baandoni-te hil kul vaha-so om danêêl Anutu-te samu samu sen gako ham jak-ato vu ham-anja.” ¹⁸ + o 16:18 Mak

16:17*Vêêh-anju yoo monateey nambêênju lak busin pin tombe Pol ahekalin ak, om hilin-ambe nêêl vu mamu sen lukando vêêh-ato nambe, “Sa naanêêl vu hong jak Yesu Kalisi

haale naambe onggavuuh vêêh-anja de gana.” Tombe mamu hato la in vêêh-anjuuto pavis.

¹⁹ Tombe sim vêêh-anjute yêêv-aso layi nambe me-datovu mone laah e, om lalôôh Pol ayuuh Silas-ambe laandiiy yuuh lala talind vu yêêv bop-aso, ²⁰ + o 16:20 Mak 13:9; Sin 17:6; Mat 5:11*tombe lako yuuh lala vu yêêv-aso be lanêêl nambe, “Omaaho yuuh-anja yuuh Yuda om yuuh lawiing-ambe hil-ame dando nivasa le, ²¹ yuuh danêêl vakasin lak gambum sen me-lohvu in nambe yiy Lom sapa hôôk-ato le.” ²² + o 16:22 2Ko 11:25; Pil 1:30; 1Tes 2:2*De yik hil bayêên-anju lanêêl vakasin ak yuuh having, om yêêv-aso lakaah yuuhate lolop, tonde lanêêl nambe hil gaveek yuuh. ²³ Om laveek yuuh lôôt, le mem latung yuuh

lukala kalaambus, de lanêêl niwêêk vu omaaho sen nanggin kalaambus-ato nambe yoo ganggin nivasa. ²⁴ Tombe yêêv kalaambus hango de lanêêl niwêêk nambêênju vu yi, om la hatung yuuh la bayêên alo sen neep lavuun-ato, le mem having yuuh vahand lak haah.

²⁵ Tonde la busin lavuun atombe Pol ayuuh Silas lalohak-ambe lawiing laalo vu Anutu, be kalaambus-aso pin deep dangoyin. ²⁶ Tonde jemaapi bopaata ti valup pavis-ambe taapinin ak bayêên kalaambus lôôt, tombe sim pavis atombe vinavi pin hataahin osin hees aniwêêk sen sil

talū kalaambus-aso lak-ato kavaayin pin. ²⁷ + o 16:27 Sin 12:18-19*Tombe yêêv kalaambus kandi le yi nambe vinavi pin hataahin, tombe sim ka vu nambe mak kalaambus-aso pin lapak-ambe lala, om hatul yite yipak in nambe yoo nyiis yi be jimb, ²⁸ lemu Pol teey bopaata lôôt nambe, “Êê, game ganyiis hong e, hey pin oo nando.” ²⁹ Tombe yêêv-anjuuto teey-ambe sil taalungg kin la, tonde hatup-ambe lukala bayêên kalaambus alo be la hato pataav baambu neep voon-ambe monahees hôôk Pol ayuuh Silas vahand. ³⁰ + o 16:30 Sin 2:37*Tonde hako yuuh-ambe la voon, le mem lingin yuuh nambe, “Himbop ayuuh, saambiing vaati in nambe Anutu gako sa jak?” ³¹ Le yuuh lanêêl nambe, “Galompayo na timu vu Omaaho Bop Yesu ond mem Anutu le gako hong jak gaving vanem o noom-aso.” ³² Tonde yuuh lanêêl Omaaho Bop-ate tanasin vu omaahôô-ju osin hil pin sen dando having yii-to. ³³ + o 16:33 Sin 16:15*Tombe yik hôôk busin-anju omaahôô-ju hako yuuh-ambe la lipis payêês sen laveek yuuh-ato, tonde yuuh lalipis yi having yite hil pin pavis lak Yesu haale. ³⁴ Tonde hako Pol ayuuh Silas-ambe lalakala yite bayêên, be vu vanôôn-ambe yuuh laya, de having yite hil pin sen sil dando hôôk bayêên tii-to be lapêêlis lôôt in lawii-having Anutu.

³⁵ Tonde langaah ak atombe yêêv-aso lawiing ahevaavu heey lato be lanêêl vu yêêv kalaambus nambe, “Onggataahin vinavi in omaaho yuuh-anjaato be yuuh lana.” ³⁶ Tombe yêêv kalaambus laah nêêl vakasin-anju vu Pol ayuuh Silas nambe,

“Yêêv bop-aso lawiing vakasin laam nambe sa gataahin vinavi de mana, om muuh gato ana osin malompayo melaas.” ³⁷ + o 16:37 Sin 22:25*Le Pol nêêl vu ahevaavu-so nambe, “Haay-anjo haay Lom* Sinaale 22:27-28* , le yoo laveek haay lak hil pin amend, de latung haay hôôk kalaambus malis amu, de me-latovu haayanêëngg vakasin ti le, ma. Le nambe tana sen davu lambiing-ambe haay gato ana kaatokin-anjo, malis lôôt. Yoo lanaam-ambe gako haay ana ond mem.”

³⁸ Tombe ahevaavu-so lako vakasin-anjo be lalaah lanêêl vu yêêv bop-aso, tombe yêêv-asôônju lango nambe yuuh Lom, om layêênin lôôt. ³⁹ + o 16:39 Mat 8:34*Tombe sil lato be samu vakasin osin melaas vu yuuh vêêl e mem lako yuuh-ambe lato lala voon, tonde sil kataangg yuuh nambe yuuh gavuuu taakuu-ju de yuuh lana. ⁴⁰ Om Pol ayuuh Silas lavuuu bayêên kalaambus-ande yuuh lala Lidia baan, tombe yuuh lakaas having Omaaho Bop-ate hil-ambe yuuh kaandu sil lak tanasin vêêl e mem yuuh lala.

17

Hil Tesalonika lawiingin nambe lanyiis Pol ayuuh Silas

* **16:37:** Hil Lom vaalu ond sil vu Lom nivalok, de vaalu ond sil-ame Lom nivalok e. In omaaho ti wiingin nambe gako haale Lom ond baanggo jak mone bop, tonde silate gambum ango neep nambe yêêv Lom ji omaaho ti nivasa ond naanêêl haale Lom jak yi. De Pol ond yi Yuda lemu mangganaan ayuuh tangganaan lako haale Lom lung la, om Pol ond yi Lom having. Gangge

¹ + o 17:1 1Tes 2:1-2*Yuuh lala mop sen la taaku Ampipolis ayuuh Apoloniaa-to be yuuh latok lala Tesalonika sen hil Yuda-te dumb ti naalêê-to. ² Tombe yik Pol wiing nambe sen yoo nawiing-ato om lukala dumb alo having sil, be sil lakaas in Anutu-te vakasin sen lukaneep kaapiyaa-to hôôk busin sawaasin yaal. ³ + o 17:3 Luk 24:26; Sin 3:18; 9:22*Nêêl tatekin lôôt-ambe taato vu sil nambe omaaho sen Anutu yoo holin yi vulôôt in nambe dôôvu yiyi-ato ond Anutu-te vakasin neep nambe le gako nivaane be jimb de kandi jak vu hil yimbin-ate, tonde nêêl having nambe, “Yesu sen sa naanêêl vu ham-anjo ond yi omaaho sen Anutu yoo holin yi vulôôt-ato.” ⁴ + o 17:4 Sin 13:50*Tombe hil sen lango vakasin-anjuuto vaalu lawii-having-ambe sil sapa Pol ayuuh Silas, de Glik sen kand navu Anutuu-to ond sil ngeeyaata lala sapa Pol ayuuh Silas having, tonde vêêh osin banyend ngeeyaata laving. ⁵ + o 17:5 1Tes 2:14*Lemu hil Yuda ahend anipaya, om lako hil anipaya heey sen yoo dando talind ayuuh amêê-to, be lasupin sil lavuh ti, le mem lala laanjiihin hil taakuu-ju lôôt, tombe sil pin kandi osin ahend kalin-ambe lambuuh Jeson ambaan, be sil salo Pol ayuuh Silas in nambe lanôôh yuuh-ambe gako yuuh na vu himbop-aso. ⁶ + o 17:6 Sin 16:20*Le me-latovu yuuh e, om sil laandiiy Jeson having Omaaho Bop-ate hil vaalu be lala vu kaansol-aso be lateey nambe, “Hil-anja dawiing-ambe hil vu taaku pin-ame dando nivasa le, de gêên lalaam dandôô-jo, ⁷ + o 17:7 Luk 23:2; Jon 19:12*tombe Jeson hako sil-ambe lala dando having yi. Sil pin-anju davu kalêêh yêêv bop Sisa

lava, de danêêl nambe silate omaaho lulemak ango nando, haale nambe Yesu.” ⁸ Tombe hil taakuu-ju pin laving kaansol-aso lango vakasin-anju, om kand yu-yuuh lôôt. ⁹ Tombe lanêêl-ambe Jeson-aso laanggo kot vêêl e mem lato lala.

Pol ayuuh Silas lala taaku Belia

¹⁰ Tonde busin hôôk atombe Omaaho Bop-ate hil lawiing Pol ayuuh Silas lala taaku Belia. Yuuh latok lala Belia tombe yuuh lahuli-lala hil Yudate dumb. ¹¹ + o 17:11 Jon 5:39*Tombe hil Yudasen dando Beliaa-ju sil anind vasa savok hil Yuda vu Tesalonika, om lako tanasin ak pavis osin londpayo nivasa, de lak busin pin ond dasevin Anutu-te kaapiya lôôt in nambe lanjak ni nambe yuuhate vakasin la lohvu me malis. ¹² + o 17:12 Sin 13:50*Tombe Yuda ngeeyaata lawii-having, be vêêh bop Glik ngeeyaata osin moow ngeeyaata laving. ¹³ + o 17:13 Sin 14:19*Tonde hil Yuda vu Tesalonika lango banye nambe Pol nêêl Anutu-te tanasin vu taaku Belia having, tombe sil lala laanjiihin hil ngeeyaata vu Belia, be sil kandi lak in nambe lambiing nindanjeen vu Pol-aso, ¹⁴ lemu Omaaho Bop-ate hil lango banye om lawiing Pol la hato lôôy pavis, de Silas ayuuh Timoti yoo dando Belia. ¹⁵ De hil sen lako Pol-ambe lalaa-to ond lako yi be lala taaku Atens, tonde sil lalaah ond lako Pol-ate vakasin laah vu Silas ayuuh Timoti nambe yuuh lana vu yi pavis.

Pol nando Atens

¹⁶ Pol monanggin Silas ayuuh Timoti vu Atens, tombe sim yi le hil taakuu-ju silate anutu tatuhin

vaha-so ngeeyaata lôôt, om yi vaa-ju le melohvu lopayo le, ¹⁷ + o 17:17 Sin 18:19*om lukala dumb alo be vakaas having hil Yuda osin hil vaalu sen kand navu Anutuu-to, de lak busin pin la nakaas having hil sen dando talind-ato. ¹⁸ Tombe hil tanasin vaha ti danêêl sil nambe Epikulian, tonde hil tanasin vaha ango danêêl sil nambe Stoik, ond lakaas having Pol, de sil vaalu lanêêl nambe, “Omaaho nakaas nindanjeen-anjo wiingin nambe naanêêl vaati?” De vaalu lanêêl nambe, “Mak nanêêl vakasin ak vaheey-ate Anutu.” In Pol nêêl Yesu-te banye nivasa osin nêêl Yesu kandi lak laah-ato vu sil ondeey lanêêl nambêênju. ¹⁹ Om lako Pol-ambe

lala vu kaansol-aso be lanêêl nambe, “Hey aawiingin nambe otatekin vakasin anindoos sen onanêêl vu hil-anjaato be hey gango le, ²⁰ in hey hango gate vakasin-anju tombe hey sahi le ango yoow, om hey aawiingin nambe anjak danggakook ani le.” ²¹ In hil Atens osin hil vaalu sen lalaam dando Atens-ato ond yoo lawiingin nambe gango vakasin mo-moos-ambe bakaas ak.

²² Om Pol la naale hôôk kaansol-aso lavuun, le mem nêêl nambe, “Ham Atens, saahe nambe ham oo nalohak vu anutu vaha vaha, ²³ de sa hatup hôôk-ambe saalohvu hamate taaku pin, de saahe va sen ham nalohak vuu-to, tombe saatokak alata ti sil kaavu vakasin ti neep ak nambe, ‘Manyinjo Anutu sen yiyi doosin-ato yite.’ Ke, Anutu sen ham doosin-ande ham monalohak vuu-ja ond peey-anjo sa naanêêl langaah vu ham. ²⁴ + o 17:24 1King 8:27; Sin 7:48*Anutu sen hatung ngaanggis osin va pin sen nando voon-anjôôto,

yik Omaaho Bop sen nanggîn baandoni osin voon-ato, ond Anutuu-ju me-nando hôok dumb sen omaahonôôn dahaav-ato le. ²⁵ + o 17:25 Saam 50:12; Ais 42:5*Anutuu-ju ond yoo navu metumin osin aviloos-ambe va pin vu omaahonôôn, om me-nativak in vati in nambe omaahonôôn namand biing kul vu yi le, malis. ²⁶ + o 17:26 Diu 32:8*De Anutu hatung omaaho timu nyendoos le mem wiing-ambe yiyi omaahonôôn pin sen yiyi nando lohvu taaku pin-ato ond yaapumak omaaho timuu-ju, tombe Anutu hatung busin sen yiyi mandôô-to osin holin yate taaku nalu ti ti sen yiyi mandôô-to vulôôt. ²⁷ + o 17:27 Ais 55:6; Saam 145:18; Jer 23:23*Yik Anutu wiingin nambe hil oo salo be palaahin, tombe daatovu yi, in me-nando diin in yiyi pin e. ²⁸ Ond yik yii-ju sen yiyi nando moos de yiyi nala de yiyi nando. Nambe sen hamate hil laalo dangga-so lanêel nambe, 'Yik yaatu yite noondin having.' ²⁹ + o 17:29 Jen 1:27; Ais 40:18-20; 44:10-17; Sin 19:26*Ke, yaatu Anutu-te noondin, om yame yakangg bu naambe Anutu ni nambe va kanu sen omaahonôôn oo kand navu be davu samu lak gool ayuuh siliva osin tatuuh-ato le. ³⁰ + o 17:30 Sin 14:16*In bôôy ond omaahonôôn doosin Anutu, om va sen sil dawiang-anjuuto ond Anutu yi mu, le sim gêên ond nêel vu hil lohvu taaku pin nambe, 'Ham anggilin ham alompayo.' ³¹ + o 17:31 Saam 9:8; 96:13; Sin 10:42*In yoo holin yite omaaho ango in nambe gangoyin hil pin-ate vakasin-ambe naanêel nivalok dôok busin sen hatung lung laa-to, om omaahôô-ju Anutu wiing-ambe kandi lak laah vu hil yimbin-ate in nambe

hil pin lanjak ni naambe Anutu yoo holin yi in kul-anju keen.”

³² Sil lango vakasin sen kandi lak vu hil yimbina-têto, tombe sil vaalu lanêel pale, de vaaluk lanêel nambe, “Buti le onaanêel vakasin-anjo be hey gango jesin naah e.” ³³ Lanêel lung atonde Pol havuuh sil-ande hato be la, ³⁴ tonde hil vaalu lawii-having Pol-ambe sil sapa yi, ond tik kaansol haale nambe Daionisias, de vêeh ango haale nambe Damalis, tonde yik hil vaalu having.

18

Pol la nando Kolint

¹ Pol nando Atens vêel e mem la Kolint,

² + o 18:2 Lom 16:3*tombe tovu Yuda ti haale nambe Akwila, baan Pontas, ond yuuh vane Plisila daahen vu Itaali be lalup, in omaaho lulemak Klodias nêel vu hil Yuda pin nambe sil gavuuh taaku bop Lom sen neep Itaali-te taakuuto de lana, om yuuh lala dando Kolint. Om Pol la vu yuuh, ³ + o 18:3 Sin 20:34; 1Ko 4:12*tombe yi nambe yaalate kul sen yaal danduuh sel bayên-atêto timu, om nando having yuuh-ambe yaal mondawiing kul-anju. ⁴ De lohvu busin sawaasin pin ond Pol la vakaas having hil hôok Yuda-te dumb alo, in nambe hil Yuda osin Glik lambiing gaving.

⁵ + o 18:5 Sin 17:14-15; 9:22*Tonde Silas ayuuh Timoti vu Makedonia be lato, le mem Pol nêel tanasin lôôt vu hil Yuda lak busin pin nambe Yesu ond omaaho sen Anutu yoo holin yi vulôôt-ato. ⁶ + o 18:6 Sin 13:46,51; 20:26; Luk 9:5*Lemu sil mahôôh Pol lôôt, osin lanêel yi pale, om tatehin

kambus sen nando lak yite lolop-ato in taato silate nipaya de nêêl vu sil nambe, “Nyevahaan naatovu ham ond yoo neep vu ham, de sak malis, de peey-anjo ond sim sana vu hil vaalu sen sil-ame Yudaa-to.” ⁷ Tombe Pol vu dumb-anju be lakala omaaho ti haale nambe Tisias Jastate bayêên, ond omaahôô-ju ka navu Anutu, de baan nando ngaaho vu hil Yuda-te dumb. ⁸ + o 18:8 1Ko 1:14*Tombe yêêv sen nanggin dumb-ato haale nambe Klispas, having vane be noondin pin lawii-having Omaaho Bop, de hil Kolint ngeeyaata lango Pol-ate tanasin, tombe yik lawii-having-ambe lalipsis bel.

⁹ + o 18:9 1Ko 2:3*De busin ti tombe Pol yi taahu taahu ti, ond yi de Omaaho Bop nêêl vu nambe, “Game ganjêênin osin game mando lavam masin e, onaanêêl lôôt, ¹⁰ + o 18:10 Jos 1:9; Ais 41:10; Jer 1:8; Jon 10:16*in sa nando having hong om omaaho ti me-le biing nindanjeen vu hong e, in sate hil ngeeyaata dando taakuu-ja.” ¹¹ Tombe Pol nando having hil Kolint lohvu ta ti be vahaan, de yoo motaahu sil hôôk Anutu-te tanasin lôôt.

¹² Lemu Galio tu hil Akaia-te yêêv bop, tombe hôôk busin-anju hil Yuda sen dando Akaiaa-to pin ond londpayo lavuh ti in nambe lambiing nindanjeen vu Pol, om lako Pol la in biing vakasin. ¹³ Tombe lanêêl nambe, “Omaahôô-ja navu taahu hil nambe lanohak vu Anutu jak tanasin ti yoow, le me-lohvu Mose-te tanasin e.” ¹⁴ Tombe Pol wiingin nambe naanêêl vakasin naah, le Galio nêêl vu hil Yuda nambe, “Ham Yuda, naambe omaahôô-jo biing va nindanjeen osin biing va nipaya lôôt, ond mem lohvu nambe sa gango

ham lavam, ¹⁵ + o 18:15 Sin 23:29; 25:18-19; Jon 18:31*le sen ham alaam vu sa in vakasin malis amu osin haale heey de ham oote tanasin, ond mam ham oo samu. Sak sa nimbaya nambe same gango vakasin jak va naambêênja le.” ¹⁶ Tonde luus sil-ambe lala. ¹⁷ Tombe lalôôh yêêv ti haale nambe Sotenis nanggan hil Yuda-te dumb, be layiis hôôk bayêên vinavi sen dawiiing vakasin hôôk-ato, lemu yêêv bop Galio me-nêêl vakasin ti le.

Pol tok laah Antiok Silia

¹⁸ + o 18:18 Sin 21:24*Pol nando Kolint busin ngeeyaata having, le mem lôôh Omaaho Bop-ate hil namand-ande la, tombe Plisila yuuh laya Akwila lala having. Tombe vu taaku Senkia ond Pol nêêl-ambe sil laving luvalus la in jôôy vakasin ti vu Anutu, tonde mem yaal lalak sip-ambe lala in lana Silia. ¹⁹ + o 18:19 Sin 17:17*Sil lala lato Epesas atombe Pol havuuh Akwila yuuh Plisila dandôô-ju, de yoo huli-la Yuda-te dumb alo be vakaas having hil Yuda. ²⁰ Tombe sim sil kataangg nambe mando busin heey gaving sil vêêl e, le Pol-ame wii-having sil lavand e, ²¹ + o 18:21 Lom 1:10; 1Ko 4:19; Jem 4:15*om lôôh sil namand-ande nêêl vu sil nambe, “Naambe Anutu wiingin ond sale aanom vu ham jesin naah.” Tonde lak sip vu Epesas-ambe la. ²² Latok lala Sisalia tombe Pol la valup-ambe vakaas having hil bel-ate vu Yelusalem vêêl e mem laah hato Antiok.

Pol hatup hôôk kul tu balon yaal

²³ Pol nando Antiok busin ngeeyaata le mem kandi lak vuu-ju be la hatup hôôk taaku Galata osin Plisia be navu kaandu Yesu-te hil pin.

Apolo nêêl tanasin vu Epesas

²⁴ Tombe Yuda ti vu Aleksandlia haale nambe Apolo, valu-nando Epesas ond omaaho yoo nakaas nivasa, de yoo lak Anutu-te tanasin sen neep hôök yite kaapiyaa-to ni, ²⁵ + o 18:25 Lom 12:11; Sin 19:3*in sil taahu yi hôök Omaaho Bop-ate mopaatôôv tombe lopayo naanjiihin yi lôôt, om yoo nanêêl osin navu taahu hil hôök va sen Yesu wiing-ato nivalok, lemu Jon-ate belipisin timu ond lak ni. ²⁶ + o 18:26 Sin 19:8*De nanêêl tanasin hôök hil Yuda-te dumb alo niwêêk lôôt, tombe Plisila yuuh laya Akwila lango, om yuuh lako be la nando having yuuh, be mem yuuh tatekin Anutu-te tanasin nivasa lôôt vu yi yesin laah. ²⁷ + o 18:27 2Ko 3:1; Kol 4:10*Tombe Apolo wiingin nambe na Akaia, om Omaaho Bop-ate hil vu Epesas laliinggis lung la le mem sil kaavu kaapiya la vu Yesu-te hil vu Akaia nambe sil gako Apolo jak nivasa. Om Apolo tok la Akaia tombe hil sen Anutu samu sil-ambe lawii-having yii-to ond Apolo hôôvu sil nivasa lôôt, ²⁸ + o 18:28 Sin 9:22; 17:3*tonde hil Yuda sen dando Akaiaa-juuto ond sil o Apolo-so lanêêl sil in tanasin hôök hil pin amend, tombe Apolo-te vakasin anivasa lôôt om sil-ame lalohvu le, in yoo tatekin Anutu-te vakasin sen neep hôök kaapiyaa-to vu sil nambe Yesu yi omaaho sen Anutu yoo holin yi vulôôt-ato.

19

Pol la Epesas

¹ + o 19:1 1Ko 3:6*Busin sen Apolo nando Kolint-ato ond Pol vu taaku Plisia be la monaloh kandu

vaalu be la hatu Epesas, tombe tovu Yesu-te hil vaalu vuu-ju, ² + o 19:2 Sin 2:38; 8:16; Jon 7:39*tombe lingin sil nambe, “Ham awii-having-ambe Vavi Vaambuung lakala ham bôôy a?” Le lanêêl nambe, “Malis, hey-ame hango nambe Vavi Vaambuung ti nando le.” ³ Tombe Pol lingin sil nambe, “De ham alipis bel lak tanasin lati?” Tombe lanêêl laah vu nambe, “Hey aalipis ak Jon-ate belipisin.” ⁴ + o 19:4 Mat 3:1-2,11*Tombe Pol nêêl nambe, “Bôôy Jon lipis hil lak bel ond sil lahilin londpayo le mem lalipis bel, de Jon nêêl vu sil nambe lambiing gaving omaaho ango sen le taamuyin yii-to, ond omaahôô-ju yik Yesu.” ⁵ Lango Pol-ate vakasin-anju tombe lalipis bel lak Omaaho Bop Yesu haale, ⁶ + o 19:6 Sin 8:17; 10:44,46*tonde Pol hambe nama lak sil, tombe Vavi Vaambuung lakala sil-ambe lakaas bayêên bu ti ti lavand osin lanêêl Anutu-te vakasin langaah. ⁷ Hil-anju sil pin lohvu nomaayuu-ambe laam yuuh.

⁸ Tonde Pol huli-la Yuda-te dumb alo, be nanêêl tanasin niwêêk lohvu kwaav yaal, ond nanêêl langaah lôôt in nambe sil dakaas ak vakasin sen Anutu nanggin yite hil-ato in nambe lambiing gaving. ⁹ + o 19:9 2Ko 6:14-18*Lemu hil vaalu londpayo niwêêk lôôt om nind baya nambe melambiing gaving e, om lanêêl vakasin anipaya lak Omaaho Bop-ate tanasin hôôk hil pin amend, om Pol havuuh hil Yuda de supin Yesu-te hil-ambe la nakaas having sil lak busin pin vu omaaho ti haale nambe Tilanas-ate dumb kaapiya. ¹⁰ + o 19:10 2Ti 1:15*Pol wiing nambêênju lohvu ta yuuh, tombe hil Yuda osin Glik sen dando lohvu

Esia-te taaku pin-ato sil pin lango Omaaho Bop-ate tanasin.

Siva noondin-ate vakasin

¹¹ + o 19:11 Sin 14:3*Anutu kaandu Pol-ambe wiing taahu taahu heey osin niwêék ti yoow, ¹² + o 19:12 Sin 5:15*om dako Pol-ate tôômb laasêép-ate yuuh ame be lala datung lak hil anilakin, tombe nind vasa nalak de mamu nipaya navuuh sil-ande hatu nala. ¹³ + o 19:13 Mak 9:38*Tonde Yuda-te hil lôômb vaalu mondatup hôök lohvu taaku pin in nambe gatiy mamu nipaya na, de sil vaalu danêél Omaaho Bop Yesu haale in nambe gatiy mamu nipaya na in hil, de lanêél vu mamu nipaya nambe, “Sa naanêél niwêék vu ham jak Yesu haale sen Pol nanêél yite vakasin-ato naambe ham gato ana.” ¹⁴ Tombe Yuda-te kul vaha sen datung salivangin-ato silate yêév bop ti haale nambe Siva, ond noow namaavaalu be vindak yuuh-ato lawiing vaa-ju, ¹⁵ + o 19:15 Mak 1:24,34*tombe mamu nipaya nêél laah vu sil nambe, “Yesu ond sa lak ni, de Pol ond sa lak ni having, lemu ham-anjo vu tana?” ¹⁶ Tombe omaaho sen mamu nipaya hôôvuu-to pasong-ambe la yiis sil lôôt-ambe laanggôól sil, tombe nind naavi nihe-hees de kweek silanêënd lolop lôôt, om sil lavuuh bayêên-anju de lapak-ambe lala nind nôôn. ¹⁷ + o 19:17 Sin 5:5,11*Tombe Yuda osin hil Glik pin sen dando Epesas-ato lango banye be layêênin lôôt, om lako Omaaho Bop Yesu haale lak, ¹⁸ de hil sen lawii-having lung laato, ond sil ngeeyaata dalaam-ambe dahôól lond-payo osin danêél va pin sen dawiiing-ato langaah.

¹⁹ Tonde hil palaas dangga osin hil lôômb dangga-so de hil sen dako naambôôy ayuuh amêê-to, ond lasupin silate kaapiya lôômb ayuuh ame-têeto be lasi lak kin lak hil pin amend. Kaapiya pin-anju laanggo lak mone bopaata lôôt lohvu 50 taosen siliva. ²⁰ + o 19:20 Sin 12:24*Tombe Omaaho Bop-ate vakasin tu bopaata be niwêêk ak.

Hil Epesas lawiing lavand ak Pol lôôt

²¹ + o 19:21 Sin 23:11; Lom 1:13*Lung atonde Vavi Vaambuung vêêl Pol aka lak, om Pol aka vu nambe na gatup hôôk na Makedonia osin Akaia vêêl e mem na Yelusalem, de nêêl nambe, “Sanaa-ju vêêl e mem taamusin atombe sana Lom gaving.” ²² + o 19:22 Lom 16:23; 2Ti 4:20*Om wiing yite omaaho yuuh sen yuuh dahôôvu yii-to, Timoti yuuh Elastas, be yuuh lala Makedonia de Pol yoo nando Esia daka having.

²³ + o 19:23 2Ko 1:8*Tombe hôôk busin-anju hil lakaas ngeeyaata in Omaaho Bop-ate tanasin, om lawiing nindaandun bopaata, ²⁴ + o 19:24 Sin 16:16*in dangga nambe omaaho ti haale nambe Demitlias, yite kul nambe navu samu va lak siliva, om yoo navu samu vêêh anutu tatuhin vaha Atemis-ate dumb kanu heey lak siliva, tombe hil daanggo vaa-ju om naluh mone bopaata be nahôôvu hil sen dawiiing kul-anjuuto. ²⁵ Tonde supin yite hil osin hil vaalu sen sil pin dawiiing kul timuu-to, le mem nêêl vu sil nambe, “Ham hil-e, ham alak ni nambe yate kul-anjo ond yiiy naaluh mone bopaata lak. ²⁶ + o 19:26 Sin 17:29*De Pol-anja ond ham ahe osin ham hango nambe navu

palapin hil ngeeyaata, lemu me-wiing vu Epesas amu le, malis, wiing-ambe lohvu taaku Esia pin, de nanêel nambe anutu sen omaahonôn namand navu samuu-to ond me-Anutu keen e. ²⁷ Tombe Pol-ate vakasin-anju navu biing-ambe yate kul-anjo haale biing paya, de yiy-ame yoote kul timuu-jo le, malis. Navu biing-ambe hil pin lanji vêh anutu bop Atemis-ate dumb bop naambe va malis, de navu daanggôl yite haale bop gaving. Anutu vêh-anju ond hil Esia pin osin hil vu taaku pin dalohak vuu-to.”

²⁸ Sil lango vakasin-anju tombe ahend kalin bopaata lôôt-ambe lateey nambe, “Yiy Epesas-ate anutu vêh Atemis bopaata.” ²⁹ + o 19:29 Sin 20:4; 27:2; Kol 4:10; Plm 24*Tonde hil pin lateey lôôt atombe taaku-ju nindaandun bopaata, de sil pin latup-ambe lala taaku sen lasupin hôök-ato, be sil lalôh hil Makedonia yuuh, Gaias ayuuh Alistakas sen yuuh davu sapa Pol-ato, be laandiy yuuh lala having sil. ³⁰ Tombe Pol wiingin nambe na baale hôök hil-anju lavuun le Yesu-te hil lanêelin, ³¹ de yêv bop heey vu Esia sen Pol-ate nipaapu sil-ato, ond lanêel banye la vu Pol having, de sil kataangg nambe me-dukana taaku supin-anju le. ³² Tombe hil pin-anjuuto lawiing nindaandun bopaata, om vaalu dateey vakasin ango, de vaalu dateey vakasin ango, tonde hil ngeeyaata doosin va sen lasupin lalaam-anjo danggakook. ³³ Tombe hil Yuda lakôh silate omaaho ti haale nambe Aleksanda la naale lavuun, tombe hil vaalu lanêel vu nambe, “Onaanêel naambênjo.” Om Aleksanda valaah nama in nambe sil lavand nama de naanêel vakasin vu sil, ³⁴ lemu sil lalak ni nambe

yi Yuda, om sil pin lavuh ti be lateey nambe, “Yiyy Epesas-ate anutu vêêh Atemis bopaata.” Sil mon-dateey nambêênju lohvu taaku me yuuh, ³⁵ tonde silate yêêv sen navu kaavu vakasin ayuuh amêê-to

naale sil lavand jeen, de nêêl nambe, “Ham Epesas, omaaho lati me-lak ni le, nambe yiyy Epesas-anjo yiyy nanggin vêêh bop Atemis-ate dumb bop osin tatuuh vaambuung sen tok vu baandonii-to? ³⁶ Omaaho ti me-le mahôôh ham in vakasin-anju le, om ham baale de ham-ame ambiing danjeen e. ³⁷ Tonde ham anggiyy omaaho yuuh-anja laam, lemu yuuh-ame lahôôndak vati hôôk dumb alo le, de yuuh-ame lanêêl yate vêêh anutuu-juuto pale le. ³⁸ De naambe Demitlias having yite kul vaha-so silate vakasin ti neep vu omaaho ti, ond busin sen lambiing vakasin-ato neep, de yêêv-aso dando, om yik sil oo lana lambiing vakasin. ³⁹ De naambe vakasin heey oo naahen neep vu ham, ond ham oo samu dôôk busin sen supin-ato nivalok. ⁴⁰ In gêên vandiisin-anjo yiyy aawiing nindanjeen om yiyy navu naatovu vakasin nyevahaan, de va sen yaawiing nindaandun-anjo danggakook keen ti me-neep e, om naambe lanjingin yiyy in danggakook ond yale naanêêl vaati?” ⁴¹ Nêêl lung la tonde luus silambe lala.

20

Pol la Makedonia osin Glik

¹ Nindaandun-anju lung la le mem Pol teey Yesu-te hil lalaam vu yi, be kaandu sil lak tanasin

heey vêel e, mem lôôh sil namand-ande la Makedonia, ² tombe yoo mokaandu hil lak tanasin vu Makedonia be la hatô Glik. ³ Pol nando Glik-ambe kwaav yaal lung la, de wiingin nambe jak sip-ambe na Silia, tombe sim hango de hil Yuda lanjôôy vakasin in nambe lanyis-ambe jimb, om ka vu nambe sapa vaha be naah osin Makedonia. ⁴ + o 20:4 Sin 19:29; 21:29; Ep 6:21*Tombe Pilas noow Sopata vu taaku Belia la having

Pol, tonde omaaho yuuh vu Tesalonika, Al-istakas ayuuh Sekandas, de Gaias vu taaku Debi, de Timoti, tonde Tikikas ayuuh Tolopimas vu Esia, hil-anju laving Pol-ambe lala. ⁵ Tombe lamunggin-ambe mondanggin haay Pol vu Toloas. ⁶ Tonde busin bop busin haluusin sen hil akand navu sen Anutu haluuh hil Islel hôôk vu Ijip bôôy-ato lung la, le mem haay alak sip vu Pilipai be haay ala. Haay monala be busin namaavaalu lung la, le mem haay aatok ala Toloas vu sil, tombe hey nandôô-ju lohvu busin namaavaalu be vindak yuuh.

Pol wiing-ambe maanggêem Toloas ti kandi vasa hôôk

⁷ + o 20:7 Sin 2:42,46*Hôôk Sonda tombe hey aasupin in hey angga vanôôn osin paasa, tonde Pol monanêel vakasin vu hil in ka vu nambe sami-inaanôôn ond navu na, om monanêel vakasin-ambe la busin lavuun ak. ⁸ Tombe sil taalungg hôôk lam ngeeyaata be monatum hôôk bayêen alopayo ti baandoni sen hey aasupin nando lak-ato, ⁹ tonde Pol oo monanêel vakasin ahusaandiin lôôt, tombe maanggêem ti haale nambe Yutikas

ond nando lak bayêên avi vu baandoni. Bayêên-anju lopayo katap yaal tombe maanggêêm-anju me monayip atombe neep la, om lupake vu lo-payo ti neep baandonii-to be la voon, tombe lala lalôôh ak osin me yimbin. ¹⁰ + o 20:10 1King 17:21*Tombe Pol luus-ambe la hato pataav-ambe neep ak maanggêêm-anju, tonde kaambi de nêel vu sil nambe, “Ham alompayo me-nimeen e, kanu nando.” ¹¹ Tonde Pol lak-ambe laah bayêên alo baandoni tombe kalêêh balet-ambe ya, tonde yoo monakaas lôôt having sil, be langaah ak e mem la. ¹² De lako maanggêêm-anjuuto be lala, de londpayo nivasa lak laah in nando moos.

Sil vu Toloas-ambe lalakala Mailitas

¹³ Pol nêel nambe noh voon-ambe na, de hey vaalu anjak sip-ambe naamunggin in naambe hey naatovu Pol vu taaku Asos ond hey gako jak sip vuu-ju. ¹⁴ Om Pol tovu hey vuu-ju tombe hey hako lak sip-ambe hey ala Mitilini. ¹⁵ Tonde hey vu Mitilini be hey monala be bus hôôk, de langaah ak atombe hey ala ngaaho vu taaku Kaios, tonde hey monala be bus hôôk, de langaah ak atombe hey aatok ala Semos, tonde hey monala be heendiiy e mem hey aatok ala taaku Mailitas. ¹⁶ De Pol aka vu nambe me-mando busin ngeey vu Esia le, ondeey hey haluuh Epesas hôôk-ande hey ala Mailitas, in yoo wiingin nambe na pavis in ji busin Pentikos vu Yelusalem.

Pol vakaas having himbop-aso vu Epesas

¹⁷ + o 20:17 Sin 18:21*Tombe vu Mailitas ond Pol nêel vakasin la Epesas vu hil bel-ate himbop-aso nambe lanaam vu yi. ¹⁸ + o 20:18 Sin 18:19;

19:10*Om sil lato be Pol nêêl vu sil nambe, “Ham oo alak ni nambe va sen saawiing nyendoos vu Esiaa-to de lohvu busin pin ond sa nando having ham. ¹⁹ + o 20:19 Sin 20:3*De hil Yuda lanjôôy vakasin in nambe daanggôôl sa om nimeen osin sahisin ngeeyaata tovu sa, lemu sa laanggôôl sa haalengg, de sa naawiing Omaaho Bop-ate kul osin sa mengg luk. ²⁰ De vakasin nivasa sen samu ham-ato ond saanêêl pin, de same aavun ti in ham e, sa taahu ham vu talind-ande vu hamate bayêên alo having. ²¹ De lak busin pin ond sa naanêêl tanasin langaah vu hil Yuda osin Glik in nambe langgilin londpayo na vu Anutu be lambiing gaving Omaaho Bop Yesu. ²² + o 20:22 Sin 19:21*Le gêên ond Vavi Vaambuung nêêl niwêêk om sa nala Yelusalem, tonde va sen le naatovu sa vu Yelusalem-ato ond sa doosin. ²³ + o 20:23 Sin 9:16; 21:4,11*Sa lak ni mu nambe lohvu taaku pin ond Vavi Vaambuung nanêêl taato vu sa nambe sale aanduus kalaambus osin nimeen naatovu sa. ²⁴ + o 20:24 Sin 21:13; 2Ti 4:7*Lemu sa kangg-ame navu sa ningg naavi nambe va nivasa in nambe sa naapuvu tatin e, malis. Soo naawiingin taamuyin mopaatôôv sen sa naaloh-ato, be saambiing kul sen Omaaho Bop Yesu vu vu saa-to jung na le. Kul-anju sa naanêêl Anutu-te banye nivasa sen Anutu nawiing samu samu vu yiy-ato langaah, ²⁵ om ham angge, gêên sa lak ni nambe ham sen sa laas-ambe saanêêl tanasin lak Anutu nanggin yite hil-ato langaah vu ham, ond ham pin-ame le angge sa mengg jesin naah e.

²⁶ + o 20:26 Sin 18:6*“Om gêên-anjo sa naanêêl langaah vu ham naambe, ham ti nambe na

menama ond me-neep vu sa le, ²⁷ in Anutu-te tanasin ond soo aanêêl pin vu ham, de same aavun vakasin ti le. ²⁸ + o 20:28 1Ti 4:16; 1Pi 5:2-4*Om ham oo ganggin ham, de ham ganggin bik sipsip pin sen Vavi Vaambuung wiing-ambe ham atu silate yêêv-ato, osin ham ganggin Anutu-te hil sen yoo vaanggo lak Noow-ate nihees-ato. ²⁹ + o 20:29 Mat 7:15; Jon 10:12*In sa lak ni nambe sa gavuuham ham-ande sana, ond voow bamaan anipaya le dukanaam ham lavuun-ambe biing nindanjeen nipaya vu Omaaho Bop-ate bik sipsip-aso lôôt. ³⁰ + o 20:30 1; Jon 2:19*Tonde hamate hil vaalu yoo le kandi be daanêêl tanasin na paya, in sil daandiiy Yesu-te hil lanaah sapa sil. ³¹ + o 20:31 Mak 13:37; Sin 19:8,10; 1Tes 2:11*Om ham amem oo naatum, de ham akam bu sen sa nando having ham lohvu ta yaal-ato ond langaah-ande busin same sawaah e, soo monaanêêl tanasin vu ham ti ti osin sa mengg luk. ³² + o 20:32 Sin 26:18*Om peey-anjo saambiing ham andukana Anutu nama osin yite vakasin samu samu in nambe ganggin ham, de lohvu nambe bu niwêêk vu ham osin bu va nivasa sen yoo hatung vu yite hil-ato vu ham. ³³ + o 20:33 1Sml 12:3; 1Ko 9:11-12*Same naawiingin hil-ate siliva yuuh gool osin tôômb ayuuh ame le, ³⁴ + o 20:34 Sin 18:3; 1Tes 2:9*yik ham oo alak ni nambe sa namangg yuuh-anjo yoo wiing kul ondeey hôôvu sa in va sen saativak in-ato, de hôôvu hil vaalu sen dando having saato having. ³⁵ + o 20:35 Mat 10:8*Tonde sa taahu ham lôôt in nambe yaambiing kul aniwêêk naam-bêênjo in yaandôôvu hil anipaya. De yakangg bu vakasin sen Omaaho Bop Yesu yoo nêêl-ato

nambe, ‘Yiyy gako va vu hil-ato ond yahengg anivasa jak, nganjo yaambu va vu hil ond le biing-ambe yahengg anivasa jak savok.’ ”

³⁶ + o 20:36 Sin 21:5*Pol nêêl vakasin-anjo lung la, tonde hatung kaatu de lohak having sil pin. ³⁷ Tombe hil pin lasu tonde sil kaambi Pol-ande lamuuh gaambôôk, ³⁸ + o 20:38 Sin 20:25*de londpayo nimeen lôôt in vakasin sen Pol nêêl nambe, “Ham-ame le angge sa mengg jesin naah e.” Lung atonde langgiy Pol la sip.

21

Pol lakala sip in na Yelusalem

¹ Hey havuuh sil-ande hey alak sip-ambe hey ala nivalok vu taaku Kos, tonde heendiyy atombe mem hey aatok ala Los, be hey haluuh Los lom-ande hey aatok ala Patala. ² Tonde sim hey aatovu sip ti nala Pinisia om hey alakalaah sip-anju be hey ala. ³ Hey monala be hey aahe taaku Saiplas neep laah osin nama kêênj tombe hey haluuh lom, de hey ala be hey aatok ala Taia sen neep Silia-te taaku-to, in sip gatung kupak mandôô-ju. ⁴ + o 21:4 Sin 20:23*Tombe hey salo Yesu-te hil vuu-ju be hey nando having sil lohvu busin namaavaalu be vindak yuuh, tonde Vavi Vaambuung vêêl sil alund ak om lanêêl vu Pol nambe me-na Yelusalem e.

⁵ + o 21:5 Sin 20:36*Hey nando be busin lung la le mem sil pin vu taaku-ju osin vanêêndin ayuuh noondin langgiy hey ala lôôy nanyendangga, tombe hey hatung kaatu de hey aalohak. ⁶ Tombe

hey aalôôh hey namangg lung la le mem hey alakala sip-ande sil lalaah sil ambaand.

Agabas vu kôôvu Pol vu Sisalia

⁷ Hey vu Taia be hey ala lôôt-ambe aatok ala Tolemes, be hey vakaas having Omaaho Bop-ate hil vuu-ju, de hey nando busin ti having sil.

⁸ + o 21:8 Sin 6:5; 8:40*Tonde samiinaanôn atombe hey kandi vu Tolemes-ambe hey aatok ala Sisalia, tombe hey ala sinaale Pilip-ate bayêên-ambe hey nando having yi. Pilip-anju laholin yi having hil namaavaalu vindak ti, in dahôôvu sinaale bop-aso munggin-ato, ⁹ + o 21:9 Sin 2:17*de nowaavêêh yumbeyuuh dando de melalak moow e, ond sil danêêl Anutu-te vakasin langaah.

¹⁰ + o 21:10 Sin 11:28*Hey nando Sisalia busin heey, tonde sim omaaho ti nanêêl Anutu-te vakasin langaah, haale nambe Agabas, ond vu Yudia be hato vu hey. ¹¹ + o 21:11 Jon 21:18; Sin 20:23; 21:33*Tombe lôôh Pol-ate let-ambe yoo duuh vaha yuuh nama de nêêl nambe, “Vavi Vaambuung nêêl nambe, ‘Hil Yuda vu Yelusalem le daanduuh let mangganaan naambêênjo, be lambu yi dukana hil vaalu sen sil-ame Yudaato namand.’ ” ¹² + o 21:12 Mat 16:22*Hey hango vakasin-anju tombe hey having hil bayêên-anju be hey aanêêl niwêêk lôôt vu Pol nambe me-jak-ambe na Yelusalem e. ¹³ + o 21:13 Sin 20:24*Le Pol nêêl vu hey nambe, “Nambe vaati sen ham nasu be ham nawiing sa longgpayo nimeen ak? Naambe sil talu sa me lanyiis sa vu Yelusalem-ambe saanggimb ak Omaaho Bop Yesu haale ond

yik lung.” ¹⁴ Om me-wii-having hey lavangg e, tombe hey lavangg ma de hey aanêêl nambe, “Omaaho Bop oote vakasin nôôn jak.”

Pol la vakaas having himbop-aso vu Yelusalem

¹⁵ Busin heey lung la vêêl e mem hey hatongin heyate va yuuh ame be hey ala valup Yelusalem, ¹⁶ tombe Yesu-te hil vaalu vu Sisalia laving hey. Sil langgiy hey-ambe hey ala nando having Neson. Neson-anju vu Saiplas de yoo wii-having Yesu bôôy. ¹⁷ Tonde hey aatok valup Yelusalem atombe Omaaho Bop-ate hil lako hey ak osin londpayo nivasa, ¹⁸ + o 21:18 Sin 15:2,13; Gal 1:19*de samiinaanôôn atombe Pol having hey-ambe hey ala vu Jems, in sil o himbop-aso pin lasupin dandôh-ju. ¹⁹ + o 21:19 Sin 15:12*Tombe Pol lôôh sil namand, tonde mem hatulin va pin sen Anutu wiing-ambe kul nôôn ak vu hil vaalu sen sil-ame Yudaa-to vu sil.

²⁰ + o 21:20 Sin 15:1,5*Himbop-aso lango Pol-ate vakasin lung la le mem lako Anutu haale lak-ambe lanêêl vu Pol nambe, “Hali-e, gangge Yuda ngeeyaata lôôt lawii-having Yesu lung la, le yoo dapuvu Mose-te tanasin aniwêêk lôôt, ²¹ + o 21:21 Sin 16:3; Gal 2:3*lemu sil lango nambe onanêêl tanasin vu hil Yuda vaalu sen dando hôôk hil ango-te taakuu-to nambe sil gavuuuh Mose-te tanasin, de sil-ame galaah noondin-aso nind naavi le, de sil-ame sapa silate gambum bôôy jesin naah e. ²² Om peey e yaambiing vaati? Keen, sil davu gango banye naambe galaam lung la, ²³ om otaamuyin va sen hey navu naanêêl

vu hong-anjo. Heyate hil yumbeyuuh lanjôôy vakasin

ti vu Anutu, ²⁴ + o 21:24 Nam 6:1-21; Sin 18:18*om onggako sil-anju be ham samu ham no-hvu Mose-te tanasin nêêl-ato, tonde ombaanggo va vu sil in nambe sil gatung salivangin jak vêêl e, ond mem lohvu nambe sil daakêêl lundvalus. Gambiing naambêênja ond hil pin e lanjak ni naambe vakasin sen lanêêl ak hong-ato nôôn ma, tonde lanjak ni gaving naambe goo navu sapa Mose-te tanasin pin. ²⁵ + o 21:25 Sin 15:28-29*De hil sen sil-ame Yudaa-to lemu lawii-having Omaaho Bop-ato, ond yiyi kaavu kaapiya be yaanêêl vu sil lung la in vakasin sen yaanjôôy bôôy-ato, nambe sil-ame lanja va sen datung salivangin vu anutu tatuhin vaha-sôôto le, de me-lanja va pin anihees e, de me-lanja vahivak sen hil danggingg ka be nayimb-ato le, tonde vêêh ayuuh moow-ame gako sil danjeen e.”

²⁶ + o 21:26 1Ko 9:20*Om samiinaanôôn atombe Pol hako hil yumbeyuuh-anju tombe wiing va pin sen samu ninaavii-to having sil. Wiing nambêênju tonde huli-la Anutu-te dumb bop alo be nêêl vu kul vaha sen datung salivangin-ato nambe sil mando be na gato busin ti le mem sil ti ti gatung silate salivangin.

Hil Yuda lalôôh Pol

²⁷ Tombe ngaaho lak in nambe busin na-maavaalu be vindak yuuh-ato jung na in sil gatung salivangin, tombe hil Yuda vu Esia layi de Pol nando hôôk Anutu-te dumb bop alo, om laanjihin hil pin-ambe lalôôh Pol, ²⁸ + o 21:28 Sin 6:13; Esi 44:7*de lateey nambe, “Ham Islel,

ham andôôvu hey. Omaahôô-jo ond yi sen nanêêl tanasin lohvu taaku pin-ambe naanggôôl yate tanasin osin yiy pin having Anutu-te dumb bop-anjo, de hako Glik heey-ambe lahuli-lalaam dumb bop alo ond yik wiing taaku vaambuung-anjo nipaya lak having.”

²⁹ + o 21:29 Sin 20:4; 2Ti 4:20*Lanêêl nambêênju in sil layi Tolopimas vu Epesas nando talind bop Yelusalem having Pol, tombe kand vu nambe mak Pol giyy-ambe huli-la Anutu-te dumb bop alo having. ³⁰ Tombe hil Yelusalem-anju pin ahend kalin lôôt, om sil latup-ambe lasupin lalaam timu be lalôôh Pol, de laandiiy vu dumb alo be lala voon, tonde laayiy vinavi sen dumb bop-anjuuto pavis.

Hil Lom-ate ngaamong vaha-so lalôôh Pol

³¹ Yoo mondayiis Pol lôôt in nambe jimb, de vakasin valup vu hil Lom ngaamong vaha-sote yêêv bop nambe hil Yelusalem pin dawiiing nindaandun bopaata. ³² Om pavis atombe hako yite hil ngaamong vaha-so heey laving yêêv ngaamong vaha-so heey, tombe latup-ambe lato vu sil. Tombe mondayiis Pol, le sim layi de hil ngaamong vaha-so laving silate yêêv bop-ambe lato, om latôômin-ambe daale. ³³ + o 21:33 Sin 20:23; 21:11*Tonde yêêv bop ngaamong vaha-te la lôôh Pol, be nêêl nambe daanduuh Pol jak hees aniwêêk yuuh, tonde lingin sil nambe, “Latii-jo? Wiing vaati?” ³⁴ Tombe hil vaalu dateey vakasin ango de vaalu dateey vakasin ango, be dawiiing nindaandun bopaata, om hil ngaamong vaha-sote yêêv bop-ame nango vakasin danggakook

anivasa le, om nêêl-ambe lako Pol la hil ngaamong vaha-so baand. ³⁵ Lala lalup vinavi tombe hil lawiingin nambe lanyiis Pol, om ngaamong vaha-so lalôôh Pol lak baandoni be lala, ³⁶ + o 21:36 Luk 23:18; Sin 22:22*in hil ngeeyaata davu taamuyin sil-ambe dateey lôôt nambe, “Ham anyiis-ambe jimb.”

Pol nêêl yite dangga tatekin vu hil Yuda

³⁷ Tombe hil ngaamong vaha-so lawiingin nambe gako Pol-ambe landukana silate bayêên alo, le Pol nêêl vu yêêv bop ngaamong vaha-te nambe, “Lohvu nambe sa naanêêl vakasin ti vu hong vêêl e?” Tombe yêêv bop-anju lingin nambe, “In onakaas Glik lavand a? ³⁸ + o 21:38 Sin 5:36-37*Sa kangg vu nambe hong Ijip ti sen bôôy gayiis ngaamong having gaaman-ato, de ohako hil ngeeyaata lohvu 4 taosen-ambe lako

yipak, de ganggiy sil lala taaku lumbalaamb.”

³⁹ Le Pol nêêl nambe, “Sak sa Yuda, de ataak hako sa neep Taasas Silisia. Sate taaku-ju taaku bopaata ti om sa kataangg hong naambe ganjiinggis-ande sa naanêêl vakasin vu hil.”

⁴⁰ Tombe yêêv bop-anju liinggis, om Pol naale lak vinavi de valaah nama lak, tombe hil pin lavand ma, le mem nêêl vakasin hôôk Yuda lavand Hiblu vu sil.

22

¹ Nêêl nambe, “Halingg-aso aamangg-aso, ham gango sate vakasin sen sa navu naanêêl vu ham-ato le.” ² Tombe hil pin lango de Pol vakaas hôôk hil Yuda lavand Hiblu vu sil om lavand ma lôôt, tonde Pol nêêl nambe, ³ + o 22:3 Sin 5:34;

Lom 10:2*“Sa Yuda, atatak hako sa neep Taasas vu Silisia-te taaku-to, lemu sa bop ak vu Yelusalemanjo. Tombe saalus Gamaaliel-ate dumb-ambe yoo taahu sa hôk yate himbop bôdy-ate tanasin pin lôôt, om soo navu sapa Anutu niwêek lôôt, yik nambe ham pin gêen-anja. ⁴ + o 22:4 Sin 8:3; 22:19*De soo monaawiing nindanjeen lôôt vu Kalisi-te hil in nambe lanjimb, moow ayuuh vêeh ond sa talu sil-ambe sa nako la kalaambus. ⁵ Be kul vaha sen datung salivangin-ato silate yêev bop having kaansol-aso pin lalak ni om sil oo daanêel gaving, in sil kaavu kaapiya vu halinggaso vu Damaskas, de lavu be sa hako be sala Damaskas in nambe sa naanduuh sil vuu-ju, be sa gako sil lanom Yelusalem in lambu nivaane vu sil.”

*Pol hatulin vakasin lak sen tu Kalisi-te hil ti
(Sinaale 9:1-19; 26:12-18)*

⁶ “Tombe sa monala be sala hatu ngaaho vu Damaskas de taaku me laam naale lavuun, tonde pavis atombe kin bopaata ti tum vu baandoni be têelang ak sa, ⁷ tombe saalupake be sala naahop voon, tonde sa hango lava ti laam vu sa nambe, ‘Saul, nambe vaati sen onawiing nindanjeen vu saa-jo?’ ⁸ Tombe saalingin nambe, ‘Omaaho Bop, olati?’ Le nêel vu sa nambe, ‘Sa Yesu Nasaale sen goo monawiing nindanjeen vu saa-jo.’ ⁹ Tombe hil sen laving saa-to layi kin-anju, lemu me-lango omaaho sen vakaas vu saa-to lava nivasa le. ¹⁰ Tombe saalingin nambe, ‘Omaaho Bop, sale aambiing naambe vaati peey?’ Le Omaaho Bop nêel vu sa nambe, ‘Okandi be gana Damaskas, le mem sale naanêel kul pin sen lak ganim lung

laa-to vu hong.’ ¹¹ Tonde sa mekanu hôôk in kin-anju têêlang hôôk sa mengg lôôt, om hil sen laving saa-to laliv namand hôôk sa de sil laandiiy sa la Damaskas.

¹² “Tombe omaaho ti haale nambe Ananaias ond yoo samu tanasin pin, tombe Yuda pin vu Damaskas layi yi nivasa, ¹³ ond hato naale having sa be nêêl nambe, ‘Hali Saul-e, gamem naatum naah.’ Tombe yik sa mengg tum pavis-ambe saahe yi. ¹⁴ Le mem nêêl nambe, ‘Yate himbop-aso bôôy silate Anutu yoo holin hong in nambe ganjak yite lopayo ni, ondeey gahe Omaaho Ni-valok osin ohango lava, ¹⁵ de gale naanêêl yite vakasin jak va

sen ohango osin gahêê-to langaah vu hil pin. ¹⁶ + o 22:16 Sin 2:21; Lom 10:13*Om onando in? Okandi be ganjipis bel de okataangg jak haale in kawiiy gate nipaya na.’

¹⁷ “Tombe saalo-valup Yelusalem-ambe sa mon-aalohak hôôk Anutu-te dumb bop alo, tombe sim sa kanungg yi ¹⁸ + o 22:18 Sin 9:29-30*de Omaaho Bop nêêl vu sa nambe, ‘Opavis. Onggavuuuh Yelusalem-ande gana pavis, in sil-ame le lambiing gaving vakasin sen onavu naanêêl jak saa-to le.’ ¹⁹ + o 22:19 Sin 8:3; Sin 26:9-11*Tombe saanêêl vu nambe, ‘Omaaho Bop, sil oo lalak ni nambe bôôy ond sa naalohvu dumb pin-ambe sa naalôôh hil sen lawii-having hong-ato, be sa natung sil hôôk kalaambus osin sa naveek sil. ²⁰ + o 22:20 Sin 7:58; 8:1*De bôôy layiis Stiven sen nanêêl gate vakasin-ato be yimb, ond sa naale having-ambe saahe nivasa, osin soo monanggin hil sen layiis Stiven-ato silate lolop.’ ²¹ + o 22:21 Sin 9:15; 13:2*Le

Omaaho Bop nêêl vu sa nambe, ‘Gana, sa navu aambiing-ambe gana dinaandiin lôôt vu hil vaalu sen sil-ame Yudaa-to.’ ”

Pol vakaas having hil Lom-ate yêêv bop ti

²² + o 22:22 Sin 21:36*Hil Yuda lango Pol-ate vakasin-anju tombe lateey bopaata nambe, “Ham anyiis-ambe jimb. Hil nambêênja me-mando metumin e.” ²³ Mondateey nambêênju de daate silate lolop osin daate kambus la baandoni, ²⁴ om yêêv bop ngaamong vaha-te nêêl-ambe lako Pol lukala ngaamong vaha-so baand, tonde nêêl vu ngaamong vaha-so nambe sil gaveek Pol de sil gango vakasin danggakook sen lawiing nindaandun lak yii-to. ²⁵ + o 22:25 Sin 16:37*Om landuuh Pol lak hees, le Pol nêêl vu hil ngaamong vaha-sote yêêv ti sen naalêê-juuto nambe, “Ham-ame gango Lom ti-te vakasin e, de ham oo gaveek yi, ond mak lohvu*?” ²⁶ Yêêv hango vakasin-anjo tombe sim la nêêl vu ngaamong vaha-sote yêêv bop nambe, “Onavu gambiing vaati? Omaahôô-ju yi Lom.” ²⁷ Tombe yêêv bop laam-ambe lingin nambe, “Onaanêêl vu sa le, hong Lom keen a?” Tombe Pol liinggis nambe, “Êê-e, keen.” ²⁸ Tombe yêêv bop-anju nêêl vu nambe, “Sa vaanggo haale Lom-anjo lak mone bopaata le mem saatu Lom.” Tonde Pol nêêl vu nambe, “Lemu sak ataak hako sa be sa Lom.” ²⁹ + o 22:29 Sin 16:38*Om hil sen lawiingin nambe gango Pol-ate vakasin-ato ond

* **22:25:** Yêêv Lom ti nambe nôôh omaaho ti in nambe biing vakasin, le me-nêêl yite vakasin danggakook langaah e, ond sil talu be gaveek in nambe naanêêl langaah. Le naambe nôôh hil Lom ti ond lanêêlin nambe me-gaveek e, de gango yite vakasin amu.

sil seelin in yi pavis, tombe yêêv bop lak ni nambe Pol Lom le talu yi, om yik yêênin having. ³⁰ Tonde hil ngaamong vaha-sote yêêv bop wiingin nambe gango nivasa naambe hil Yuda lanêel nambe Pol wiing vaati paya, om samiinaanôôn atombe sil kavaayin hees aniwêek in Pol, tonde wiing vakasin la vu yêêv sen datung salivangin-ato osin kaansol-aso pin, be sil lasupin lalaam, le mem hako Pol la hato naale hôök sil amend.

23

Pol la naale kaansol-aso mend

¹ + o 23:1 Sin 24:16*Pol nayi kaansol-aso niwêek lôôt le mem nêel nambe, “Halingg-aso, sa kangg vu nambe va sen Anutu nayi nambe nivasaa-to, ond soo monaawiing vu bôôy-ambe tok laam gêên-anjo.” ² + o 23:2 Jon 18:22-23*Nêel nambêênju tombe kul vaha sen datung salivangin-ato silate yêêv bop Ananias nêel vu hil sen daale ngaaho vu Pol-ato nambe, “Ham patap avi.” ³ + o 23:3 Mat 23:27*Tombe Pol nêel vu nambe, “Onavu kaasiy galompayo lak va nivasa malis amu, lemu Anutu le nyiis hong. Onandôô-ja in sahi sate vakasin nohvu tanasin a? Le okalêeh tanasin de ganêel nambe lanyiis sa.” ⁴ Tombe hil sen daale ngaaho vu Pol-ato lanêel vu nambe, “Ganêel vakasin anipaya lak Anutu-te yêêv bop salivangin-ate in?” ⁵ + o 23:5 Eks 22:28*Le Pol nêel laah nambe, “Halingg-aso, tanasin neep hôök kaapiya nambe, ‘Game naanêel vakasin anipaya jak gate yêêv-aso sen ham timuu-to le,’ lemu saambe mak kul vaha salivangin-ate me-te yêêv bop yi le, ondeey saanêel nambêênja.”

⁶ + o 23:6 Sin 4:2; 24:15,21; 26:5*Pol lak ni nambe kaansol-asôônju sil vaalu Sadusi de vaalu Palisai, om nêêl bopaata vu sil nambe, “Halinggaso, sa Palisai de Palisai noondin sa. Saawiihaving nambe Anutu le biing-ambe hil yimbin e kandi jak naah, yik danggakook-anja sen sil lawiing vakasin vu saa-jo.” ⁷ Nêêl vakasin-anjo tombe Palisai yuuh Sadusi lanêêl sil vaha-vahaan, ⁸ + o 23:8 Mat 22:23*in hil Sadusi danêêl nambe hil yimbin-ame le kandi jak e, de angela osin mamu me-nando le, lemu Palisai lawiihaving va yaalanjo. ⁹ + o 23:9 Sin 25:25*Tombe lawiing nindaandun bopaata, om hil Palisai-te tanasin danggaso vaalu lateey niwêêk lôôt nambe, “Hey-ame aatovu va nipaya ti vu omaahôô-ja le, mak mamu ti me angela ti nêêl vakasin vu yii-ja.” ¹⁰ Tombe sil lanêêl sil bopaata lôôt, om yêêv bop ngaamong vaha-te yêênin nambe hil-anju le daandiiy Pol naah-ande nom atombe ninaavi bapuuuh, om nêêl-ambe hil ngaamong vaha-so lala lavu vêêl Pol in hil-anju, de lako lukala silate bayêên alo. ¹¹ + o 23:11 Sin 18:9; 19:21; 27:24; 28:16,23*Tonde hôôk busin atombe Omaaho Bop naale having Pol be nêêl nambe, “Galompayo niwêêk in ganêêl sate vakasin langaah vu Yelusalem-anjo, tonde gale gana naanêêl langaah vu Lom gaving.”

Yuda landuuh vakasin nambe lanyiis Pol-ambe jimb

¹² Samiinaanôn atombe Yuda lasupin-ambe landuuh vakasin nambe sil-ame lanja vanôn osin daanum e, de lanyiis Pol-ambe jimb e mem. De sil lanjôôy vakasin nambe sil tatuhin ond

Anutu le nyiis sil-ambe lanjimb. ¹³ Tombe hil sen lanjôôy vakasin lak Pol-anjôôto sil ngeeyaata savok doo-yuuh la, ¹⁴ ond sil lala vu kul vaha sen datang salivangin-ato silate yêêv-*aso* osin himbop-*aso* be lanêêl vu sil nambe, “Hey aan-duuh vakasin lung la nambe hey-ame angga vanôôn daka le, hey oo mando be hey aanyiis Pol jimb e mem, de hey aanjôôy vakasin nambe hey tatuhin ond Anutu le nyiis hey-ambe hey aang-gimb. ¹⁵ + o 23:15 Sin 25:3*Om ham o kaansol-*aso* ambiing vakasin na vu yêêv bop ngaamong vaha-te naambe ham awiingin nambe ham gango Pol-ate vakasin danggakook anivasa jesin naah e, om sil gako Pol naam vu ham. De hey samu hey lung la in nambe gato mop lavuun ond hey aanyiis-ambe jimb.”

¹⁶ Lung laa tonde Pol maha hango nambe hil latung dum in nambe lanyiis Pol-ambe jimb, om la valup hil ngaamong vaha-so baand-ambe lukala be nêêl vu Pol, ¹⁷ tombe Pol teey yêêv ngaamong vaha ti laam-ambe nêêl vu nambe, “Onaanggiy maanggêem-*anjo* na vu hamate yêêv bop in wiingin nambe naanêêl vakasin ti vu yi.” ¹⁸ Om yêêv hako be yuuh lala vu yêêv bop tombe nêêl nambe, “Pol sen kalaambus-ato teey sa be

kataangg nambe sa gako maanggêem-*anjo* naam vu hong in wiingin nambe naanêêl vakasin ti vu hong.” ¹⁹ Tombe yêêv bop ngaamong vaha-têenju lôôh hôôk maanggêem nama, de laandiiy-ambe yuuh lala daale lundoos e mem lingin nambe, “Gawiingin naanêêl vaati vu sa?” ²⁰ Tombe mem nêêl vu nambe, “Hil Yuda landuuh

vakasin lung la nambe sil kataangg hong naambe onggako Pol na gato vu kaansol-aso jeey, ond sil davu tatuhin in nambe sil gango Pol-ate vakasin danggakook nivasa jesin naah, ²¹ om gêên mon-danggin hong in nambe ganjiinggis in sil lavand. Lemu game gango sil lavand e, in silate hil vaalu ngeeyaata lôôt savok doo-yuuh la datung dum in nambe lanyiis Pol, de sil lanjôôy vakasin nambe me-lanja osin daanum e, de lanyiis Pol-ambe jimb e mem, de sil lanjôôy vakasin having nambe sil tatuhin ond Anutu le nyiis sil-ambe lanjimb.” ²² Tombe yêêv bop vu kôôvu nambe, “Game naanêêl vu omaaho ti naambe galaam-ambe ganêêl vakasin-anjo langaah vu sa le.” Tonde nêêl-ambe la.

Lako Pol la vu yêêv bop Piliks

²³ Tombe hil ngaamong vaha-sote yêêv bop teey yite yêêv yuuhapim lalaam-ambe nêêl vu yuuh nambe, “Manggolin hil ngaamong vaha nohvu 200, de manggolin hil 70 gaving in lanjamento hôôs, de hil 200 in sil lanôôh yiy lungg, tombe ham ana Sisalia peey busin dôôk taaku me namaavaalu be vindak yumbeyuuh. ²⁴ De ham samu hôôs heey vu Pol gaving in jamando be na, tombe ham oo gako yi nivasa be ham ambu dukana yêêv bop Piliks nama.” ²⁵ De yêêv bop-anju kaavu kaapiya having nambe, ²⁶ “Sa Klodias Lisias kaavu kaapiyaa-jo laas vu hong omaaho osin haalem bop yêêv bop Piliks. ²⁷ + o 23:27 Sin 21:30-33; 22:25-27*Sa naanêêl vu hong naambe Yuda lalôôh omaahôô-ja be lawiingin nambe lanyiis-ambe jimb, lemu sa hango nambe

yi Lom om sa having hil ngaamong vaha-so be hey ala aavu vêêl yi hôôk sil namand. ²⁸ + o 23:28 Sin 22:30*Tombe saawiingin nambe gango yite vakasin danggakook sen sil lanêêl lak yii-to, om sa hako la hatu vu silate kaansol-aso. ²⁹ + o 23:29 Sin 18:14-15*Tombe saahe le sil akand vu vakasin lak sil oote tanasin vaalu, om sil lanêêl vakasin lak yi, de same aatokak vakasin ti neep in nambe yaanyiis-ambe jimb e, me yiy gatung hôôk kalaambus e. ³⁰ + o 23:30 Sin 24:5-8*Tonde sim vakasin ti valu-vu sa nambe landuuh vakasin kaatokin nambe lanyiis omaahôô-ja be jimb, om saawiing laas vu hong pavis, de saanêêl vu hil sen sil lanêêl vakasin ak yii-to nambe sil oo lanaas daanêêl vakasin sen lanêêl lak yii-to vu hong. Yik vakasin lung laa-ja.”

³¹ Tombe hil ngaamong vaha-so lango vakasin om lako Pol-ambe lala hôôk busin, tombe latok lala Antipatlis. ³² Tonde samiinaanôôn atombe hil ngaamong vaha-so lalaah sil ambaand, de hil sen dando lak hôôs-ato ond yoo lako Pol-ambe lala. ³³ Tombe latok lala Sisalia be lavu kaapiya vu yêêv bop tonde lako Pol la vu. ³⁴ Tombe yêêv bop sevin kaapiya le mem lingin Pol nambe, “Hong vu tana?” Le Pol nêêl nambe, “Sa vu Silisia.” ³⁵ Tombe yêêv bop nêêl nambe, “Hil sen danêêl vakasin ak hong-ato balup e mem sa gango gate vakasin.” Tonde nêêl-ambe sil oo mondanggin Pol nando hôôk Helot-ate bayêên.

24

Yêêv bop Piliks nangoyin Pol-ate vakasin

¹ Busin namaavaalu lung la vêêl e mem kul vaha sen datung salivangin-ato silate yêêv bop Ananias having himbop-aso be lato, de sil ti haale nambe Tetaalas ond yoo yite kul nambe naanêêl hil-ate vakasin vu yêêv gaaman-aso, ond lala lato tombe latulin vakasin sen lawiingin nambe daanêêl lak Pol-ato vu yêêv bop. ² Yêêv bop teey Pol-ambe laam e mem Tetaalas nêêl vakasin lak Pol nambe, “O himbop Piliks, goo nahôôvu hey om hey nando nivasa lôôt de ngaamong ayuuh ame ma, de hong omaaho galumkook bop om ohatongin va pin sen bôôy wiing paya lohvu taaku pin-ato. ³ Om hey aahe va sen gawiing-anja be hey alonggpayo nivasa lôôt lak busin pin. ⁴ Le same aanggilin hong lôôt e, yik sa kataangg hong naambe hong omaaho nivasa om onggango heyanêêngg vakasin boow dakaajo. ⁵ + o 24:5 Sin 17:6*In hey aahe de omaahôô-ja nipaya de naanjiihin hil Yuda lohvu taaku pin-ambe me-dando nivasa le, de tu tanasin vaha ti sen danêêl sil nambe Nasalet-ato ond silate lukook bop ti. ⁶ + o 24:6 Sin 21:28-30*Tombe wiingin nambe biing-ambe Anutu-te dumb bop anipaya jak om hey aalôôh yi, [de hey aawiingin sahi yite vakasin jak heyate tanasin, ⁷ lemu yêêv bop ngaamong vaha-te Lisias valu-handu hey-ande vu vêêl omaahôô-ju pavis in hey, de hako be la, ⁸ de nêêl nambe hil sen lawiing vakasin ak yii-to ond lanaam vu hong.] Om goo ganjingin omaahôô-ja lôôt, le mem yoo le naanêêl va pin sen hey aawiing vakasin vu yii-jôôto vu hong.” ⁹ Tombe yik hil Yuda lahôôvu Tetaalas om lanêêl vakasin lak Pol having nambe, “Vakasin pin-anja

keen lôôt.”

Pol hatulin yite vakasin vu Piliks

¹⁰ Om yêêv bop vêêl ka lak vu Pol, tombe Pol nêêl nambe, “Sa lak ni nambe goo monangoyin hil-anjote vakasin vu bôôy-ambe tok laam gêên-anjo, om sa longgpayo nivasa be sa naanêêl sate vakasin vu hong. ¹¹ + o 24:11 Sin 21:17*De naambe ganjingin hil ond le daanêêl naambe sa valup Yelusalem in nambe saanohak ond gêên lohvu busin nomaayuuh-ambe laam yuuh lung laa-jo, ¹² de same naanêêl omaaho ti hôôk Anutu-te dumb bop alo be hil Yuda latokak sa le, de same naanjiihin hil vu dumb vaalu lopayo me vu talind in nambe sil ahend kalin e, ¹³ de vakasin sen lawiing vu sa gêên-anjo ond sil-ame lalohvu nambe daanêêl vakasin nôôn keen ti vu hong e, nôôn ma. ¹⁴ + o 24:14 Sin 24:5*Lemu sa naanêêl vakasin-anjo danggakook ti langaah vu hong naambe, sa naalohak vu hey o himbop bôôy-asote Anutu lak tanasin sen hil-anja lanêêl

nambe tanasin vaha ti yoow-ato, de saawii-having Mose-te tanasin pin osin Anutu-te vakasin sen yite hil vaalu kaavu langaah-ambe neep hôôk kaapiyaa-to having. ¹⁵ + o 24:15 Jon 5:28-29*De saawii-having, yik nambe sen hil-anja, nambe Anutu le biing-ambe hil yimbin kandi jak, hil anivalok osin hil anipaya pin le kandi jak, ¹⁶ + o 24:16 Sin 23:1*ondeey soo monaawiing niwêêk in nambe sa longgpayo yoo nanjip nivasa dôôk Anutu osin omaahonôôn amend jak busin pin. ¹⁷ + o 24:17 Lom 15:25-26; Gal 2:10*Tonde sala nando ta hey vu bayêên vaalu, de saalo-valup

Yelusalem ond sa hako mone yuuh ame having in dôôvu hil Yuda sen dativak in va yuuh amê-to, osin sala hatung salivangin vu Anutu. ¹⁸ + o 24:18 Sin 21:26-27*De sa samu sa be sa nando hôôk Anutu-te dumb bop alo tombe sil latovu sa, de vaheey-ame dando having sa le, de vaheey-ame dawiing nindaandun e. ¹⁹ Lemu hil Yuda heey oo vu Esia be lalup atombe lalôôh sa, om naambe hil-anju silate vakasin ti neep vu sa ond sil oo lanaam baale hôôk gamem-ambe daanêel vu sa ond mem nivasa. ²⁰ Le naambe malis ond hil sen daalêê-jo latokak nambe sanêêngg vakasin ti neep sen sa naale hôôk kaansol-aso mend-ato nambe saawiing vati paya, ond yoo daanêel vu hong. ²¹ + o 24:21 Sin 23:6*Mak vakasin timu sen sa naale hôôk sil amend-ambe saateey vu sil bôôy-anjuuto, nambe saawii-having nambe Anutu le biing-ambe hil yimbin e kandi jak naah, yik danggakook-anja sen gêên lawiing vakasin vu saa-jo.”

²² + o 24:22 Sin 23:26*Tombe yêêv bop Piliks lak vakasin sen Omaaho Bop-ate hil lawii-having-anju danggakook ani om nêel vu hil Yuda nambe, “Ham ganggin-ande yêêv bop ngaamong vaha-te Lisias gato le mem sale gango hamate vakasin-anja be sa naanêel.” ²³ + o 24:23 Sin 27:3; 28:16,30*Tonde nêel vu hil ngaamong vaha-sote yêêv nambe, “Ongganggin Pol, lemu game gambu teenin yi lôôt e, de yite hil lawiingin nambe landôôvu yi in va yuuh ame, ond game naanêelin e.”

Piliks vu teenin Pol lohvu ta yuuh

24 Busin heey lung la vêêl e mem Piliks ayuuh vane Dalusila lato, vêêh-anju yi Yuda. Tombe Piliks teey Pol laam-ambe hango de Pol tatekin Yesu Kalisi-te danggakook sen lawii-having yii-to vu yi, ²⁵ + o 24:25 Jon 16:8*tonde nêêl vakasin nambe yaambiing va na nivalok, de yiy ganggin yiy vu va nipaya, tonde Anutu le gangoyin yate vakasin vu taamusin. Pol nêêl nambêênjo tombe Piliks yêênin lôôt, om nêêl nambe, “Gana le, de sa naatovu busin ti le mem sa naateey hong jesin naah.” ²⁶ Tonde Piliks yoo ka monavu nambe Pol e bu mone heey vu in nyiis yite vakasin jimb, om nanêêl-ambe Pol la nakaas having yi.

²⁷ + o 24:27 Sin 25:9*Tonde ta yuuh la lung la tombe Posias Pestas hako kul lak lukalaah Piliks ahembaan, de Piliks wiingin nambe hil Yuda lanji yi nivasa, om me-teey Pol-ambe hato la le, yoo vu teenin Pol-ambe nando de la.

25

Pol nêêl nambe Sisa gango yite vakasin

¹ Pestas hako yite kul yêêv ak-ambe nando lohvu busin yaal vêêl e mem vu Sisalia be la valup Yelusalem. ² + o 25:2 Sin 24:1; 25:15*Tombe kul vaha sen datung salivangin-ato silate yêêv-aso osin hil Yuda-te himbop-aso lala vu yi,

be sil latulin vakasin sen sil layi Pol payaa-to, de sil kataangg niwêêk lôôt nambe, ³ + o 25:3 Sin 23:15*“Gandôovu hey-ambe gambiing omaahôôju naam Yelusalem vu hey.” Lanêêl nambêênju in kand vu nambe Pol naam atonde langgôôpis-ambe lanyiis vu mop lavuun-ambe jimb. ⁴ Tombe Pestas nêêl laah vu sil nambe, “Sil mondanggin

Pol nando Sisalia, de sa mando daka vêêl e mem sa naah-anju, ⁵ om hamate yêêv-aso gaving sa be hey aanduus-ambe hey ana, le mem naambe yinêên nipaya ti neep ond lambiing vakasin vu yi.”

⁶ Pestas nando busin namaavaalu be vindak yaal me mak busin nomaayuuh lung la le mem laah hato Sisalia, de samiinaanôôn atombe lakala nando bayêên sen dawiiing vakasin hôôk-ato, de nêêl-ambe lako Pol laam. ⁷ + o 25:7 Sin 24:5-6,13*Tombe Pol la hato le mem hil Yuda sen sil vu Yelusalem-ambe lala latôô-juuto, ond sil lambuuh Pol tatup-ambe lawiing vakasin animeen ngeeyaata lak Pol, lemu me-latokak vakasin danggakook keen ti le, ⁸ om Pol nêêl nambe, “Same naanêêl vakasin ti paya lak hil Yuda-te tanasin, me lak Anutu-te dumb bop, me lak Lomate yêêv bop Sisa having e, malis.” ⁹ + o 25:9 Sin 24:27*Tombe Pestas wiingin nambe hil Yuda lanji yi nivasa om lingin Pol nambe, “De gawiingin nambe gana balup Yelusalem in sa gango gate vakasin vuu-ju?” ¹⁰ Le Pol nêêl nambe, “Sa naale hôôk Sisa-te yêêv bop hong gamem-anjo, om saambiing vakasin mandôô-jo ond mem lohvu, de goo galak ni lung la nambe same aawiing va nipaya ti vu hil Yuda le. ¹¹ Om naambe sanêêngg nipaya ti neep de saawiing va nipaya ti lohvu lanyiis sa be saanggimb, ond same aawiingin nambe napak e. Le naambe vakasin sen lawiing vu saa-jo me-nôôn keen e, ond omaaho ti melohvu nambe bu sa dukana sil namand e, om saawiingin Sisa gango sate vakasin.” ¹² Tombe Pestas vakaas having yite yêêv-aso vêêl e mem

nêêl vu Pol nambe, “Ganêêl nambe Sisa gango gate vakasin, om lung-ande gale gana vu Sisa.”

Pestas nêêl Pol-ate vakasin vu Aglipa

¹³ Busin heey la vêêl e mem Yuda-te omaaho lulemak Aglipa yuuh vanga Benaisi lato Sisalia in nambe lanji Pestas, ¹⁴ + o 25:14 Sin 24:27*tombe yuuh dandôô-ju busin ngeeyaata,

om Pestas nêêl Pol-ate vakasin vu omaaho lulemak Aglipa nambe, “Piliiks vu teenin omaaho ti be yoo nando bôôy-ande la, ¹⁵ + o 25:15 Sin 25:1-2*de sala nando Yelusalem bôôy-ato ond kul vaha sen datung salivangin-ato silate yêêv-aso osin hil Yuda-te himbop-aso lawiing vakasin lak yi, de lanêêl vu sa nambe sa naanêêl-ande hil lanyiis-ambe jimb, ¹⁶ lemu saanêêl laah vu sil nambe, ‘Hey Lom-ate gambum nambe hey-ame aambu omaaho ti dukana hil namand malis e. Omaaho ti sen hil lanêêl nambe wiing vati payaa-to, ond yoo baale hil sen lawiing vakasin vu yii-to mend, le

mem yoo naanêêl yite vakasin gaving.’
¹⁷ Tombe hil-anja laving sa be lalaam, le same hanggin e, yik samiinaanôôn atombe sa lakala nando lak bayêên sen dawiiing vakasin hôôk-ato, tonde saanêêl-ambe lako Pol laam. ¹⁸ + o 25:18-19 Sin 18:15*Tombe hil-anja daale be lawiing vakasin vu yi, tombe sa kangg vu nambe davu daanêêl naambe wiing va nipaya heey, ¹⁹ le ma de sil oo lanêêl vakasin lak sil oote tanasin sen davu sapa Anutuu-to, tonde vakasin ango lak omaaho ti yimb, haale nambe Yesu, ond Pol nanêêl nambe omaahôô-ju nando metumin gêên.
²⁰ + o 25:20-21 Sin 25:9-12*Tombe sa hangoyin

Pol-ate vakasin, le sa doosin danggakook lôôt om saalingin yi nambe, ‘De gawiingin nambe gana balup Yelusalem e mem sa gango gate vakasin-anjo vuu-ju?’ ²¹ Lemu Pol nêêl nambe ahevaavu-so yoo mongganggin yi mandôô-jo in wiingin nambe Sisa gango yite vakasin, om saanêêl nambe sil ganggin yi vêêl e mem sale aambiing na vu Sisa.” ²² Tombe Aglipa nêêl vu Pestas nambe, “Soo aawiingin nambe gango omaahôô-ju naanêêl yite vakasin.” Tombe Pestas nêêl nambe, “Jeey e mem onggango.”

²³ + o 25:23 Mat 10:18; Mak 13:9*Om sami-inaanôôn atombe Aglipa yuuh Benaisi lalaam osin vunakin amengali ngeeyaata lôôt, be yuuh lahuli-lala bayêên sen dawiiing vakasin hôôk-ato lopayo having yêêv bop ngaamong vaha-so heey, tonde himbop bayêên dangga-so heey laving, le mem Pestas nêêl-ambe lako Pol laam, ²⁴ + o 25:24 Sin 22:22; 25:2,7*tombe Pestas nêêl nambe, “O omaaho lulemak Aglipa, de ham pin sen ham nando having hey-anjo, ham angge omaahôô-ja, ond hil Yuda pin vu Yelusalem, de vuu-jo having, ond lalaam vu sa be lateey niwêêk lôôt nambe me-mando metumin e, ²⁵ lemu saahe de me-wiing vati paya lohvu nambe jimb e. Nganjo yoo nêêl nambe Sisa gango yite vakasin ondeey saanêêl lung la nambe saambiing-ambe na vu Sisa, ²⁶ lemu same aatokak yite vakasin ti neep langaah in nambe sa kaavu kaapiya na vu yate himbop Sisa le. Om omaaho lulemak Aglipa, saanggiy omaahôô-jo laam vu hong, de ham pin sen-anjo having, in nambe yiy gango yite vakasin nivasa be yiy naatokak yite vakasin heey, le mem

sa kaavu hôök kaapiya. ²⁷ In nambe saambiing kalaambus ti na vu Sisa, le same aambiing vakasin sen lawiing ak yii-to na gaving e, ond manyinjo sa sahi le me-lohvu le.”

26

Pol tatekin yite vakasin vu Aglipa

¹ Tombe Aglipa nêêl vu Pol nambe, “Om hong-o, onaanêêl gate vakasin.” Tombe Pol nama lak-ande nêêl nambe, ² “O omaaho lulemak Aglipa, sa longgpayo nivasa lôôt in sa navu tatekin sate vakasin vu hong peey jak va pin sen hil Yuda lawiing vakasin lak saa-to, ³ in goo galak Yuda-te gambum ani lung la, osin vakasin pin sen hey naanêêl hey in-ato, om sa kataangg hong naambe onggango sate vakasin lôôt de game ganimtambo jak pavis e.

⁴ “De sa naanêêl vu hong naambe, hil Yuda pin lalak ni nambe vu bôôy sen sa unoopasiv-ato be tok laam gêên-anjo, ond sa nando having sate hil osin sa nando Yelusalem, ⁵ + o 26:5 Pil 3:5-6*om naambe hil Yuda lanji nivasa ond sil oo kaandu sate vakasin gaving, in lalak ni nambe soo navu sapa hey Palisai-te gambum aniwêêk lôôt savok Yuda-te gambum vaalu la. ⁶ + o 26:6 Sin 23:6; 28:20*De gêên lawiing vakasin vu sa be sa laam naalêê-jo, ond danggakook nambe saawii-having-ambe sa nanggin vakasin anivasa sen Anutu jôôy lung la vu yate himbop-aso bôôy-ato nambe nôôn jak. ⁷ De yate himbop-aso bôôy dangga nomaayuuh-ambe laam yuuh oo mon-dalohak vu Anutu niwêêk lôôt hôök busin-ande

langaah, de lawii-having-ambe danggin vakasin timuu-ju in nambe daatovu nôôn, tombe yik sa having. O omaaho lulemak, saawii-having-ambe sa nanggîn vakasin-anju, ond danggakook-anju sen hil Yuda lawiing vakasin lak saa-jo. ⁸ Le nambe vaati sen ham vaalu kam vu nambe yame aambiing gaving naambe Anutu me-le biing-ambe hil yimbin kandi jak e?

⁹ + o 26:9 Sin 8:3*“Tonde bôôy sa kangg oo vu nambe sa daanggôôl Yesu Nasaalet haale ond mem nivasa, ¹⁰ om sa laanggôôl haale vu Yelusalem, de kul vaha sen datung salivangin-ato silate yêêv-aso lanêêl nambe saambiing vaa-jo jak sil haalend, om saanduuh Anutu-te hil ngeeyaata lôôt-ambe sa hatung sil hôôk kalaambus, de lanjôôy silate vakasin in nambe lanyiis Anutu-te hil-anju be lanjimb, ond yik sa having. ¹¹ De lak busin pin saavu nimeen vu sil hôôk dumb pin, tonde sa haanjiihin sil in nambe daanêêl Omaaho Bop pale, de sahengg kalin bopaata lôôt vu sil om sala aawiing nindanjeen vu sil vu taaku vaalu sen neep diin-ato having.”

*Pol hatulin vakasin lak sen tu Kalisi-te hil ti
(Sinaale 9:3-19; 22:6-16)*

¹² “Om sa hako kaapiya be sala Damaskas lak yêêv-aso salivangin-ate haalend. ¹³ O omaaho lulemak, sa monala mopaatôôv tonde taaku me laam naale lavuun, tombe saahe kin ti vu baandoni be laam têêlang lôôt kaluuh taaku me, ond têêlang ak sa osin hil sen laving saa-to, ¹⁴ tombe hey pin aalupake be ala naahop voon.

Tonde sa hango vakasin ti hôôk hey Yuda la-
vangg Hiblu laam vu sa nambe, ‘Saul, nambe
vaati sen goo monawiing nindanjeen vu saa-jo?
Onawiing nambêênja lemu me-nahôôvu hong e.’
¹⁵ Tombe saalingin nambe, ‘Omaaho Bop, olati?’
Le Omaaho Bop nêêl nambe, ‘Sa Yesu sen goo
monawiing nindanjeen vu saa-jo. ¹⁶ Om okandi
baale kasiy, in sa taato sa vu hong in dangga
nambe saaholin hong in nambe onaatu sate kul
vaha, be onaanêêl va sen gahe sa lung laa-jo, osin
va sen soo le taato sa vu hong vu taamusin-ato.
¹⁷ Om sa navu aambiing-ambe gana vu hil vaalu
sen sil-ame Yudaa-to, de sale aanôôh hong vêêl
in hil Yuda osin hil vaalu namand in nambe me-
lanyiis hong-ambe ganggimb e. ¹⁸ + o 26:18 Ais
35:5; 42:7,16; Ep 2:2; Kol 1:13; Sin 20:32*Om gana
gambiing-ambe sil amend naatum in nambe sil
galuuh damind vu taaku mekanu, de langgilin
sil lanom melangaah, osin sil gavuu Saalang-ate
niwêêk na de lanom vu Anutu, be mem lambiing
gaving sa, ond mem sale kawiiy silate nipaya na,
de sil mando gaving hil pin sen Anutu yoo holin
sil lung laa-to.’

¹⁹ “O omaaho lulemak Aglipa, saahe va
baandonii-ju om same kalêêh lava le, malis. ²⁰ +
o 26:20 Mat 3:8*Saanêêl tanasin vu hil Damaskas
munggin, tonde mem saanêêl vu hil Yelusalem,
de saanêêl lohvu taaku Yudia pin osin vu hil
vaalu sen sil-ame Yudaa-to having. Saanêêl vu sil
nambe, ‘Ham galuuh damim vu hamate nipaya,
de ham anggilin ham alompayo na vu Anutu,
de ham ambiing va nivasa in yanjak ni naambe
ham ahilin ham vasa.’ ²¹ + o 26:21 Sin 21:30-

31*Yik saawiing kul nambêênjo ondeey hil Yuda lalôôh sa hôôk Anutu-te dumb bop, be lawiingin nambe lanyis sa be saanggimb, ²² + o 26:22 Luk 24:44-47*le ma de Anutu hôôvu sa be tok laam gêên-anjo, om sen sa naalêê-jo de sa naanêel vakasin vu hil mali-malis pin osin vu himbop-aso having. De vakasin sen sa naanêel-ato ond yik vakasin timu sen bôôy Anutu-te hil vaalu laving Mose be lanêel nambe le nôôn jak-ato, ²³ + o 26:23 1Ko 15:20*nambe, ‘Omaaho sen Anutu yoo holin yi vulôôt in nambe dôôvu yiy-ato, ond le gako nivaane be kandi jak naah vu hil yimbinate naamunggin vu hil pin, in naanêel vakasin melangaah-ate vu hil Yuda osin hil vaalu sen sil-ame Yudaa-to gaving.’ ”

Pol navêel Aglipa ka lak in nambe biing gaving

²⁴ Pol monanêel nambêênju tombe Pestas nêel bopaata lôôt nambe, “Pol-e, vati wiing hong a? Galuus dumb lôôt om wiing-ambe galumkook nawiing paya.” ²⁵ Le Pol nêel nambe, “Himbop Pestas, vati me-wiing sa le, malis. Sa lukook neep om sa naanêel keen, ²⁶ + o 26:26 Jon 18:20*de omaaho lulemak Aglipa lak va pin-anju ni ondeey saanêel langaah vu yi de same aayêênin e, in sa lak ni nambe va pin-anju ond ti me-hôôpis in yi le, malis, in vaa-ju me-hôôk taaku vunin e. ²⁷ De omaaho lulemak Aglipa, gawii-having Anutu-te vakasin sen hil lanêel langaah bôôy-ato? Sa lak ni lung la nambe gawii-having-ato.” ²⁸ Tombe sim Aglipa nêel vu Pol nambe, “Onaanêel daka gaving ond sa navu aanggilin sa longgpayo be sa naatu Kalisi-te omaaho ti.” ²⁹ Tombe Pol nêel nambe,

“Daka gaving me taamusin ond yik nivasa having, de sa naalohak vu Anutu in hong having hil pin sen ham nango sate vakasin gêên-anjo nambe ham naambe sa, lemu hees aniwêêk sen landuuh sa lak-anjo me-naanduuh ham e.”

³⁰ Pol nêêl nambêênju tombe omaaho lulemak Aglipa having yêêv bop-ambe Benaisi, osin hil pin sen

dando having-ato, ond sil pin kandi daale, ³¹ + o 26:31 Sin 23:29; 25:25*tombe sil lato lala voon le mem yoo lanêêl vu sil nambe, “Omaahôô-ju me-wiing nipaya in nambe jimb me duus kalaambus e.” ³² + o 26:32 Sin 25:11*Tonde Aglipa nêêl vu Pestas nambe, “Mu nêêl nambe Sisa gango yite vakasin ondeey, nganjo nama ond lohvu nambe yaambiing-ambe gato na.”

27

Pol lak sip-ambe la in na Lom

¹ + o 27:1 Sin 25:12*Lanêêl lung la nambe hey o Pol-aso be hey anjak sip-ambe hey ana Itaali sen Lom neep-ato, om lavu Pol having kalaambus vaalu lalukala yêêv ti haale nambe Julias nama in nambe ganggin sil, yêêv-anju nanggin Sisa-te ngaamong vaha-so doo-namaavaalu. ² + o 27:2 Sin 19:29*Tombe hey alak hil Adlamitiam-ate sip ti, in sip-anju navu na hil Esia-te taaku nalu ti ti, om hey ala, tombe hil Makedonia ti Alistakas vu taaku Tesalonika la having hey. ³ + o 27:3 Sin 24:23*De samiinaanôôn atombe hey aatok ala Saidon, de Julias wiing nivasa vu Pol om liinggis-ambe Pol la yi yite hil-ambe ya vanôôn ayuuh ame vu sil.

⁴ Tonde hey kandi vu Saidon-ambe hey ala, le vavi luus hey om sip loh neep Saiplas vaalu in nambe nalu lavuun-anju gilin vavi, ⁵ tombe hey valu-aaloh ngaaho vu Silisia yuuh Pampilia, be hey aatok ala Maila sen neep Lisia-te taakuu-to. ⁶ Tombe vu taakuu-ju hil ngaamong vaha-sote yêêv-anjôto yi de hil Aleksandlia-te sip ti navu na Itaali, om nêel-ambe hey alakala sip-anju. ⁷ Tombe hey ala lemu sip oo monala melaas lohvu busin ngeeyaata, tombe lawiing kul bopaata lôôt, le mem hey ala ngaaho vu taaku Naidas, le vavi bopaata lôôt om hey-ame aalohvu in nambe ana nivalok e, om hey valu-aaloh Klit vaalu ngaaho vu taaku Salmoni neep-ato in nambe nalu lavuun-anju gilin vavi. ⁸ Tombe lawiing kul bopaata lôôt in vavi luus hey-ambe hey ala monaahulis taaku Klit nanyendangga, be hey aatok ala taaku ti danêel haale nambe Nanyelasu Nivasa. Taakuu-ju neep ngaaho vu bayêen bop Lasia.

⁹ Busin ngeeyaata lung la, de busin bop sen Yuda dalakin sil in vanôôn-ande me-dayaa-to ond lung la, tonde vavi bopaata wiing-ambe lôôy anipaya lak om me-lohvu nambe hey ana nivasa le, om Pol nêel vakasin vu

sil nambe, ¹⁰ + o 27:10 Sin 27:22*“Ham hile, sa lak ni nambe nimeen bopaata le naatovu yiyi, de va ngeeyaata le na menama gaving. Me-kupak osin sip amu na menama le, malis, yiyi omaahonôôn having, om yame ana le, yiyi mando.” ¹¹ Lemu hil ngaamong vaha-sote yêêv wii-having omaaho sen nako sip-ato osin sip mangganaan lavand, de me-wii-having Pol lava le, ¹² de lôôy nanyendangga nanyelasuu-ju me-

nivasa in nambe sip mando kwaav yumbeyuuh hôôk sen vavi bopaata-te busin-anjuuto le, om hil ngeeyaata lanêêl nambe hey gavuuuh taakuu-ju de hey ana, in kand vu nambe mak hey e naatok ana hil Klit-ate taaku

ango vu Piniks in nanyelasu nivasa, om hey aandôôpis-ambe mem hey mando nivasa in vavi jamba.

Vavi wiing-ambe lôôy anipaya lak lôôt

¹³ Vavi noow valup atombe kand vu nambe hey e aanggulis lôôy nanyendangga be hey ana nivasa nohvu sen lanêêl-ato, om sil laandiiy angka lak-ande hey oo monaahulis hil Klit-ate lôôy nanyendangga. ¹⁴ Yik hey ala daka tonde sim vavi jamba ti laam vu lonak, ¹⁵ tombe vavi luus sip lôôt, om sil-ame lalohvu nambe langgilin sip na nivalok vu vavi le, tombe sil lawiing e ma, om lôôy oo monako hey amu. ¹⁶ Tombe hey valu-aaloh ngaaho vu nalu lavuun daka sen hilin vavii-to danêêl nambe Koda, om hey aawiing kul bopaata lôôt, be hey laandiiy dinggi laam ngaaho, ¹⁷ le mem sil laandiiy lakalaam sip baandoni, tonde sil laanggin sip lak hees aniwêêk tatin in nambe

sip-ame gapok e. De sil layêênin nambe vavi le juus hey-ambe hey ana andahôôk laahel anipaya ti ngaaho vu Aplika, om sil lalôôh sel vêêl-ande lôôy oo monako hey amu.

¹⁸ Vavi osin lôôy oo mopakepin hey lôôt, om samiinaanôôn atombe sil laate kupak heey lukala lôôy, ¹⁹ de heendiiy atombe sil oo laate va yuuh ame sen nando lak sip anivalok-ato lukala lôôy

having. ²⁰ Tonde busin ngeeyaata ond hey-ame aahe taaku mekaalus osin matam daka le, yik vavi nipaya yoo mopakepin hey lôôt, tombe mem hey akangg vu nambe hey navu ana mengg nama, de hey-ame le mando nivasa le. ²¹ De busin ngeeyaata me-laya vanôn e, tombe Pol la naale hôök sil lavuun-ambe nêel vu sil nambe, “Ham hil-e, nambe bôôy-ato ham gango sa lavangg-ambe yiy mando Klit, ond yame le naatovu nimeen bopaata naambêênjo le, de va yuuh ame me-na menama le. ²² + o 27:22 Sin 27:10,31*Om gêên sa naanêel vu ham naambe ham alompayo niwêêk jak in ham ti me-le na menama le, yik sip timu yoo le na menama. ²³ In Anutu sen yite omaaho ti saa-jo, de sa naalohak vu yii-to, ond yite angela ti hato vu sa gêên busin-ambe nêel nambe, ²⁴ + o 27:24 Sin 23:11*‘Pol, game ganjêênin e, gale gana baale dôök Sisa me. De gangge hil sen ham nando lak sip-anjo, ond Anutu ka pasiv om le biing-ambe ham pin e mando metumin.’ ²⁵ Om ham hil-e, ham alompayo niwêêk jak in saawii-having Anutu nambe vaa-ju le nôôn jak nohvu sen nêel vu saa-jo, ²⁶ + o 27:26 Sin 28:1*om yale ana andahôök nalu lavuun ti le.”

²⁷ Hey oo monaayêês lôôy Edlia be la busin nomaayuuh-ambe laam yumbeyuuh, de hôök busin lavuun atombe kul vaha-so sen dako sip-ato, ond sil sahi nambe sip valup ngaaho lak vu lonak, ²⁸ om sil talu tatuuh ak hees-ande laate lukala lôôy, de sil taahu vu laahel kambini be laam, be layi le waak lohvu 37 mita. Tonde hey valu-ala daka, tombe yik sil laate tatuuh-ambe sil taahu laah, le lohvu 27 mita. ²⁹ Tombe sil

layêênin nambe sip e jakana tatuuh, om lawiing angka yumbeyuuh vu sip ahus lukala lôôy, de sil laanjiihin taaku me nambe langaah jak pavis. ³⁰ Tonde hil kul vaha-so sen dako sip-ato ond davu salo mop in nambe gavuuuh sip-ande lana, om sil taaluuhin dinggi luus de sil tatuhin nambe davu baate angka sen sip naluu-to dukana lôôy, ³¹ + o 27:31 Sin 27:22*lemu Pol nêel vu ngaamong vaha-sote yêêv osin hil ngaamong vaha-so nambe, “Naambe hil-anju me-mando jak sip e, ond ham e ana mem nama.” ³² Om ngaamong vaha-so katôôv hees in dinggi de lôôy hako la.

³³ Tonde heendiisin atombe Pol kataangg sil pin nambe lanja vanôôn, om Pol nêel nambe, “Busin nomaayuuh-ambe laam yumbeyuuh lung la ond ham naham oo monalak-ambe ham nando malis amu, ham ame aha vanôôn daka le, ³⁴ + o 27:34 Mat 10:30*om sa kataangg ham naambe ham angga vanôôn daka be ham sakem dukanaah, in ham ti me-le na menama le.” ³⁵ + o 27:35 Mat 15:36; 1Ti 4:4-5*Nêel nambêênju tonde hako balet-ambe naale hôôk sil amend, le mem lohak osin pêêlis la vu Anutu tonde kalêêh-ambe ya, ³⁶ tombe hil pin alondpayo ahelavis ak-ambe laya vanôôn having. ³⁷ De hey pin sen hey nando lak sip-anjôôto hey ngeeyaata lohvu 276. ³⁸ Sil laya vanôôn-ambe sakend lukalaah, tonde laate vanôôn wit lukala lôôy in nambe sip ahelavis jak.

Sip wiing paya

³⁹ Langaah ak atombe sil layi taaku, le me-lalak taakuu-ju ni le, lemu layi lôôy nanyendangga nanyelasu ti ond lonak anivasa, om sil lanêel

nambe sil sahi naambe lohvu ond mem sil gako sip guli-na lonak-anju. ⁴⁰ Tonde mem

sil kavaayin hees in angka pin de lukala lôôy, tonde sil kavaayin hees in haah yuuh sen dahilin sip nalu lak-ato in nambe biing kul naah, de sil lasi sel ti lakalaah in nambe vavi dôôk. Tonde hey ala in nambe ana lonak, ⁴¹ le ma de sip lakala laahel ti nando hôôk lôôy lavuun-ato be hahôôk hôôk, de sip nalu niwêêk ak tonde lôôy yiis sip ahus lôôt-ambe hapok. ⁴² Tombe ngaamong vaha-so kand vu nambe lanyiis kalaambus-aso be lanjimb, in sil e lanjêês lôôy-ambe lanjak ana lonak de dapak-ambe lana, ⁴³ lemu ngaamong vahasote yêêv wiingin nambe Pol mando metumin om nêêlin sil, de nêêl nambe hil vaalu sen dayêês bel-ato ond sil pasong landukana lôôy naamunggin-ambe lanjak ana lonak, ⁴⁴ + o 27:44 Sin 27:22-25*tonde hil vaalu ond sil danjip ak haah paak osin sip anye paak-ambe lana. Om hey aawiing nambêênju tombe hey pin oo alakala lonak.

28

Pol nando Molta

¹ Tombe hey alakala lonak lung la, le mem hey hango lanêêl nalu lavuun-anju haale nambe Molta. ² + o 28:2 2Ko 11:27*Tombe hil taakuu-ju sil samu hey nivasa lôôt, de luk osin vavi vaaku hey om sil lavaav kin-ande lanêêl-ambe hey pin ala vanyuuh kin. ³ Tonde Pol supin kin kaalok bun ti be vaav, tombe kin hapang nyêêy ti om loolak-ambe hatu, tombe ya Pol nama. ⁴ Tombe hil taakuu-ju layi de nyêêy siyak hôôk Pol nama, om

sil oo lanêêl vu sil nambe, “Omaahôô-ju mak yiis omaahonôôn ti yimb, om vu lôôy-ambe lakalaam atombe tovu nyevahaan-ambe navu jimb.” ⁵ + o 28:5 Mak 16:18* Tonde Pol tandinin nama tombe nyêêy la yêês kin, lemu Pol-ame hango nivaane le. ⁶ + o 28:6 Sin 14:11* Tombe sil mondanggin in nambe navu buuk me dupake be jimb meta, om mondanggin lôôt, le ma de vati me-tovu Pol e, om lanêêl vakasin ango lak nambe, “Yi anutu ti.”

⁷ De yêêv bop vu nalu lavuun-anju haale nambe Pablias, yite ngaanggis neep ngaaho vu taakuuju, ond hako hey ala baan-ambe hanggin hey nivasa lôôt lohvu busin yaal. ⁸ Tonde sim Pablias mangganaan anivaane be ahe nalup osin nihees-ambe neep, om Pol la vu be lohak, de hambe nama lak yi tombe nivasa hôök. ⁹ Pol wiing nambêênju om hil anilakin vaalu vu taaku nalu lavuun-anju lalaam-ambe Pol wiing sil anind vasa hôök having. ¹⁰ Tombe hil-anju samu hey nivasa lôôt, de busin sen hey ala lak-ato, ond lako vanôôn ayuuh ame laam-ambe latung lakala sip vu hey.

Pol tok la Lom

¹¹ Hey nandôô-ju kwaav yaal lung la, tonde mem hey alak hil Aleksandlia-te sip in valunando nalu lavuun-anju hôök busin sen vavi bop-ambe lôôy wiing payaa-to, ond hako hey-ambe hey ala, de sip-anju ond anutu Sus noow ayuuh kanund daale lak sip nalu. ¹² Tombe hey aatok ala taaku Sailakus, be hey nandôô-ju busin yaal. ¹³ Tonde hey vuu-ju be hey vanju hôök-ambe hey aatok ala Lisiam, de samiinaanôôn atombe

vavi noow valup om hako hey-ambe hey ala lôôt, de heendiyy atombe hey aatok ala Putiolai. ¹⁴ Tombe vu taakuu-ju hey aatovu Omaaho Bop-ate hil vaalu, om lanêêl-ambe hey nando having sil busin namaavaalu be vindak yuuh, tonde mem hey kandi vuu-ju be hey ala Lom. ¹⁵ Tonde Omaaho Bop-ate hil vu Lom lango banye nambe hey valup, tombe sil lato latovu hey vu taaku Apias osin taaku sen danêêl nambe Tatuva Yaal-ato. Pol yi sil atombe pêêlis vu Anutu de lopayo niwêêk ak. ¹⁶ + o 28:16 Sin 24:23*Hey aatok alaam Lom atombe laliinggis om Pol oo nando lak bayêên ti be ngaamong vaha ti yoo monanggin yi vuu-ju.

Pol nêêl banye nivasa vu Lom

¹⁷ + o 28:17 Sin 25:8*Pol nando busin yaal lung la le mem teey hil Yuda sen dando Lom-anjuuto silate himbop-aso be lasupin lalaam, le mem nêêl vu sil nambe, “Halingg-aso, same aawiing vati in nambe daanggôôl yate hil osin yate himbop-aso bôôy silate gambum e, lemu hil landuuh sa vu Yelusalem, tombe lavu sa lukala hil Lom namand. ¹⁸ + o 28:18 Sin 26:31*Tombe hil Lom lango sate vakasin lôôt, le me-latokak nipaya ti lohvu nambe lanyis sa be saanggimb e, om lawiingin nambe lambiing-ambe sana mu, ¹⁹ + o 28:19 Sin 25:11*lemu hil Yuda nind baya om sanêêngg mopaatôôv ti me-neep e, ondeey sa kataangg Sisa nambe gango sate vakasin gaving, le same aawiingin nambe aambiing vakasin vu sate hil e. ²⁰ + o 28:20 Sin 24:15; 26:6-7*Yik danggakook-anja sen saateey ham in nambe saangge ham-ambe sa

bakaas gaving ham, de saawii-having va sen yiy Islel pin nanggin-ato, yik manyinja sen landuuh sa lak hees aniwêêk-anjo.” ²¹ Tombe lanêêl vu nambe, “Hil Yudia me-kaavu kaapiya be lanêêl ombanyem vu hey e, de Yuda ti me-laam-ambe hatulin vakasin osin nêêl vakasin anipaya ti lak hong e, ²² + o 28:22 Sin 24:14*lemu hey aawiingin onaanêêl gate vakasin-ambe hey gango le, in hey alak ni nambe hil vu taaku pin danêêl vakasin anipaya lak ham tanasin vaha ti sen ham navu sapa Yesuu-to.”

²³ Tombe sil latung busin ti le mem hôôk busin tii-ju hil ngeeyaata lalaam vu Pol vu bayêên sen nando lak-ato, om Pol oo motatekin tanasin danggakook lak Anutu nanggin yite hil-ato hôôk samiinaanôn-ambe la busin hôôk having vu sil, de nanêêl Mose-te tanasin osin Anutu-te vakasin sen yite hil vaalu lanêêl langaah bôôy-ato vu sil in nambe lambiing gaving Yesu. ²⁴ Tombe hil vaalu lawii-having yite vakasin de hil vaalu melawii-having e, ²⁵ om sil-ame londpayo lavuh ti le, tombe lawiingin nambe lana le Pol nêêl vu sil nambe, “Vavi Vaambuung nêêl vu Anutu-te omaaho Yesaia be nêêl vu yate himbop-aso bôôy, keen lôôt nambe,

²⁶ + o 28:26-27 Ais 6:9-10; Mat 13:14-15*‘Gana vu hil-anju be onaanêêl vu sil naambe, “Ham e gango lôôt lemu ham-ame le naatokak dangga le, de ham e angge lôôt le ham-ame le anjak ni le.”

²⁷ In hil-anju londpayo niwêêk ak osin nanyend doos ak, de sil amend yip in nind baya

nambe me-lanji va lak mend e, de me-gango vakasin e, osin kand-ame bu vakasin danggakook e, de sil-ame langgilin lond-payo nom vu sa in nambe saambiing-ambe nind vasa jak e.'

²⁸ + o 28:28 Saam 67:2; Luk 3:6; Sin 13:46; 18:6*“Om sa naanêel langaah vu ham naambe Anutu-te samu samu la vu hil vaalu sen sil-ame Yudaa-to lung la, in sil e gango vakasin.”

²⁹ [Pol nêel vakasin-anju lung la, tonde hil Yuda lalaah atombe yoo lanêel sil bopaata lôôt.]

³⁰ + o 28:30 Sin 28:16*Tonde Pol oo vaanggo bayêên ti be nando hôôk lohvu ta yuuh, tombe yite vaatêêvak sen dalaam vu yii-to ond yoo nako sil pin lak nivasa, ³¹ + o 28:31 Sin 28:23*de yoo monanêel vakasin lak Anutu nanggan yite hil-ato, osin navu taahu Omaaho Bop Yesu Kalisi-te vakasin vu hil, ond yoo nêel neep langaah lôôt de omaaho ti me-nêêlin e.

Mangga Buang New Testament
The New Testament in the Buang, Mangga Language
of Papua New Guinea
Nupela Testamen long tokples Mangga Buang long
Niugini

copyright © 1981 Wycliffe Bible Translators, Inc.

Language: Mangga Buang (Buang, Mangga)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-19

PDF generated using Haiola and XeLaTeX on 11 Nov 2022 from source files dated 9 Oct 2020

8d739032-2a4b-567d-abd1-cb7e24ed2cd6